

ლუიზა აფსაზავა-თვალაძე

საქსენი სტუმარი

(ანუ მოგზაურობა ქართულ საზღაპრეთში)

მხატვარი დალი მუხაძე





მცირე წინასიტყვაობა

საახალწლო საბავშვო კონცერტზე მინვეულ თოვლის პაპას, რომელსაც სანტა კლაუსის ტანსაცმელი ეცვა (ეს კიდევ სხვა სატკივარია!), „ამოსაცნობად“ სხვადასხვა ზღაპრის გმირი წარუდგინეს: ბურატინო, პიერო და მალვინა, კონკია, პეპი გრძელწინდა, მგელი და წითელქუდა... კარგია, მსოფლიო ლიტერატურას პატარაობიდანვე რომ ვაზიარებთ მოზარდებს, მაგრამ სად გადაკარგეთ ჩვენი, ქართული, ზღაპრის გმირები: ამირანი, ეთერი, მეჩონგურე, ასფურცელა, მზეჭაბუკი, ხუთკუნჭულა, ნაცარქექია, ცხრათავიანი დევი, ნახევარწინილა, ნუნა და წრუნუნა, ჩხიკვები – ზაქარა და ქეთევანი, ნიკორა, წიქარა... საერთოდ, კითხულობენ ჩვენი ბავშვები ქართულ ზღაპრებს?!...

გული მეტკინა!... ამიტომ გადავწყვიტე, ძველი ქართული ხალხური ზღაპრები გადამემუშავებინა და ისე შემეთავაზებინა პატარა მკითხველებისათვის...

ძალიან გავიხარებ, თუ მოეწონებათ!

თბილისი 2010 წ.

306

ბებომ ქართული ხალხური ზღაპრების წიგნი დახურა და საბას მიუღალერსა:

– დანექი, გენაცვალოს შენი ბებია, აი, ელისაბედმა უკვე დაიძინა. დაიღალა... კარგი დაბადების დღე გამოვიდა, არა?! იჩქარე, შენც დაიძინე, თორემ საზღაპრეთში შეგასწრებს!

საბამ ლოგინიდან ისკუბა და საყვარელ ბებოს კისერზე შემოხვია ხელები; მერე მეზობელ საწოლზე მძინარე ბიძაშვილს გადაუჩურჩულა:

– ელი, დამიცადე! – თქვა თუ არა, საბანში შესრიალდა, მოხერხებულად მოკალათდა და თვალები დახუჭა.

ბებიამ ორივეს ჯვარი გადასახა, შუქი გამორთო და კედლის ნათურის ღილაკს ხელი შეახო.

ოთახი ბრის იისფერი შუქით ოდნავ განათდა. მოხუცი საწოლებს შორის ჩადგმულ დაბალ სკამზე ჩამოჯდა და ხმა ააყოლა უნეტარესი ილია მეორის საგალობელს – „მოდო ჩემთან, უფალო!“ იგი ბებიასა და შვილიშვილებს ერთნაირად უყვარდათ და ძილის წინ ყოველთვის ისმენდნენ...



საზღაპრეთისაკენ

... საბამ ლურჯ-წითელი წყალგაუმტარი შარვალი და ქურთუკი შეარჩია. იცოდა, ძნელი გზა ედო, ამიტომ ტანზე მოხერხებულად და თბილად უნდა ცმოდა. ტყავის ყელიანი ფეხსაცმელი მოირგო, მამის ნაყიდი მშვილდ-ისრები მხარზე გადაიკიდა და სარკის წინ მოკეკლუცე ელისაბედს გასძახა;

– ელო, გეყოფა კოპნიაობა, სასეირნოდ ხომ არ მივდივართ?! რასაც აგირჩევ, ის ჩაიცვი! აქედანვე გაფრთხილებ, თუ არ დამიჯერებ, არ წაგიყვან!

ელისაბედმა პროტესტის სათქმელად პირი დაალო, მაგრამ გაახსენდა, თუ როგორი სიტყვის კაცი იყო მისი ძმა (ასე თანატოლებს აცნობდა ხოლმე მამიდაშვილს), ამიტომ უსიტყვოდ ჩაიცვა იმის მიერ შერჩეული; მერე სახეზე მუდარა გამოეხატა და ჩურჩულით შეეხვეწა:

– საბ, ბებიკოს ვაკოცებ, რა!

– კარგი, მეც მიწადა, ოღონდ არ გავალვიძოთ, თორემ არ გაგვიშვებს, ხომ იცი!

ხელიხელჩაკიდებულნი მეზობელ ოთახში ფეხაკრეფით შევიდნენ. მოხუცს მშვიდად ეძინა, შვილიშვილები ლოყებზე ნაზად ეამბორნენ. მძინარე ბებიას ტკბილად გაელიმა, რა თქმა უნდა, ძილშიაც მათზე ფიქრობდა!... ელისაბედს ცრემლი მოერიო, საბას რომ არ გამოეყვანა, საყვარელ ბებოს აღრიალებული ჩაეხუტებოდა!...

– წამოდი, თორემ მეც ამატირებ... ამის

დროა ახლა, გოგო?!. დავბრუნდებით და რამდენ ხანსაც მოგვესურება, მოვეფერებით!...

ელისაბედმა ცრემლი მოინმინდა; ბებოს ნაჩუქარი ბეჭედი (დაბადების დღეზე რომ უსახსოვრა) არათითზე გაიკეთა. ჯერ ერთი, ძვირფასი ადამიანის არმალანი გახლდათ; მეორე – ძალიან ლამაზი ბეჭედი იყო: ოქროს რგოლის შუა ბუდეში ცირკონის თვლები დამაბრმავებლად ბრჭყვიალებდა; მესამე – კარგად ახსოვდა ბებოს ნათქვამი: ეს უბრალო ბეჭედი არ გეგონოთ, შიგ ჩემი სიყვარული და ლოცვაა მოთავსებული. ამიტომ, როცა გაგიჭირდებათ, დახმარება სთხოვეთ, ყველაფერს აგისრულებთო! მერე მსუბუქი ზურგჩანთა მოიგდო მხრებზე, რადგან იცოდა, მძიმეს საბა წამოიკიდებდა.

ბავშვებმა კარი გაიხურეს და ტყისაკენ მიმავალ გზას დაადგინენ...

საბა და ელისაბედი ბიძაშვილ-მამიდაშვილი არიან. საბა 12 წლისაა, ელისაბედი – 11-ის. ერთ კლასში სწავლობენ (ბებოამ ასე ისურვა). მათი მშობლები მთელი დღე მუშაობენ. ბავშვები ბებოასთან იზრდებიან და ისე უყვართ, ვერ შორდებიან, დედ-მამას შინ არ მიჰყვებიან. ახლაც გაუძნელდათ გამოთხოვება. არადა, საგმირო საქმეების ჩადენაზე ოცნებობდნენ და უნდა წასულიყვნენ.



დარბაისკარი


ბევრი იარეს თუ ცოტა, დარბაისკარის ტყეს მიადგნენ. ტანმსხვილი მუხები, რცხილები, ცაცხვები, იფნები, ნაბლის ხეები წვეროებით ცას ებჯინებოდნენ. ღონიერი ტოტები განზე გაეშვირათ და ერთმანეთში გადაენნათ. ზოგს ხავსი მოსდებოდა, ზოგი ხანდაზმულობისაგან ჭრიალებდა, ახალნერგები კი სულ ზევით იცქირებოდნენ – ეჩქარებოდათ, მზისთვის თვალებში შეეხედათ. ასე მეგობრულად იდგნენ ყველანი და ქვეყნის

მანათობელს ესალმებოდნენ, ერთად იბანებოდნენ ღვთის ნამით; ქარსაც ერთად უმკლავდებოდნენ; ერთად ტიროდნენ მეზობლის გარდაცვალების გამო; ერთად უგდებდნენ ყურს ადგილის დედის ნაამბობს; ფესვიდან ამოზრდილი ნერგის დანახვით ერთად ხარობდნენ...

საბამ და ელისაბედმა ზევითაც მოავლეს თვალი, რძისფერ ცაზე მოლივლივე ღრუბლებს არნივები სიმალლის დაძლევაში ეჯიბრებოდნენ.

მიუხედავად ხეთა სინშირისა,





ტყე საოცრად ნათელი იყო. ფოთლები რიტ-
მულად ისე ტრიალებდნენ, რომ სხივები ბა-
ლახებსა და ყვავილებს უხვად ეფინებოდა,
ჩიტების ორკესტრი გალობდა, ჟივჟივებდა,
უსტვენდა, ყაპყაპებდა, ნკრიალებდა... ირგვ-
ლივ სამოთხისებური მშვენიერება ყვავდა.
აღფრთოვანებული პატარები თავანუღნი,
პირღია, ღიმილიანები მიაბიჯებდნენ, ხან აქეთ იც-
ქირებოდნენ, ხან-იქით; თვალებს აცეცებდნენ, რომ
არაფერი გამორჩენოდათ...

უცებ ტირილი მოესმათ. შეჩერდნენ, უფრო
დაკვირვებით მიმოიხედეს. ბუჩქის ძირას ჩაყუყუ-
ლი ყურცქვიტა შენიშნეს – ტიროდა და ღაპალუ-
პით ჩამოდენილ ცრემლებს ბუთქუნა წინა თათებით
ინმენდა.

ბავშვები მისკენ გაეშურნენ. კურდღელმა გაქცევა
დააპირა, მაგრამ მათს სახეებს რომ შეხედა, მიხვდა,
საფრთხე არ ემუქრებოდა და მოფერების ნებაც კი დარ-
თო.

– მე ფუმფუკა მქვია. თქვენ თვითონ ვინა ხართ, აქ
რა გინდათ?! – სლუკუნით უპასუხა შეკითხვაზე.

– მე საბა ვარ. ეს ჩემი ბიძაშვილი ელია. ჩვენი ნუ
გეშინია! რა გაგჭირვებია?! – ზურგზე ხელი გადაუსვა
ბიჭმა.

– მარტოებს არ გეშინიათ?! – კითხვა შეაგება ყურც-
ქვიტამ.

– არა! – უპასუხა ელისაბედმა. – საბა ისეთი გულადია,
ისეთი ღონიერი და გონიერი, მასთან არაფერი მაშინებს.
არც მე ვარ ლაჩარი! ქართული საბრძოლო იღეთებიც

ვიცი და სროლაც. თან ბებიკოს ბეჭედი გვიცავს. ჩვენი მიზანია, გაჭირვებულებს დავეხმაროთ, ვუშველოთ!

– საძილე ისრებით ვართ შეიარაღებულნი. – დაამატა საბამ, – გვიამბე, რა დაგემართა, იქნებ დაგეხმაროთ?! – ოოოჰ... – ამოიკვნესა ყურცქვიტამ. – გრძელი ამბავი-ააა...მაგრამ მოკლედ შევეცდები. კურდღლებს ყველაზე ლაჩრებად გვთვლიან, ჰოდა, მომბეზრდა, მშიშარას რომ მეძახდნენ!... ტრაბახი დავინწყე. გასამხნევებლად ერთ-ორ ხელადას გადავკრავდი და მივიმღეროდი:

ეს ქვეყანა სამეფოა,
მე ვარ მეფე ამ ქვეყნისა:
არ ვასხვავებ ლომს და მელსა,
შიშის ზარს ვცემ ყველა მგელსაც!

– ერთხელაც ასე ვმღეროდი. რამდენიმე მეტრში, თურმე, ლომი დაეხეტებოდა. ჩემი ნათქვამი გაუგონია, ტყეში შემოვარდა და შემომღრიალა:

– რაო, რაო, რას კნავი?! მეფე ვარო?! ყველას ვაშინებო?!

– გავქვავდი... შიშისაგან ენა მუცელში ჩამივარდა!... ლომი მიახლოვდებოდა და ბრდღვინ-ვას განაგრძობდა:

– ვინ არის მეფე, მე თუ შენ?!..

ელდის-აგან ჩავიფსი! ძლივს ამოვღერდე:



-მეფეც შენა ხარ და მბრძანებელიც, მე არარაობა ვარ!...

ლომმა ის იყო პირი დაალო, რომ გადავესანსლე, ირ-
მის ბლავილი გაისმა. მხეცი უცბად მიტრიალდა და მისკენ
გაეშურა – ჩემზე დიდი ლუკმა ირჩია. ყველაფერი რაღაც
10 წუთის წინ მოხდა.

რომ მობრუნდეს, რაღა მეშველება?!.. აი, რა მატ-
ირებს!...

ბავშვებმა დაამშვიდეს, დაარიგეს, ადგილი არ გამო-
ეცვალა. თვითონ უზარმაზარი მუხის ხეს ამოეფარნენ.

საბამ მშვილდი მოიმარჯვა.

მალე ლომის ბრდღვინვა გაისმა. აი გამოჩნდა კიდეც.
ლონიერ ფეხებზე მდგარი კუნთოვანი სხეულით მოირხე-
ოდა და უზარმაზარ თავზე ფაფარი ემღებოდა. კურდღე-
ლი მისთვის ერთი ლუკმაც არ იქნებოდა, მაგრამ დასჯა
სურდა.

კვებნა და ამპარტავნობა ელისაბედსა და საბასაც
არ მოსწონდათ. სხვა შემთხვევაში ყურცქვიტას გაამ-
ტყუნებდნენ, მაგრამ მათი მიზანი ხომ დაჩაგრულის გამო-
ქომაგება იყო! ჰოდა, ლომის დასახვედრად მოემზადნენ.
მოახლოვდა თუ არა, ხეს ამოფარებულმა საბამ მშვილდი
მოზიდა და ლომს ისარი ბეჭში ესროლა (გულშიც შეე-
ძლო, მაგრამ არ გაიმეტა!), ელისაბედმა ბეჭედს ჩასჩურ-



ჩულა: – ბებიკოს სახსოვარო,
ჩვენი თავგადასავლები იწყება
და გვიშველე, დაგვეხმარე, ლო-
მი დაგვამარცხებინე! – საყვა-
რელ ნივთს აკოცა და ცხოველს
მიუშვირა. ბეჭდის თვლებიდან
ფერად-ფერადი მამხალეები რა-
კეტის სისწრაფით გამოსრი-



აღდნენ და ნადირთა მეფეს თავ-
ში შეუძვრნენ. დარეტიანებული
ლომი მოჭრილ ხესავით წაიქცა,
წაიქცა და ხვრინვა ამოუშვა...

ბავშვებმა და ყურცქვიტამ გამარ-
ჯვების ყიჟინა დასცეს; ხეებმა ფოთლებით
ტაში დაუკრეს. ჩიტები კიდევ უფრო ხმამალ-
ლა აჭიკჭიკდნენ.

ტყეში უცბად გავარდა ხმა: კურდღელმა ლომი
დაამარცხაო! მოვიდნენ და მოვიდნენ მხეცები: დათვები,
მგლები, ტურები, მელიები, კურდღლებიც, რალა თქმა
უნდა. მოკლედ, დიდი და პატარა – ყველა იქ შეიკრიბა.

ბაქია კურდღელი კუნძზე შეხტა, მეზობლებსა და მე-
გობრებს მიმართა:

– იცნობდეთ, ეს ელისაბედია, ეს კი საბა. მათ ლომი
გათიშეს. სიკვდილს გადამარჩინეს! აქამდე გვეგონა, რომ
ადამიანები ჩვენი მტრები იყვნენ. ხომ ხედავთ, ასე არ
არის, ისინი ჩვენი მეგობრები არიან! აი, რა შეუძლია
თანადგომას!...მე...მე...გპირდებით, აღარასოდეს ვიტრა-
ბახებ!

კურდღლის მეგობარი ტყის ბინადრები მძინარე ლომს
მიესივნენ (უძლიერესი მხეცის დამცირების ეს შესაძლე-
ბლობა ხელიდან არ გაუშვეს!), ზოგნი კუდში ჩააფრინდ-
ნენ, ზოგნი – ფაფარში, სხვები – ფეხებში და დიდი წვა-
ლებით, საერთო ძალით, იმ ადგილიდან შორს გაათრიეს;
მერე უხვი სუფრა გაუშალეს სტუმრებს და მათთან ერ-
თად მოილხინეს. რალა არ ელაგა მაგიდაზე: მარწყვი და
ჟოლო, შინდი და მაყვალი, მსხალი და ვაშლი, ქლიავი
და ჭანჭური, ბანანი და კივი, სტაფილო და კომბოსტო,
კიტრი და პომიდორი, გოგრა და საზამთრო, ნესვი და მან-

გო, ხორბალი და ქერი, ათასგვარი წვენი – ყველაფერი, ხორცის გარდა, რომ იტყვიან, ჩიტის რძე არ აკლდათ. მეგობრობის, მშვიდობის, წინაპრების, წარსულისა და მომავლის სადღეგრძელოები შესვეს, ბევრი იმღერეს და იცეკვეს.

ყველაფერს აქვს დასასრული და ზეიმიც დამთავრდა. ელისაბედისა და საბას წასვლის დრო დადგა.

ბავშვები ახალშექმნილ მეგობრებს გულთბილად დაემშვიდობნენ და გზა განაგრძეს.




წყალთელა


მალე მდინარე წყალთელას მიადგნენ. ორივე ნაპირზე, ათიოდე მეტრის მოშორებით, წამოჭიმული დაკბილული კლდეები ცხრათავიან დევეებს ჰგავდნენ. გვერდიგვერდ იდგნენ, მხრები ერთმანეთზე მიებჯინათ, თავი – ცას, ფეხები გაელაჯათ და მდინარის შხუილს აღრიალებულ ექოს უერთებდნენ. ცაში სვავები ყრანტალებდნენ და ძირს იყურებოდნენ – საკბილოს ეძებდნენ. იყო ერთი გრგვინვა და გნასი... უშუალოდ მდინარის ნაპირს უღამაზესი ყვავილოვანი მდელო მიუყვებოდა. ბავშვებს ისეთი შთაბეჭდილება შეექმნათ, თითქოს სამოთხისა და ჯოჯოხეთის გზასაყართან იდგნენ... მიხვდნენ, რომ განსხვავებულ სამყაროში აღმოჩნდნენ.

ნაპირზე ახალგაზრდა კაცი დაინახეს. იჯდა, კენჭებს წყალში ისროდა და ცრემლები ღვარად ჩამოსდიოდა.

ბავშვები მიუახლოვდნენ, მიესალმნენ. ვაჟმა თავაზიანად უპასუხა. პატარებმა დაღონების მიზეზი ჰკითხეს.

ხარება (ასე ერქვა იმ ახალგაზრდას), თურმე, ბოროტმა ქალმა მოხიბლა და თავი ცოლად მოაყვანინა. ხარებას ამ ქორწინებამ სიყვარულისა და ბედ-





ნიერების ნაცვლად უბედურება, ტანჯვა-
წამება მოუტანა, ყოველი წუთი შხამით სავსე
ფიალის მიღებას ჰგავდა! ქალი საოჯახო საქ-
მეს ხელს არ ჰკიდებდა, სულ ჭამდა, სვამდა
და ეძინა. განუწყვეტლად იმდენ ოქროსა და
ვერცხლს, ისეთ ტკბილეულს სთხოვდა, საა-
მისო არც შესაძლებლობა და საშუალება, არც
შესაფერი დრო იყო. ეს გახლდათ ყმანვილი კაცის
სადარდელი!

– ჩვენ დაგეხმარებით! – ერთხმად წამოიძახა
ბიძაშვილ-მამიდაშვილმა (ძალიან გაუხარდათ, რომ
ახალგაზრდა რაინდისათვის დახმარების საშუალება
ექლგოდათ!). მერე ხარებას გვერდით მიუსხდნენ.
ვაჟმა ორივეს ალერსით მოხვია ხელი. ელისაბედმა
ბეჭედს აკოცა:

– ბებიკოს სახსოვარო, როგორ ვუშველოთო, ჰკითხა.
ბეჭედი აციმციმდა და აჩურჩულდა:

– ცოლი წაიყვანოს დიდ მინდორში, ბებერი ვაშლის ქვეშ,
ღრმა ორმოში, ჯადოქარი ცოცხქარა ზის, იმას ჩაუგდოს.

ხარებამ ეს რომ მოისმინა, – იქნებ ჩემს გამწარებულ
ცხოვრებას რამე ეშველოსო, მაშინვე წამოხტა, ორმოსთან
მივიდა. სიღრმეში ბებერი ჯადოქარი მართლა იჯდა და
ინყევლებოდა. ვაჟმა ორმოს ფიჩხი წააყარა, ზედ ელისა-
ბედის ბეჭდის დახმარებით გაჩენილი ულამაზესი ვაშლე-
ბი დააწყო, ჩვეულებრივი კი არა, ოქროს ვაშლები! შინ
მისულმა ცოლს ერთი ნაყოფი მიართვა და უთხრა:

აი, თუ ბევრი გინდა, გამომყევი და ერთად შევაგრო-
ვოთ, ნახე, როგორ ბრჭყვიალებს!

ხარბი ქალი მაშინვე წამოხტა და გაჰყვა. მიმოფან-

ტული ოქროს ვაშლები რომ დაინახა, დააცხრა! ფიჩხის საფენი ჩაინგრა და ყველაფერთან ერთად ღორმუცელა ბოროტი ქალიც ჩაიტანა.

– ჯადო იყავ და ჯადოქართან მოგათავსე! – ჩასძახა კაცმა; მერე, მეგობრების დახმარებით, ორმოს უზარმაზარი ლოდი დააფარა.

ბავშვებმა და ხარებამ მდინარეში იბანავეს, სასწაულ-მოქმედი ბეჭდით განყობილ სუფრას მიუსხდნენ და ღამე კოცონთან გაატარეს, ასე ისურვეს.

გათენდა. ხარება დაინტერესდა, ნეტავ რა დაემართა ალქაჯსაო. მივიდა ორმოსთან და ჩაიჭვრიტა: ახალგაზრდა ქალს ბებერი ჯადოქარი კუთხეში მიემწყვდია და თავად, ტახტზე მოკალათებულს, ეძინა. ცოცხქარამ ვაჟი დაინახა თუ არა, შეჰლაღადა:

– ქრისტიანო! შენ ხომ კეთილი ხარ! ოღონდ ამ ალქაჯს მომამორე და ბედს გწევ!

ხარებამ და ბავშვებმა ბეჭედს ჰკითხეს რჩევა. მისი ნებართვით თოკი ჩაუშვეს და ჯადოქარი ამოიყვანეს. გათავისუფლებულმა მადლობა გადაუხადა და უთხრა:



– მეზობელი ქვეყნის, ლანჩხაეთის, მეფეს მზეთუნახავი ქალიშვილი ჰყავს, ლაია. წავალ, მის საწოლთან დავჯდები და ძლიერ დავაავადმყოფებ. შენ განაცხადებ, რომ მოარჩენ, იმ შემთხვევაში, თუ ცოლად გამოგატანენ.

ვაჟი დათანხმდა (ელისაბედსა და საბასაც შეეძლოთ, ბეჭდის დახმარებით, იმავე საქმის შესრულება, მაგრამ სიკეთის ქმნის საშუალება სხვისთვისაც ხომ უნდა მიეცათ!). ჯადოქარმა სათქმელი რომ დაასრულა, განიერი ქვედა კაბიდან ცოცხი დააძრო, გადააჯდა და გაფრინდა.



ნიგვზანი

ცოცხქარა ლანჩხაეთის სატახტო ქალაქ ნიგვზანში ჩაფრინდა, ხელმწიფის ულამაზეს ასულს სანოლზე დაუსკუპდა. საბრალოს ისეთი ავადმყოფობა შეჰყარა, ვერც ერთმა ექიმმა ვერ უშველა!


ყოველივე ეს ბეჭედმა ჩვენს გმირებს რომ აცნობა, ელისაბედმა საბას და ხარებას ხელი ჩაჰკიდა, ბებოს სახსოვარს აკოცა და სთხოვა:

–გასწი ლანჩხაეთისაკენ!

სამივე ნარნარით ავიდა ჰაერში, ჯერ ვერტიკალურად და მერე ისე გასრიალდნენ ლაჟვარდ ცაზე მოსეირნე ღრუბლებს შორის, თითქოს მოძრავ იატაკზე იდგნენ! შემხვედრი მტრედები, მისალმების ნიშნად, ფრთებს აფათქუნებდნენ, მერცხლები ორმაგ მარყუჟებს ხაზავდნენ და ეჟლურტულებოდნენ, წეროები კისერს იგრძელებდნენ და მეგზურებად მიჰყვებოდნენ. ბავშვები მოიხიბლნენ ამ სანახაობით; ხან ზევით აიჭრებოდნენ, ხან ისევ ჩამოეშვებოდნენ.

ასე ჩაფრინდნენ ნიგვზანში. დედაქალაქის ზოგიერთი უბანი ვაკე იყო და ლარივით გაჭიმულ ფართო ქუჩებში ერთ, ორ, სამადგილიანი ფერად-ფერადი, მზის ენერგიით მომუშავე ავტომობილები დასრიალებდნენ. მათს თავზე საჰაერო მანქანებიც ისეთივე მწყობრში დაფრინავდნენ, თითქოს გამზირებს მიუყვებიანო. ტროტუარებზე მოქალაქეები მიაბიჯებდნენ. მიუხედავად ასეთი მოძრაობისა, ისეთი სიმშვიდე და წესრიგი სუფევდა, ბავშვებსა და ხარებას თავი ზღაპარში ეგონათ. ყველა ნიგვზანელს ფერად-ფერა-





დი, საოცრად ლამაზი ტანსაცმელი ეცვა.

ჩვენი ბავშვები, ბეჭდის წყალობით, უჩინარნი გახდნენ, მხოლოდ ხარება მიაბიჯებდა გზაზე. დედაქალაქის ბინადრები ხვდებოდნენ, რომ ხარება უცხო იყო და თბილად, კეთილი ღიმილით ესალმებოდნენ: ზოგი ქუდს უხდიდა, ზოგი ხელს ართმევდა. მერე საქვეყნო დარღზე – მეფის ასულის ავადმყოფობაზე ჩიოდნენ. ხარებამ ყველა დაამშვიდა და განაცხადა:

– ქალიშვილს მე მოვარჩენ.

სასწრაფოდ გააქანეს მეფესთან... ავადმყოფის მამამ სიხარულით მიიღო (რა თქმა უნდა, უკვე იცოდა ვაჟის ნათქვამი), პირობა მისგანაც მოისმინა და მაშინვე დაეთანხმა: ცოლადაც შეგრთავ და სახელმწიფო ტახტსაც დაგიტოვებ, ოღონდ ჩემი ერთადერთი შვილი, ჩემი ლაია, გადამირჩინე!

ხარებამ ავადმყოფთან მარტოდ დატოვება მოითხოვა. ასეც მოიქცნენ. ცოცხქარა სასახლის ფანჯარასთან იცდიდა და ისე შეძვრა, ვერავინ დაინახა. ჯადოქარი მწოლარეს ხელით შეეხო...

ლაიამ თვალი გაახილა, ვაჟს მიაჩერდა, მოენონა, მისი სიყვარული გულში ჩაუვარდა. სანოლიდან წამოინია და ხარებას დიდი ხნის ნაცნობივით გადაეხვია. ყოველგვარი კეკლუცობის გარეშე აღიარა მასთან დაქორწინების სურვილი. ხარებამ ბავშვები ლაიას გააცნო და იქ მისვლის მიზეზიც გაანდო. ქალიშვილმა ყველაფერი აპატია ახალგაზრდა კაცს, რადგან მიხვდა, რა პატიოსანი და სამართლიანი ბუნებისა იყო. მეფის ასულმა ხარებასთან ოჯახის

შექმნის გადანყვეტილების თაობაზე ძიძას შეატყობინა, შემდეგ კი მამასთან მახარობლად აფრინა.

უსაზღვროდ გახარებულმა ხელმწიფემ ხარება და ბავშვები გულში ჩაიკრა, ქალიშვილი აიტაცა, და პატარა გოგონასავით დაატრიალა; მერე დალოცა ახალგაზრდები და ისეთი ზღაპრული სუფრა გაშალა, ისეთი, რომ ჯერ არავის ეხილა! ნაირ-ნაირი საჭმელ-სასმელი ფერად-ფერადი ბროლისა და ლალის ჭურჭელში ესხა და ელაგა. მუსიკოსები და მომღერლები საოცარი მელოდიებით ატკობდნენ სმენას.

დარბაზის შუაგულში, ამაღლებულ ადგილზე, ნეფე-პატარძალი იჯდა. მათ გვერდს ელისაბედი და საბა უმშვენებდნენ, ისინი ხელისმომკიდეები გახლდნენ.

ერთი კვირის სტუმრობის შემდეგ და-ძმა გამოემშვიდობა მასპინძლებს და ახალი თავგადასავლის საძებნელად გაემართა.



ჯუმათი

შუადღისას ჯუმაეთის სახელმწიფოში შევიდნენ. დედაქალაქი ჯუმაეთი ზღვისპირას მდებარეობდა. სამი მხრიდან ევლებოდა და ელამუნებოდა ფირუზისფერი ტალღები. ნაპირებთან ქათქათა ნავეები და იახტები ირნეოდნენ; მოშორებით, ღრმა ზღვაში, უზარმაზარი გემები იდგნენ და ნავსადგურში შესვლის ნებართვას ელოდნენ.

ლარივით გადაჭიმული ურთიერთგადაძვევითი ქუჩები ქალაქს სწორ ოთკუთხედებად ჰყოფდნენ. ქუჩების ორივე მხარეს მაგნოლიები, ვარდისფერი ხე-ყვავილები. პალმები ალამაზებდნენ და ზღვის სურნელს ყვავილები-სას უერთებდნენ. ძველებურ ხუთსართულიან თეთრ შენობებს თანამედროვე სტილით ნაგები სასტუმროები უმშვენებდნენ გვერდს. ყოველი ქუჩა ბულვარს უერთებოდა. ბულვარი კი, ათასფერი ყვავილით, ბუჩქით, ხით, შადრევნებით, ზღაპრული ფორმის კაფეებით ისე იყო მოხატული, ნალკოტი გეგონებოდათ.

საბა და ელისაბედი მოიხიბლნენ: დაბინდებამდე ათვალთვალდნენ ქალაქს. გემრიელი ხაჭაპური და ნაყინი მიირთვეს, ზღვის ტალღებში იბანავეს, მზეს მიეფიცხნენ და მერე უმშვენიერეს ბულვარში ბავშვებთან ერთად ითამაშეს.


მოსალამოვდა. შენობებში თანდათან აინთო შუქი. ფანჯრებგაკაშკაშებული ერთი კერძო სახლისაკენ გაუნიათ გულმა. დააკაკუნეს. კარი მასპინძელმა გაუღო.

უხვ სავახშმო სუფრას, სტუმარი მამაკაცი, ოჯახის დიასახლისი, გოგონა და ბიჭი უსხდნენ.



– ნამია (ცოლს ასე ერქვა), რა კარგი სტუმრები გამოუგზავნია უფალს! მობრძანდით, გენაცვალებო! შინ შეიყვანა და სუფრასთან მიიპატიჟა ბავშვები. დიასახლისმა ხელები დააბანინა და თანატოლების გვერდით დასხა. მასპინძელმა კაცმა – თავი თავისუფლად იგრძენითო – თხოვა და სტუმართან დანყებული საუბარი განაგრძო:





– როგორც გითხარი, ჩემო კარგო, ყველა
მატყუარა არ არის.

– არ მჯერა, არა და არა! სიმართლით
ამქვეყნად არავინ არ ცხოვრობს! – დაბეჯითე-
ბით იმეორებდა კაცი.

მასპინძელი ზალუ დიდძალი ფარის პა-
ტრონი იყო, წვეული კი ქალაქელი მდიდარი
სოვდაგარი ცალქალა გახლდათ.

– არ მჯერა, თუ არის ქვეყნად ისეთი ადამიანი,
რომელსაც თავის სიცოცხლეში ტყუილი არ უთქ-
ვამს. – ამტკიცებდა სოვდაგარი.

– ჩემო მეგობარო, – უპასუხა ზალუმ, – მე მყ-
ავს მთავარი მწყემსი, ლომისა, რომელსაც არასოდეს
ტყუილი არ უთქვამს და არც იტყვის!

მოკამათენი ვერ შეთანხმდნენ და სანაძლეო დადეს:
თუ მართლა აღმოჩნდებოდა, რომ ზალუს მთავარ მწყემსს
ტყუილის თქმა არ შეეძლო, სოვდაგარის მთელი ქონება
მასპინძელს გადაეცემოდა, ხოლო თუ არა, ცხვრის ფარა
სოვდაგარისა გახდებოდა. ასე დაშორდნენ ერთმანეთს
ზალუ და ცალქალა.

ელისაბედსა და საბას ბებია ყოველთვის სიმართლის
თქმას ასწავლიდა. ამ ამბით ისინიც დაინტერესდნენ და
დასასრულისთვის დალოდება გადანყვიტეს, მანამდე კი
მასპინძელ ბავშვებთან გაერთნენ. მეორე დღით დაემშ-
ვიდობნენ – ქალაქში გასეირნება მოიმიზეზეს და სოვდაგ-
არის სახლისაკენ უჩინრად გაემართნენ (გეთანხმებით,
სხვისთვის ჩუმად ყურის გდება არაეთიკურია, მაგრამ
ისიც ხომ ჭეშმარიტებაა, რომ თუ საქმეს სჭირდება, თუ
სიმართლის დადგენაში გვეხმარება, თვალთვალი, ძიების

მიზნით, გამართლებულია). მოისმინეს, როგორ ამცნო ცალქალამ საკუთარ მეუღლეს, ზალუს საძოვრებზე რომ უნდა წასულიყო.

ზალუს ვრცელი საძოვრები ქალაქიდან არცთუ დიდ მანძილზე, კოინდარეთის ველზე, გადაშლილიყო. მინდორს სერი ებმოდა, სერს – მინდორი, მინდორს – წყარო. ირგვლივ ხასხასა ლორთქო ბალახის სურნელი იდგა. გაშლილი ცხვარი სიმწვანეში განოლილ თეთრ ტბას ჰგავდა. ფარას ბომბორა ქართული ნაგაზები, რიგითი მწყემსები და წაბლისფერ ცხენზე ამხედრებული, მუდამ კომბალმომარჯვებული მწყემსმთავარი ლომისა დარაჯობდნენ.

ცხვარს კოინდარეთის იალაღებზე რომ გაშლიდნენ, ზალუ ხშირად დახედავდა ხოლმე: მოიკითხავდა ლომისას, საჩუქრებსაც მიართმევდა ღირსეული მსახურებისათვის და აუცილებლად მიეაღერებოდა ფარის წინამძღოლ თხას (ლამის პატრონის ასაკისა რომ გახლდათ), რომელიც ძალიან უყვარდა.

ფარის წინამძღოლი თხა მართლაც რომ მომხიბლავი



სანახავი იყო, დიდრონი, ერთმანეთზე გადაჯვარედინებული რქებით, ჭკვიანი თვალებით, დარბაისლური წვერით... სხეულს უმშვენიერესი, აბრეშუმით ფუმფულა და უთერთრესი ბალანი უფარავდა. დინჯი სიარული და მიხვრამოხვრა მის სილამაზეს მეტ შნოსა და ლაზათს მატებდა. თან ძალიან ყურადღებიანი გახლდათ – ერთი ცხვარიც არ დაეკარგებოდა ფარიდან, ყველა მის ნაკვალევს მისდევდა. ყოველივე ამის გამო ის პატრონს გამორჩეულად უყვარდა და მწყემსმთავარიც თვალისჩინვით უფრთხილდებოდა.

სანაძლეოს დადების შემდეგ სოვდაგარმა ცალქალამ რამდენიმე ლიტრი ღვინო და მდიდრული პურ-მარილი ჩაალაგა კალათში, გაიყოლა ორი თანაშემწე და მწყემსმთავარს იალაღზე ესტუმრა. როგორც ვიცით, მას არ სჯეროდა პატიოსნების და მწყემსმთავრის გამოცდასურდა.

ელისაბედი და საბა, ჯადოსნური ბეჭდის წყალობით, სოვდაგარს უჩინრად თან გაჰყვნენ. რაც შემდეგ მოხდა, ყველაფერი იხილეს.



კონდარეთი

მწყემსმთავარმა ის იყო, ფარა დააბინავა, რომ ცალქელას მისვლა შეატყობინეს. ლომისას გაუხარდა პატრონის მეგობრის სტუმრობა (ნამდვილი მიზეზი, რა თქმა უნდა, არ იცოდა). მაშინვე დამხმარე მწყემსს მსუქანი ცხვარი დააკვლევინა და უგემრიელესი კერძი მოამზადა. სტუმრებმაც ამოლაგეს საკუთარი საგზალი. სუფრა ხის ჩრდილქვეშ, წყაროს პირას, გაშალეს. სოვდაგარი ლომისას ღვინოს აძალეზდა და აძალეზდა, აძალეზდა და აძალეზდა. მწყემსმთავარი უარობდა, მაგრამ მორიდების გამო დროდადრო თანხმდებოდა. მეტად რომ დათვრა, სტუმარმა უთხრა:

– თუ ჩემი პატივისცემა მართლა გინდა, ფარის წინამძღოლი თხა დამიკალი!

– ო, არა, ამას ვერ ვიზამ! – გაასავსავა ხელები მწყემსმთავარმა, – ჩემს პატრონს იგი მთელს ფარას ურჩევნია და როცა მოვა, რა პასუხი გავცე?!

– მოატყუე, უთხარი, რომ მგელმა დაგლიჯა! – დაარიგა ცალქელამ.

ლომისა დიდხანს უარობდა და უარობდა. სოვდაგარი არ ეშვებოდა, კვლავ ღვინოს აძალეზდა, თან თხის დაკვლას სთხოვდა და სთხოვდა; ცდილობდა, ათასგვარი ხერხით გაებრუებინა.

ბოლოს და ბოლოს უაზროდ მთვრალი ლომისა დათანხმდა – თხა დააკვლევინა... მალე ახალი მწვადებით დამშვენდა სუფრა...





სოვდაგარი და მისი მხლებლები
წავიდნენ. გაღეშილ მწყემსმთავარს
დაეძინა... გამოფხიზლებული ლომისა
მიხვდა საკუთარ შეცდომას და საშინ-
ლად შეწუხდა: რა ეთქვა პატრონისთვის?!.

მინდორში გაიჭრა, მინაში ჯოხი ჩაარჭო,
საკუთარი ნაბადი მოასხა, ქუდი დაახურა. თავი კი
პატრონად წარმოიდგინა. მივიდა ჯოხთან, მიესალმა:
– გამარჯობა, ჩემო მწყემსო, როგორ ხარ, რო-
გორ არის ჩემი ფარა და მისი წინამძღოლი?!

– გამარჯობა, ჩემო ბატონო – თქვა მანვე, – მეც კარგად
ვარ და შენი ცხვარიც, მაგრამ თხა წუხელ მგელმა მომტაცა!...

ასე გაიმეორა რამდენიმეჯერ, მაგრამ სიცრუე საში-
ნელ ტკივილს აყენებდა მკერდის არეში, მუცელში კი
ისეთ ჭვალს გრძნობდა, თითქოს ხანჯალი დაუტრიალე-
სო. ყოველ ცდაზე სახეს სირცხვილის აღმური უწვავდა,
თავი თითქოს საცაა უნდა გასკდომოდა... შვება მხოლოდ
მაშინ იგრძნო, ჩვეული სიმართლის თქმა რომ გადაწყვი-
ტა!.. პატრონის მოსვლას დაელოდა.

ზალუ მოვიდა. თბილად მიესალმა და ყველა მოიკითხა.

– გაგიმარჯოს, ჩემო ბატონო! – დაიწყო აღელვებ-
ულმა ლომისამ და თვალები ცრემლით აევსო, – ცხვარი
უვნებელია, მე კი – ძალიან შერცხვენილი და შეწუხე-
ბული!... წუხელ შენი მეგობარი ორი მხლებლით მენვია.
კარგი პატივი ვეცი – შენ რომ გეკადრებოდა, ისეთი...
იმათ კი, სამწუხაროდ, ჩემი გადაჭარბებულად დათრო-
ბა მოახერხეს, შემაცდინეს და შენი საყვარელი თხა და-
მაკვლევინეს!... თან დამარიგეს, რომ შენთვის ტყუილი
მეთქვა – თითქოს შენი წვერცანცარა მგელმა მომტაცა!...
სიცრუეს ხომ იცი, ვერ ვიტანდი და ვერ ვიტან, ახლაც
ვერ ვიკადრებ!... აი, ასეთი მარცხი მომივიდა და ახლა,

როგორც გენებოს, ისე დამსაჯე, ღირსი ვარ!...

პატრონს გული ძალიან ეტკინა, მაგრამ ლომისას სიმართლემ სიმშვიდე მოჰგვარა, აღარ გაუწყრა:

– შენს სიმართლეს გაუმარჯოს! მაღლობელი ვარ! წინამძღოლი თხა გაიზრდება! შენ კი შენი ქცევით კიდევ უფრო ამალღდი ჩემსა და ჩემი ოჯახის თვალში! თანაც ცალქელას უზარმაზარი ქონება მომაგებინე! მთელი ჩემი ფარა შენთვის მიჩუქნია!

ზალუ ლომისას, როგორც თანატოლს, ისე გადაეხვია. ამის შემსწრე ელისაბედმა და საბამ ტაში შემოჰკრეს! პატრონმა და მისმა მხლებლებმა გაკვირვებით მიმოიხედეს. დამალვა საჭირო აღარ იყო და ბავშვები ხილულნი გახდნენ. უფროსებმაც აღტაცება ვერ დამალეს და სიხარულის ყიჟინა დასცეს (მათ ხომ ბეჭდის არსებობის შესახებ არაფერი იცოდნენ!) ერთმა მწყემსმა დოლი მოარბენინა, მეორემ – სალამური; წრე შეკრეს და მხიარული ცეკვა-თამაში გამართეს. მერე ზალუს სახლში გაემართნენ, ოჯახის დიასახლისსა და ბავშვებს ყველაფერი უამბეს.

მეორე დღით, როცა კაშკაშა მზე მუხის წვერებზე შემოდგა, ჩვენი პატარა მოგზაურები, ძალამომატებული და კმაყოფილნი, რომ ტყუილს მართლა მოკლე ფეხები აქვს, გზას მხნედ გაუდგნენ.



ცაცხვისანი

ცაცხვის ყვავილის საოცარი, დამათრობელი სურნელი მოჰქონდა ნიავს. მალე ცაცხვების ტყეში აღმოჩნდნენ. ჩიტები, პეპლები, ფუტკრები ნექტარს ენაფებოდნენ. საოცრად სუფთა, ჟანგბადით სავსე, ზომიერად ნოტიო ჰაერი ისე ეამათ, რომ კარგა ხანს ისხდნენ და ხარბად ისუნთქავდნენ...

სმენას ცხენების ფლოქვების ხმა მისწვდა. ხეებს შორის დიდებული გარეგნობის, მეფურად გამოწყობილი, ახალგაზრდა კაცი გამოჩნდა. შორიახლოს ნაზირ-ვეზირები მიჰყვებოდნენ, მსახურები საუკეთესო ჯიშის მწევარ-მეძებრებს ძლივს აოკებდნენ.

ვაჟმა ბავშვები შენიშნა, ხელი ჩამოართვა და მათ გვერდით, აყვავებული ცაცხვის ძირში, დასასვენებლად ჩამოსხდომა ბრძანა.

ელისაბედი და საბა გამოესაუბრნენ, საკუთარი ვინაობა გააცნეს, მერე უფლისწულის წარმომავლობითა და თავგადასავლით დაინტერესდნენ.

ყმანვილი კაცი, სახელად დევგულა, სკანიეთის მეძვეი-დრე აღმოჩნდა. ნადირობის დიდი ტრფიალი და გაბედუ-




ლი ვაჟკაცი არავითარ ფათერაკს არ უფრთხოდა: მდაბიურად გადაიცვამდა, წამოიკიდებდა მშვილდ-ისარს, ხანჯალს წელზე შემოირტყამდა, შეახტებოდა საყვარელ რაშს და ქვეყნის განაპირა კუთხეებსა და საზღვრებს იქითაც მოგზაურობდა, ნადირობდა.

მამა-მეფე ერთი წელია, გარდაცვლილია. სიკვდილის წინ შვილისათვის უთხოვია:

– ტახტიცა და სახელმწიფოც შენია და როგორც გინდა, ისე მართე. მჯერა, გონიერი მმართველი იქნები. ისიც ვიცი, ნადირობას არ მოიშლი, მაგრამ თხოვნა შემისრულე: დასავლეთით არ ინადირო!

შვილმა გამზრდელი მეფური პატივით დაკრძალა და სახელმწიფოს მართვაც დიდებულად დაიწყო. მამის გარდაცვალების წლისთავი რომ გადაიხადა, აიყოლა ნაზირ-ვეზირები და სანადიროდ გაემართა. ყველა მხარე მოიარა, უხვად ინადირა. ნადავლი, რომ არ გაფუჭებულიყო, შინ გაგზავნა. შედეგით ძალიან კმაყოფილი დარჩა: მთელს სასახლეს ეყოფოდა ხორცი და ტყავი, მაგრამ ვერ ისვენებდა – დასავლეთში ნადირობის სურვილი ვერა და ვერ ჩაიკლა! აი, ახლა იქით აპირებდა წასვლას, მათ რომ შეხვდა. ელისაბედსა და საბასაც შესთავაზა გაყოლა, როცა გაიგო, რომ თავგადასავალს ეძებდნენ! ბავშვები სიხარულით დაეთანხმნენ. ჯერ ერთი, რამდენ რამეს ნახავდნენ და ისწავლიდნენ! მეორე – ახალგაზრდა მეფე მამის ანდერძს არღვევდა, ვინ იცის, რა მოელოდა და განსაცდელში ხომ არ მიატოვებდნენ?!



პარდიზენი

კომპასი მოიმარჯვეს და დასავლეთისაკენ გადაუხვიეს. შევიდნენ ქვეყანაში, რომელსაც ვარდიფენი ერქვა. იგი, ძირითადად, მთა-გორიანი გახლდათ, მაგრამ მთებს შუა, წყალუხვი მდინარეების ორივე მხარეს, არაჩვეულებრივი დაბლობები გაშლილიყო, საოცრად აყვავებული, აფერადებული და, რაღაც განსაკუთრებული – ნითელი, ყვითელი, ვარდისფერი, შავი, ლურჯი, ჭრელი – ვარდებით ასურნელებული! საოცარი სანახაობა ატკობდა თვალს! ამ ნალკოტს ენაცვლებოდა ხშირი ტყეები, რომლებიც მერე მთებსაც აუყვებოდა, კალთების ძირიდან მწვერვალებამდე.

დიდხანს იარეს, თუმცა, დაღლა არც უგრძნიათ, რადგან ასეთი მშვენიერი ბუნების ნაწილი გახდნენ!

უცხად დევგულამ მთის წვერზე საოცარი ნათება შენიშნა. სინათლე თვალს ჭრიდა და დიდხანს ვერ შეძლეს რაიმეს გარჩევა. მზე რომ მცირედ გადაინვერა, ბროლის კოშკი დაინახეს. ვაჟმა აიჩემა, უნდა ავიდე, გული მიგრძნობს, საინტიერესო რამეს გადავანყდებითო. ვეზირებმა განზრახვა არ მოუწონეს, მაგრამ ახალგაზრდა ხელმწიფემ, როგორც ყოველთვის, თავისი გაიტანა. თანმხლებთა უმრავლესობა კარავში დატოვა, სამი რჩეული ვაჟკაცი შეარჩია, ცხენები შეაკაზმინა, ბავშვები თავად შემოისვა უნაგირზე და მთის ფერდობს შეუყვა.

კოშკის კარი დაკეტილი დახვდათ. კარზე ეწერა:

„შემოხვალ, ინანებ, არ შემოხვალ – ინანებ!“

– რაკი ორივე სანანებელია, შესვლას ვამჯობინებ. – ბრძანა ვაჟმა, – იმას

მაინც გავიგებ, შიგნით რა არის?!

– თქვა და კარი შეაღო. მცველთა-



გან ერთი მარჯვენა მხარეს დაუდგა, მეორე – მარცხნივ, მესამე – ზურგს უკან. ელისაბედი და საბა, უჩინრადქცეულნი, შეჰყვნენ.

დევგულა შევიდა თუ არა, ორმოცი ხმალამოღებული გოლიათი შემოერთყა! მცველები თვალის დახამხამებაში გაუკოჭეს და ჩამოაშორეს, ხოლო მას მკლავებში ჩასჭიდეს ხელი და რვა ოთახი გაარბენინეს, მეცხრეში შეიყვანეს. ტახტზე მზეთუნახავი ქალი იჯდა. თვალის დაუხამხამებლად სადღაც, სივრცეში, იყურებოდა. უკვე ერთი თვეა, თურმე, ასე დუმდა!.. დამხვდურებმა დევგულა ქალის წინ დააყენეს და უთხრეს:

– თუ მეფის ასულ მთოვარისას სამჯერ ხმას ამოაღებინებ, ცოლად შეგერთავენ და სამეფოსაც მოგაკუთვნებენ, თუ არა, თავს წაგაცლიან და ფანჯრიდან გადაგაგდებენ!

დალონდა ახალგაზრდა კაცი, მაგრამ ყურში უჩინარი ბავშვების ხმა რომ ჩაესმა, დაიმედიანდა:

– ნუ გეშინია, დაგეხმარებით. ჩვენი ბეჭედი გვასწავლის რა ვქნათ; დათანხმდი!



- კარგი, - უპასუხა ვაჟმა მოძალადეებს. მხოლოდ თქვენ მოშორებით დადექით.

მზეთუნახავის მცველები კარებთან დადგნენ, ფეხები განივრად გაალაჯეს და ხმლიანი ხელები გულზე გადაიფვარდინეს. დევგულა მზეთუნახავს მიუჯდა. უჩინარი ბავშვები გვერდით მოთავსდნენ. ელისაბედმა ყურთან მიუტანა ბეჭედი. ამ უკანასკნელმა ლაპარაკი დაიწყო ისე, რომ მხოლოდ ვაჟს ესმოდა და მერე ხმამაღლა უმეორებდა დამუნჯებულ ქალს:

- ერთი დედაკაცი გზაზე მიდიოდა, თან მეუღლე და შემთხვევით დამგზავრებული კაცი ახლდა. ტყის პირას შემოალამდათ. უცხო თანამგზავრი საჭმლის საშოვნელად წავიდა. გზაზე ყაჩაღებმა გაძარცვეს და წინააღმდეგობის განევის გამო თავი წააცალეს. რომ დაავიანდა, ქალის ქმარი წავიდა. მასაც იგივე ბედი ეწია. ამასობაში გათენდა. კაცები რომ არ დაბრუნდნენ, ქალი საძებრად გაემართა. თავნაცლილები რომ იპოვა, მუხლები მოეკვეთა, აღაპყრო ხელი და მწარედ აქვითინდა.

ჯაგებიდან თავის ბახალა გამოძვრა და დალუპულთა სისხლის ლოკვა დაიწყო. ქალი გაბრაზდა, ქვა ესროლა და მოკლა. დედა თავი გამოვარდა, ქალს წყევლა-კრულვა დაუწყო. მერე იქვე მისუნსულ-მოსუნსულდა, ბალახი მოგლიჯა, შვილს მიუსვ-მოუსვა და გააცოცხლა. დედა-

შვილი წრუნუნით შევარდნენ ბარდებში. ქალს ამის დანახვაზე იმედი მიეცა, მოგლიჯა იგივე ბალახი, მიუსვ-მოუსვა ქმარსა და კაცს და გააცოცხლა, მაგრამ ვაი, უბედურება! თავები და ტანები აერია!

- მზეთუნახავო მთოვარისა, რომელს უნდა დარჩეს ქალი ცოლად?!



– რა თქმა უნდა, იმ ტანის პატრონს, ვის მკერდშიაც ქმრის მოსიყვარულე გული ძგერს! – წამოიძახა მეფის ასულმა.

ქალიშვილმა ხმა ამოიღო! – მთელს სასახლეს მოედო სასიამოვნო ამბავი და ყველა დარბაზს მიანყდა! სმენად იქცნენ! დევგულას გაუხარდა და უფრო თამამად განაგრძო ბეჭდის ნაკარნახევი მეორე ამბავი:

– ღურგალი, მკერავი და მღვდელი ერთად მიდიოდნენ. ტყეში დაულამდათ. მხეცების დასაფრთხობად ცეცხლი დაანთეს და კოცონთან ღამისთევა რიგრიგობით გადანყვიტეს. მოილაპარაკეს, ორმა დაიძინოს და მესამემ იფხიზლოსო.

კოცონის მეთვალყურეობა პირველად ღურგალს ერგო. მღვდელმა და მკერავმა დაიძინეს.

ღურგალს გაუჭირდა უქმად ყოფნა და ხისგან ქალი გამოთალა; ძილი რომ მოერია, ხეზე მიაყრდნო. მკერავი გააღვიძა და ცეცხლის მოვლა გადააბარა.

მკერავმა ცეცხლს მორები შეუკეთა, მერე ხის ქალი შენიშნა და უსაქმურობისაგან რომ არ დაძინებოდა, კაბა შეუკერა. მორიგეობის დრო რომ დაუსრულდა, ქალი მანაც ხეზე მიაყრდნო და მღვდელი გააღვიძა.

მარტოდ დარჩენილმა მღვდელმა ტანსაცმლიანი ხის ქალი რომ დაინახა, უსიცოცხლო არსება შეეცოდა, მხურვალე ლოცვით უფალს შეევედრა – სული შთაბერეო. ღმერთმა ისმინა და გააცოცხლა. ქალმა მღვდელს დაუჩოქა და ღვთის სახელით კურთხევა სთხოვა. მოძღვარმა ჯვარი გადასახა.

– მზეთუნახავო მთოვარისა, ვინ შექმნა ქალი, ღურ-



გალმა თუ მღვდელმა?!

– რა თქმა უნდა, ვინც სული შთაბერა! – უპასუხა ქალმა, თუმცა თვალი კვლავ სივრცისათვის ჰქონდა მიპყრობილი. მთოვარისას ოჯახის წევრებსა და მსახურებს ნანატრი ღიმილი გამოესახათ სახეზე.

ჭაბუკმა კიდევ უფრო გაიხარა და ბეჭდის ნაკარნახევი მესამე ამბავი განაგრძო:

– გზაზე სამი კაცი მიდიოდა: გულთმისანი, ფეხმარდი და ექიმი. გულთმისანმა თქვა: ჩვენი ხელმწიფის ქალიშვილი ავად გამხდარა და ენაჩაგდებული ზისო.

– გადავარჩენდი, მაგრამ იქ როდის მივალ?! – დაინტერესდა ექიმი.

– მე მიგიყვან ქარის უსწრაფესად! – უპასუხა ფეხმარდმა და მხრებზე შესმული ექიმი თვალის დახამხამებაში სასახლეში მიიყვანა. ექიმმა სწეულს საკუთარი რეცეპტით დამზადებული წამალი დააღვინა და გამოაჯანმრთელა.

– მზეთუნახავო, ის ავადმყოფი შენა ხარ, მკურნალი კი – მე! ვის ეკუთვნის?! – ჰკითხა ვაჟმა ქალიშვილს.

– რა თქმა უნდა, შენ! – წამოიძახა მთოვარისამ და სანოლიდან წამოდგა, დევგულას ხელი ჩასჭიდა:

– შენ ხარ ჩემი მშველელი, ჩემი ბედი და იღბალი, სადაც გასურს, იქ წამოგყვები!

მაღე მათს სიხარულს მთელი სასახლე შეუერთდა. დევგულამ მზეთუნახავი მთოვარისა საკუთარ სახელმწიფოში წაიყვანა; მერე იმისი სამეფოც შეიერთა და ისეთი ქორწილი გადაიხადა, იმ მხარეში ჯერ არავის ენახა და სხვა ქვეყნებშიაც გაოცებით ჰყვებოდნენ. ელისაბედი და საბაც, რა თქმა უნდა, ქორწილს ამშვენებდნენ.

სატულეთი


სკანიეთიდან წამოსული ელისაბედი და საბა საოცარი ფერების ყვავილთაგან მოქარგულ სატულეთის მინდორში აღმოჩნდნენ. ჭრელი პეპლები ხან ერთ, ხან მეორე ყვავილს სტუმრობდნენ; შრომისმოყვარე ფუტკრები ნექტარს ენაფებოდნენ; ათასგვარი ჩიტი ჭიკჭიკებდა. მოკლედ, კიდევ ერთ ნამდვილ წალკოტში შეაბიჯეს... ღმერთო, რა ლამაზია ჩვენი დედამინა?!...

წყაროსთან ცხრა ვაჟი შენიშნეს. ცხრავე ერთმანეთზე უმშვენიერესი და უღონიერესი ჩანდა. ცხრავეს მწუხარება ეტყობოდა სახეზე. მოგზაური ბავშვები მაშინვე დაინტერესდნენ მათი ვინაობით და მიუახლოვდნენ. ყველანი ერთმანეთს მიესალმნენ და, როგორც ხდება ხოლმე, საკუთარი ამბავი გამოჰკითხეს.

ძმები – ქიტესია, ვეფხია, ჯარჯი, ამირინდო, ქარისა, მეხისი, მკვირცხლა, ბანდურა და ხუთკუნჭულა – ახალდაობლებულნი, ძალიან ღარიბი ოჯახის შვილები იყვნენ. მართალია, არც ძალ-ღონე აკლდათ, არც – სიბეჯითე, მაგრამ სოფელს კაციჭამია დევი დაჰატრონებოდა. მთელი სოფლის ნაშრომიც მას მიჰქონდა და სოფლის მკვიდრ ახალგაზრდებს, ყოველდღე სამ-სამს: დილით, შუადღისას და საღამოს – სანსლავდა! მოსწონდა, თურმე, ადამიანის ხორცი ცხოველისაზე უგემრიელესიაო, – თუმცა, ნადირზეც არ ამბობდა უარს.

იმუამად დევი ტყეში წასულიყო. ბიჭები წყაროსთან სათათბიროდ შეიკრიბნენ (მეტის მოთ-





მენა აღარ შეეძლოთ) და ბჭობდნენ, როგორ მოემორებინათ დევი! როგორ ეხსნათ სოფელი! ელისაბედი და საბა შეაძრწუნა ძმების ნაამბობმა. რა თქმა უნდა, დახმარება გადანყვიტეს. სანრაფოდ მიმართეს ბეჭედს, აკოცეს, დახმარება სთხოვეს. ბიჭებიც შემოიკრიბეს და სმენად იქცნენ. ბეჭედი ცოტა ხნით დუმდა, მერე ლალისფრად ავარვარდა და გეგმა გააცნო. ბიჭებმა ყველაფერი ზუსტად დაიმახსოვრეს. ელისაბედი და საბა უჩინარნი გახდნენ, თან გაჰყვნენ ძმებს. ძმები დევის სასახლის უზარმაზარ გალავნიან ეზოში შევიდნენ. ათსართულიანი შენობა ოქროვერცხლით, უძვირფასესი ხითა და მარმარილოს ნარევით იყო ნაგები. ერთ კუთხეში ცას მიბჯენილი კოშკი კაშკაშებდა მზის სხივებში; (სასახლე იმ ქვეყნის ხელმწიფისათვის ნაურთმევია დევს, თორემ მას ასეთი ნატიფი გემოვნება როდი ჰქონდა, რომ მსგავსი ნაგებობა აეშენებინა). ეზოში უამრავი მსახური საქმიანად მიმოდიოდა. ყველას ძრწოლა და ნაღველი ეწერა სახეზე... ძმებმა მსახურთუხუცესი მოძებნეს და სამუშაო სთხოვეს. მსახურთუხუცესს მათი მისვლა გაუხარდა, რადგან დევისაგან შეშინებული ახალგაზრდა მსახურები წარამარა გარბოდნენ. აღმოჩნდა, რომ მეჯინიბეები სჭირდებოდა და ცხრავე სიამოვნებით აიყვანა სამუშაოდ.

ვაჟები დევის უზარმაზარ საჯინიბოში შევიდნენ. ერთმანეთისაგან ტიხრით გაყოფილ სადგომებში საუკეთესო ჯიშის ცხენები ება. ზოგი ჭიხვინებდა, ზოგი ქშენდა და დაბერილი ნესტოებიდან ოხშივარს უშვებდა, ზოგი ჩაღას ახრამუნებდა. ნინ ყველას სურნელოვანი თივა ეყ-

არა; ფილაქნის სადინარით მათთვის სასმელად განკუთვნილი წყალი მიედინებოდა. რაშების თავს ზემოთ, გრძელ თაროებზე, თივის ოთხკუთხედი შეკვრები ელაგა. ყველგან და ყველაფერში ჩანდა, რა ჭკვიანი და საქმის მცოდნე მმართველი იყო დევის მსახურთუხუცესი. აბა, კაციჭამიას მეურნეობის უნარი ვინ მისცა!

ცხრა ძმა მაშინვე შეუდგა საქმეს. ცხენები დაანაყრეს, დავარცხნეს და გაასუფთავეს. ის იყო, გარეთ სასეირნოდ გაიყვანეს, რომ უცბად მინამ ზანზარი დაიწყო. ყველა მიხვდა – დევი ბრუნდებოდა! მალე შემოალაჯა კიდეც ეზოში. მხრებზე კისერგამოლადრული ირმები და ჯიხვები შემოეწყო, იღლიებში შვლები ამოეჩარა. ყველაფერი ეზოში მდებარე სამზარეულოს წინ დაყარა. ნანადირევის გორა დადგა. ბრძანა, ვახშამი მიერთმიათ (შემწვარ-მოხრაკული მოინდომა „ბიჭმა!“) და ხვნიშით წამოწვა მუხის ჩრდილში. მზარეულები სასწრაფოდ დატრიალდნენ. მსახურებმა სუფრა გაშალეს. დევმა როცა საჭმელს მუსრი გაავლო, ნარჩენები მსახურებს მიუყარა. მერე უცნობი ჭაბუკური სახეები რომ შენიშნა, ვინ არიანო, იკითხა. შენი ახალი მეჯინიბეები გახლავთო, – მოახსენეს. შეათვალაიერა და მოეწონა: ძვალ-რბილი თანაბრად აქვთ განვითარებული, ახალგაზრდების ხორცი კარგი ლუკმააო, – გაიფიქრა, მაგრამ არაფერი შეიმჩნია, რომ სხვებს არ შეენიშნათ, არ შემინებოდათ, არ გაქცეულიყვნენ და უმსახურებოდ არ დარჩენილიყო.

დაღამდა. ყველა დასაძინებლად დაწვა. ელისაბედი და საბა ძმების ოთახში მოთავს-

დნენ. რვა ძმამ დაიძინა. მეცხრე- ხუთკუნჭულა, ფხი-
ზლობდა, რადგან გული და გონება სიფრთხილისაკენ
მოუწოდებდა.

არ ეძინა დევსაც. წრიალებდა ლოგინში – თვალწინ

არაჩვეულებრივი აღნა-
გობის ყმანვილები ედგა
და ტუჩებს მსუნაგად
ილოკავდა, მუცელზე
ხელს ისვამდა. ბო-

ლოს ველარ მოითმინა და ძმების საწო-
ლი ოთახის კარზე ფრთხილად დააკაკუნა
(არ უნდოდა, სხვა მსახურებს გაეგონათ).

– ძმებო, გძინავთ თუ გღვიძავთ? –
იკითხა დათაფლული ხმით.

– მე მღვიძავს. – უპასუხა ხუთკუნ-
ჭულამ.

– რა არ გაძინებს?! – დაინტერესდა
მასპინძელი.

– შენი ბატების ყიყინი. ასე ზრუნავ
ოჯახის წევრებზე?! – მიუგო ბიჭმა
(როგორც იყო დარიგებული
ბეჭდისაგან).



დევი წამოხტა, საბატეში შევარდა, საბრალო ფრთოსნებს დაუღრიალა – პირის ჩატკბარუნებაში ხელი რატომ შემეშალეთო და ყველა ბატი გადასანსლა! საძინებელში შებრუნდა. ყმანვილების შეჭმის სურვილი უფრო არ ასვენებდა. მალე წამოდგა, კვლავ მივიდა კართან და კვლავ იკითხა:

– ძმებო, გძინავთ თუ გღვიძავთ?!

– მღვიძავს, – მიუგო ხუთკუნჭულამ – შენი ძროხების ფშვინვა არ მასვენებს.

დევი ამჯერად ძროხებს დაერია. სათითაოდ გადაყლაპა. მუცელი დაუმძიმდა და დაწვა. მაინც ვერ მოისვენა – სანადელს როგორ ვერ უნდა მივალნიოო... ისევ ადგა, ისევ მივიდა ძმების კართან და ბრაზი შეიკავა, ხმა, რამდენადაც შეეძლო, გაინაზა:

– ძმებო, გძინავთ თუ გღვიძავთ?!

– მღვიძავს, მღვიძავს! – მიუგო ხუთკუნჭულამ.

– რატომ ვერ იძინებ? – „შენუხდა“ დევი.

– მინდორში შენი ცხენებია დარჩენილი, გუშინღამ შინ არაფრით არ გამოგვყენენ, ახლა ჭიხვინებენ და არ მაძინებენ! – მიუგო ბიჭმა.

დევი გაცოფებული წამოხტა და გავარდა.

ამით ისარგებლეს ელისაბედმა და საბამ და ბეჭდის დახმარებით ბიჭები შორს, მდინარის გაღმა, სხვა სახელმწიფოში, სუფაში, გააპარეს.

გაბრაზებულმა დევმა საკუთარი ცხენები რომ გადაყლაპა, გათენდა კიდევ. ამან ძალიან გააგულისა, რადგან დღისით ვერ შეჭამდა ძმებს, ყველა გაიგებდა! შინ მობრუნებულმა ბიჭების გაპარვის ამბავი რომ შეიტყო, ღრიალი მორთო, ბოლოს რაღას იზამდა, გაჩუმდა, დამარცხებას ხომ არ დაანახვებდა სხვებს?!



სუფა

სუფას დიდმა ბატონმა, გირკიმელმა, ახალგაზრდები სიამოვნებით მიიღო, განსაკუთრებით მას შემდეგ აღფრთოვანდა, რაც დევისაგან თავის დაღწევის ამბავი მოუთხრეს. მალე მთელ სუფაში გავარდა სტუმრების მოხერხებულობის ამბავი. დიდი და პატარა, ქალი და კაცი – პატივისცემით ეპყრობოდნენ. ასეთი ყურადღება შემურდათ გირკიმელის ბოროტ მოადგილეებს. მოისურვეს, ცხრავე მოეშორებინათ თავიდან. ითათბირეს და ძმებისთვის საბედისწერო გადაწყვეტილება მიიღეს. სამწუხაროდ, ბოროტება მუდამ ებრძვის სიკეთეს! ამიტომ მუდამ ფხიზლად უნდა ვიყოთ, გონივრულად ვიმოქმედოთ.

ქიტესა, ვეფხია, ჯარჯი, ამირინდო, ქარისა, მეხისი, მკვირცხლა, ბანდურა უკვდავების წყაროს წყლის მოსატანად გააგზავნინეს ბატონს – თუ მართლა მაგრები არიან, საქმით დაგვიმტკიცონო. განსაკუთრებით ხუთკუნჭულას დალუპვა სურდათ და მისთვის უძნელესი დავალება მოიფიქრეს. ამ მიზნით მივიდნენ გირკიმელთან და მოახსენეს:

– დიდებულო მბრძანებელო, შენი სასახლე და სახელმწიფო ყველაფრით სრულყოფილია! მაგრამ დევის (ვისგანაც გამოიქცნენ ძმები) ოქროსმყრელი თხაც რომ თქვენი იყოს, როგორ გამდიდრდებოდით?!

– მერე ვინ მომიყვანს?! – იკითხა ხარბმა ბატონმა.

– ხუთკუნჭულა, აკი იგი ყველაზე მოხერხებულია?! – შეაპარეს ხელქვეითებმა.




გირკიმელს რჩევა ჭკუაში დაუჯდა და ხუთკუნჭულას თხის მოპარვა დაავალა.


დალონდა ბიჭი. კიდევ კარგი, ელისაბედი და საბა კვლავ მასთან იყვნენ. რა თქმა უნდა, ითათბირეს ბეჭედთან, მისი დახმარებით უჩინარნი გახდნენ. ბეჭდის ძალამ ისინი მსუბუქად აიტაცა და ზღვასავით ვრცელ მდინარე ძუასაზე უვნებლად გადააფრინა. დევის სასახლეში შეიპარნენ (ყოველი კუთხე-კუნჭული ხომ კარგად იცოდნენ), მეგობარი კეთილი მსახურები მალულად მოიკითხეს (რომ კაცოჭამიის მომხრე ავკაცებს არ დაენახათ). მთელი დღე მათთან გაატარეს. დაღამდა. იცოდნენ, რომ დევს თხა საკუთარ საძინებელში შეჰყავდა და ამიტომ მის დაბრუნებამდე, სამივენი, უჩინრადქცეულნი, იქ მოკალათდნენ.

დევი დაბრუნდა, საზარელი სუნი დატრიალდა: იგი ხომ ტანს არასოდეს იბანდა! კიდევ კარგი, ბეჭედი დაეხმარათ და სამივეს საკმევლის სურნელით გაჟღენთილი კედელი შემოეველო.

ბოროტმა გოლიათმა დაიძინა და ისეთი ხვრინვა ამოუშვა, რომ ყურთასმენა აღარ იყო. თხამ იატაკზე დაფენილ ძვირფას ხალიჩაზე მოიკეცა ფეხები, მაგრამ თვალები დაჭყეტილი ჰქონდა – აბა იმ ხმაურში რა დააძინებდა!

ბავშვებმა ხუთკუნჭულას თავი გამოაყოფინეს. თხამ დაინახა და დაიკიკინა. დევი წამოხტა, მაგრამ ვერავინ რომ ვერ შენიშნა, პირუტყვს გაუნყრა და დასაძინებლად დაწვა. ხუთკუნჭულა ასე რამდენჯერმე დამალეს და გამოაჩინეს. ბოლოს გაბრაზდა დევი, გაბრაზდა და, ძილს რატომ არ მაცლიო, თხაკიკინა გარეთ გააგდო. ჩვენიანებსაც ეს უნდოდათ! დაავლეს ხელი პეტელ-





ას, გაუჩინარდნენ და გირკიმელის სამფლობე-
ლოში თვალის დახამხამებაში გაჩნდნენ.

სუფაში საოცრება დატრიალდა: ლანდის
უსწრაფესად გავრცელდა ოქროსმგდებელი
თხის ამბავი. ქალი თუ კაცი, დიდი და პატა-
რა, გონებადამჯდარი თუ ჭკუამხიარული –
ყველა იქით მიისწრაფოდა! გირკიმელმა გაიხ-
არა, თანაც უსაზღვროდ, ხოლო ბატონთბატონის
ხელქვეითები უფრო დაიბოლმნენ. ითათბირეს და კვ-
ლავ შეუჩნდნენ პატრონს:

– დევს უძვირფასესი თვლებით მოქსოვილი
ხალიჩა რომ აქვს, ისიც მოატანინე. ასეთი ნივთი
სწორედ რომ შენი შესაფერია!

ბატონმა ხუთკუნჭულას ბრძანების შესრულება
მოსთხოვა.

ელისაბედმა და საბამ კვლავ გადაიყვანეს ხუთკუნ-
ჭულა დევის სასახლეში. მხეცკაცი სანადიროდ წავიდა
თუ არა, ჩვენმა სამმა მეგობარმა საძინებლის ხალიჩაში
უამრავი ნემსი ამოარჭო.

სალამოს დევი დაბრუნდა. დაძინების წინ ფეხტიტველამ
რომ გაიარა ხალიჩაზე, ფეხის გულელებში ნემსები ერხვლიტა,
გამწარდა და ხალიჩა ფანჯრიდან მოისროლა. და-ძმამ და
ხუთკუნჭულამ ხალიჩას ხელი დასტაცეს და გაუჩინარდ-
ნენ. სუფაში თვალის დახამხამებაში დაბრუნდნენ. გირ-
კიმელი სიხარულისაგან ბავშვივით ხტოდა. ხელქვეითები
საგონებელში ჩავარდნენ... მალე უარესი მოიფიქრეს:

– დიდებულო მბრძანებელო, ხუთკუნჭულა, თუ ასე
მაგარია, დევი მოგიყვანოს! მსახურად დაგიყენოს! აი,
ყველაფერს ეს აჯობებს!

სიხარბე ზოგიერთს სალად განსჯის უნარს უკარგავს, ჭკუასუსტები ადვილად ექცევიან სხვისი გავლენის ქვეშ. ავგულები საკუთარი ინტერესებისათვის ადამიანების განსაცდელში ჩაგდებას არაფრად მიიჩნევენ. ასეთი იყო სუფას ბატონიც და ხუთკუნჭულას ბრძანების აღსრულება შედეგის განუჭვრეტლად მოსთხოვა.

ბებოს ბეჭედმა ახალი გეგმა შეიმუშავა. მისი რჩევით, დურგლის ტანსაცმელში გამონყობილი ხუთკუნჭულა, რომელსაც ხელში ხის საჭრელი იარაღები ეჭირა, დევის ტყეში შევიდა. დევს საკუთარმა შიკრიკმა მის კუთვნილებაში უცნობის გამოჩენა შეატყობინა. მხეცკაცი მივარდა (ვერ იცნო ბიჭი) და შეჰღრიალა:

– ვინა ხარ, როგორ გაბედე ჩემს ტყეში შემოსვლა?! ახლავე შეგახრამუნებ!

– დურგალი ვარ, საუკეთესო ჯიშის ხეების ძებნაში გართულმა აქამდე მოვალნიე. არ ვიცი ვისია, მაგრამ აღფრთოვანებას ვერ ვმაღავ, რა საუცხოო ტყეა! რა ძვირფასი სასკივრე მასალაა!



დევს საკუთარი ტყის ქება ძლიერ ესიამოვნა.

– ხის გარჩევა გცოდნია. კარგი ღურგალიც ხარ? რით გამაკვირვებ?!

– ისეთ სკივრს გავაკეთებ, ისეთ მტკიცესა და მყარს, შენც რომ ვერ გამოამტვრევ!

– ხა, ხა, ხა, ხა!.. – აახმაურა დევმა ტყე – რა უნდა იყოს, მე რომ ვერ გამოვამტვრიო?! ჯერ არ შეგჭამ, გააკეთე!

– თანახმა ვარ, – უპასუხა ხუთკუნჭულამ. სასწრაფოდ შეუდგა საქმეს. დევი იქვე წამოგორდა და ხვრინვა ამოუშვა.

ხუთკუნჭულამ, ბეჭდის დახმარებით, უსწრაფესად შეკრა რკინაზე უმტკიცესი სკივრს კედლები, დევი გააღვიდა და შიგ ჩასვლა შესთავაზა. დევი ხითხითით ჩახტა. ვაჟმა სახურავიც დააჭედა და გამომწყვდეულ გოლიათს მიმართა:

– აბა, თუ ბიჭი ხარ, გახსენი!

დევი აფაფხურდა, აბრაგუნდა, აღრიალდა, მაგრამ ვერა და ვერ გახსნა! ხუთკუნჭულამ ბუმბულივით მოიგდო მხრებზე სკივრი და გირკიმელის სამფლობელოში მიიტანა, ეზოში დადგა; ყველა გარეთ გამოცვივდა. ბიჭმა მსახურები გააფრთხილა – დაიმაღეთო. ახლო მხოლოდ ბატონი და მისი ავი საქმის თანამზრახველები დარჩნენ. მათ სახურავის ახდა მოითხოვეს, აინტერესებდათ, მართლა მოიყვანა თუ არა, დევი. ხუთკუნჭულამ სახურავი ასწია, იმავდროულად, იგი ბეჭედმა უმაღლესი ხის კენწეროზე ააფრინა, თან



ხელში უზარმაზარი ლოდი დააჭერინა; რა თქმა უნდა, უჩინრად ქცეული ბავშვებიც მასთან იყვნენ.

გაცოფებული დევი სკივრიდან ღრიალით ამოვარდა და ყველა სათითაოდ გადასანსლა! ბოლო ლუკმა რომ გადაყლაპა, ხუთკუნჭულას ასძახა:

– მადლობა, ასეთი უხვი სუფრა რომ გამიშალე. ხელი მინდა ჩამოგართვა, მანდ როგორ ახვედი?!

– აი, ეს სანაულმოქმედი ლოდი მივიკარი მკერდზე და ამან ამომაფრინა, თუ გინდა ჩამოგიგდე, – ჩამოსძახა ბიჭმა.

დევს ტანი ჰქონდა დიდი, ხოლო თავი – პატარა, ჭკუა კი- ერთი ბენო. ჰოდა, დაეთანხმა. ხის ქვეშ დადგა და ზევით დაიწყო ცქერა. ხუთკუნჭულამ, ელისაბედმა და საბამ ლოდი ჩამოაგდეს. ბეჭედმა ლოდი კიდევ უფრო დაამძიმა და საშინელი ძალით დაახეთქა დევს. ეს უკანასკნელი უსულოდ ჩაეფლო მიწაში...

ბიჭი და ბავშვები ძირს ჩამოფრინდნენ. სიკეთის ზეიმის დრო დადგა! ხუთკუნჭულას ძმებიც დააბრუნეს. ბოროტი დევისა და ხარბი გირკიმელის სამფლობელოები გააერთიანეს, ცხრად გაანაწილეს. ცხრა მშვენიერ ქალიშვილზე იქორწინეს. იმ დღიდან იმ ცხრა სახელმწიფოს მუდამ ცხრათვალა მზე დანათოდა. ისეთი მოწესრიგებული, შეძლებული, მშვიდობიანი ცხოვრება დაამკვიდრეს ძმებმა, რომ, როგორც რუსთაველი იტყოდა, იმათ სამფლობელოში „თხა და მგელი ერთად ძოვდნენ!“

ელისაბედსა და საბას ცხრავე ეპატიყვე-
ბოდა, დარჩენას სთხოვდა, მაგრამ ბავშვებს
დროის უქმად გატარება არ სურდათ – ისი-
ნი ხომ მოუსვენარი მოგზაურები იყვნენ!
მასპინძლებს დაემშვიდობნენ და გზას
გაუდგნენ.



იათი

ელისაბედსა და საბას იათის ტყეში შემოაღამდათ. ირგვლივ რალაც იღუმალება სუფევდა. უზარმაზარი ფოთლოვანი ხეები ნელა შრიალებდნენ, არა, მხოლოდ კი არ შრიალებდნენ, მუსიკალურ ბგერებს გამოსცემდნენ; მათ ქვეშ, ნახევარი მეტრის დაშორებით, წითელი, თეთრი, ყვითელი, ჩალისფერი, ლიმონისფერი და ჭრელად დაწინწკლული სოკოები მიმოფანტულიყო, ჩვეულებრივი კი არა, ერთი მეტრის სიმაღლისა! ბავშვები გაოცებული შესცქეროდნენ ქოლგებივით გაშლილ სოკოს ქუდებს!...

მზე თანდათან ეფარებოდა ჰორიზონტს... ჩამავალი მენამული სხივები სიმწვანეს უკარგავდნენ ფოთლებს... ყვავილები დასაძინებლად ემზადებოდნენ: ზოგი თავს ხრიდა, ზოგი მთლიანად იკუმშებოდა... ჩიტები ძილისპირულს წყნარად ჟივჟივებდნენ... ცხოველები თანდათან ყუჩდებოდნენ, დაგვიანებულები ძუნძულით მიიჩქაროდნენ ბუნაგისაკენ... ლამის ბინადარნი კი, პირიქით, აქტიური ცხოვრებისათვის ემზადებოდნენ... სრულად რომ დაბნელდა, კიდევ ერთი სასწაულის მოწმენი გახდნენ ბავშვები: ბელურას ზომის ციცინათელები გამოეფინენ! დაფარფატებდნენ ქვევიდან ზევით, ზევიდან – ქვევით, მარცხნიდან – მარჯვნივ,

მარჯვნიდან – მარცხნივ... არაჩვეულებრივი სანახაობა იყო!... მთელი ტყე ციმციმებდა, ბრჭყვიალებდა... ამ ჩუმ საზეიმო ნათებას ლამის რომელიმე ფრინველი თუ დაარღვევდა, ისიც წამიერად...

მშვენიერი სანახაობისგან სლუკუნმა გამოფხიზლა. ხმა განიერი მუხის ფულუროდან ისმოდა. ფრთხილად მი-



უახლოვდნენ, შევიდნენ. გეგონებოდა, ათასი ნათურა ან-
თიანო, ისე გაენათებინათ ციცინათელებს იქაურობაც. იქვე
პატარა გოგონა იჯდა, თავი მუხლებზე დაედო და
ტიროდა... ფარვანები, ციცინათელები, ლამის
ჩიტუნები თავზე დასტრიალებდნენ, ნაზად
ეხებოდნენ... გოგონა მაღლიერების ნიშნად
დროდადრო გაუღიმებდა, ხან ერთს ეალ-
ერსებოდა, ხან – მეორეს, მაგრამ კვლავ
ეტირებოდა... ბიძაშვილ-მამიდაშვილი
ბავშვს ფრთხილად მიუახლოვდა. ათრ-
თოლებულ მხრებზე ხელი მოხვიეს
და დარდის მიზეზი ჰკითხეს. გოგ-
ონამ შვებით ამოისუნთქა, ასეთი
საყვარელი ბავშვები რომ დაინახა,
თბილად მიესალმა და საკუთარი
თავგადასავალი უამბო...

გოგონა, სახელად ბაჩაჩო,
საბურეთის ხელმწიფის მე-
თორმეტე ქალიშვილი





აღმოჩნდა. დედამისი, დედოფალი, მშვენიერი ლუა, მე – 13 შვილს ელოდა. დედამთილი სულ ბუზღუნებდა და დუდღუნებდა: თუ კვლავ გოგოს გააჩენს, სასახლეში ცხოვრებას არ ვაღირსებ და სამუდამოდ გავაძევებო! ხელმწიფეს შეებრალა მეუღლე და უთხრა:

– ნადი, იმშობიარე. თუ ბიჭი გეყოლება, დაბრუნდი; თუ გოგონა – თავს უშველე, არ მობრუნდე, მერე მე თვითონ მოგძებნი!

დამწუხრდა ლუა, მაგრამ რა ექნა! ჩაილაგა სკივრში ტანსაცმელი და აუცილებელი ნივთები; უერთგულესი მხევალის თან გაიყოლა და საკუთარი ეტლით უახლესი ტყისკენ გასწია (ხალხმრავალ ადგილს მოერიდა). ბაჩაჩო მამისა და ბებულის მალულად გაჰყვა, რადგან დედა ძალიან, ძალიან უყვარდა და, ამავე დროს, მეტად გულადი და მოხერხებული გოგონა იყო. იქნებ დედას რამე გაჭირვებოდა!

დედოფალი ლუა ტყის ყველაზე დიდი მუხის ფულუროში დაბინავდა (გარედან გეგონებოდათ ფულურო, თორემ კარგად ნაკვეთი ქვაბული გახლდათ – მუხა კლდეს ეკვროდა, ფულურო კი კარის მოვალეობას ასრულებდა). ლუამ, მხევლის დახმარებით, ცხენები დააბინავა, გამოქვაბულში ფარდები ჩამოჰკიდა, ხალიჩები დააგო, სანოლი გამართა და სანთლები დაანთო.

ერთი კვირა ისე გავიდა, ძეხორციელი არ დაუნახავთ. ბაჩაჩომ დაიჟინა – მოვძებნი, იქნებ ახლომახლო მოსახლე იყოს, რომ დაგვჭირდეს, დასახმარებლად ვუხმობთო...

– ბევრი ვიარე, მაგრამ ვერავის წავაწყდი. დაღამდა კიდევ, ვინ იცის, როგორ ვჭირდები დედას!... აი ამიტომ ვტირი... – დაასრულა სლუკუნით.

ელისაბედმა და საბამ, ჩვეულებისამებრ, დახმარება აღუთქვეს. გოგონას თავგადასავალი ბეჭედს უამბეს და მის რჩევას დაელოდნენ. ბეჭედი გაბრწყინდა და აჩურჩულდა:

– დედოფალი კარგად არის! – ვაჟი ეყოლა, იმედა დაარქვა, ბედისმწერალი უკვე ბიჭის მომავალს ჰქმნის.

– რაო, რა ელის?! – წამოიძახა სამივემ.

ბეჭედმა განაგრძო:

– იმედა ჩვეულებრივი ბავშვი არ იქნება! მეფეს მემკვიდრე ერქარებოდადა და ამიტომ 1 თვის ბიჭი 10 წლისას დაემსგავსება, 2 თვისა – 20 წლისას. მხოლოდ ამის ჩემდეგ იცხოვრებს ჩვეულებრივი რიტმით. ათი წლისა (ანუ, 1 თვისა) სახლის წინ მდებარე ნაძვის ხეზე თუ ავა, ჩამოვარდება და მოკვდება! ამ ფაქტის ცოდნა ბაჩაჩომ რომ გაამჟღავნოს, ქვად იქცევა!

იმედა პირველ განსაცდელს თუ გადაურჩება, როცა თხუთმეტი წლისა გახდება, ცხენის კვიცზე შეჯდება, გადმოვარდება და მოკვდება! თუ ამ ფაქტს ბაჩაჩო გაამჟღავნებს, ქვად იქცევა!

იმედა მეორედაც თუ გადარჩა, ოცი წლისა მშვენიერ ქალიშვილზე დაინიშნება, სიდედრის ნაჩუქარ ტანსაცმელში გველები გაჩნდებიან, დაკბენენ და მოკლავენ. თუ ამ საიდუმლოს გა-



თქვამს ბაჩაჩო, ქვად იქცევა და სამუდამოდ გაქვავებული დარჩება მანამ, სანამ მზის ნაბან წყალს არ გადაავლებენ თავიდან ფეხებამდე! – დაასრულა ბეჭედმა.

ბაჩაჩო დამშვიდდა, მაგრამ ასაკისტვის შეუფერებელი სერიოზულობით ჩაფიქრდა... მერე დასაძინებლად მიწნენ. ჩიტებთან ერთად გაიღვიძეს. წყაროს წყლით პირი დაიბანეს, მარწყვი, ჟოლო და ვაშლი მიირთვეს.

ელისაბედმა და საბამ ბაჩაჩო გააფრთხილეს, საიდუმლო არ გაეცა, თორემ ძმა დაელუპებოდა და თვითონ კი ქვად გადაიქცეოდა! გოგონამ შეჰფიცა.

დედოფლის სადგომს მიაღწიეს. გახარებულმა დედამ ბაჩაჩო გულში ჩაიკრა და ძმის დაბადება მიულოცა. ახალდაბადებული, ოქროსთმიანი, სახენათელი ბიჭუნა ტკბილად ღულუნებდა. ბაჩაჩომ ორივეს (დედასა და ძმას) მიუაღერსა, ახალშეძენილი მეგობრები გააცნო. დედოფალმა ლუამ ბავშვები სასახლეში მიიპატიჟა. და-ძმამ მადლობა გადაუხადა და მოგზაურობის მიზანი გაანდო. მერე ბაჩაჩო ცალკე გაიხმეს და კიდევ ერთხელ შეახსენეს, როგორ მოქცეულიყო. ელისაბედმა ბეჭდის ერთი პანანინა თვალი ამოიღო, გოგონას მისცა და უთხრა;

– თუ დახმარება დაგჭირდება, ამ თვალს მიმართე, ჩვენი სახელი ახსენე და შენთან გავჩნდებით!

ბაჩაჩომ მხურვალე მადლობა გადაუხადა ბიძაშვილ-მამიდაშვილს და დაემშვიდობა, რაკი მიპატიჟებაზე უარი თქვეს.

ელისაბედი და საბა მაშინვე პონტოსაკენ მიმავალ გზას დაადგნენ (იქით მუდამ მიუხაროდათ, რადგან საყვარელი ბებია კოლხეთში იყო გაზრდილი).

ბური

ბაჩაჩო, დედოფალი ლუა, იმედა და მხევალი სასახლისაკენ გაემართნენ. ხელმწიფის სიხარულს საზღვარი აღარ ჰქონდა. დედამთილიც, დიდი დედოფალი, დანყნარდა. სასახლე და მთელი გურიეს სამეფო ზეიმობდა.

გავიდა ერთი თვე. იმედა მართლა 10 წლისას დაემსგავსა. მეფემ ვაჟის დაბადების დღისათვის მზადება ბრძანა. ყველა ჩაერთო სამზადისში. დიდმა და პატარამ იცოდა საკუთარი საკეთებელი რა იყო და გულმოდგინედ, სიამოვნებით ასრულებდა, რადგან მეფესა და მის ოჯახს ძალიან აფასებდნენ. ბაჩაჩომ იმედა ეზოში მდგარ ნაძვის ხესთან დაინახა და საშინელი ნაწინასწარმეტყველი გაახსენდა. მაშინვე „გულნასული“ დაეცა (თავი მოიავადმყოფა). მშობლები მიცვივდნენ, ექიმები დაასიეს, მაგრამ ვერაფერი უშველეს, გოგონა ისევ „ცუდად იყო“.

ბაჩაჩომ, როგორც იქნა, თვალი გაახილა და მამას უთხრა:


– ნუ აწვალე ექიმებს, ჩვენი სასახლის წინ რომ ნაძვის ხეა, მოაჭრევინე და მეც მოვრჩები.

– შვილო, ოღონდ შენ იყავი კარგად და, თუ გინდა, სხვა ხესაც მოვაჭრევინებ! – შეჰპირდა ხელმწიფე.

მეფემ სიტყვა შეასრულა. ბაჩაჩო ლოგინიდან სრულიად ჯანმრთელი ნამოდგა.

ოჯახი ბედნიერ დღეებს ითენებდა და ილამებდა...





უფლისწულ იმედას საცაა თხუთმეტი
წელი შეუსრულდებოდა. იზრდებოდა მეფის
საუკეთესო კვიციც. იგი ისეთი მშვენიერი,
ცქვიტი და მარდი იყო, კაცის თვალი უკეთ-
ესს ვერ ნახავდა! იმედას გაგიჟებით უყვარდა;
ასუფთავებდა, ვარცხნიდა, წყალს

ასმევდა, აჭმევდა, ასეირნებდა, ეალერსე-
ბოდა, მოკლედ, გვერდიდან არ იშორებდა. მალე
კვიცი უკვე ისე გაძლიერდა, რომ გაჭენება შეიძლე-
ბოდა.

ბაჩაჩომ მაშინვე მოიავადმყოფა თავი. კვლავ
დაასიეს ექიმები, მაგრამ ვერაფერი გაუგეს, ვერ
უშველეს. ქალიშვილმა მამა დაიბარა და სთხოვა:

– თუ ჩემი გადარჩენა გინდა, კვიცი გააჩუქე, გინ-
და, გაყიდე, ოღონდ სასახლიდან მოაშორე!

ხელმწიფეს გული ეტკინა – ის ხომ ასე ეძვირფასე-
ბოდა იმედას! გაკვირვებაც ველარ დამალა და ჰკითხა:

– ძმაზე გიჟდები, ეს კვიციც გიყვარს, გულთბილი და
გულმონწყალე ხარ. ასეთი უცნაური სურვილი რამ გაგიჩ-
ინა?!

– მამილო, მე უფრო გედარდები, თუ კვიცი?! – იწყ-
ინა ბაჩაჩომ.

– ეგ რამ გათქმევინა, შვილო?! – შეაგება პა-
სუხი მეფემ, – ოღონდ ჩემი შვილები იყავით კარგად და
ყველაფერი შემოგვლებიათ!

ხელმწიფემ ბაჩაჩოს სურვილი შეასრულა თუ არა,
გოგონა ფეხზე წამოდგა, კარგად გახდა.

მეფის ოჯახის ცხოვრება კვლავ ბედნიერად წარიმარ-
თა. იძინებდნენ, იღვიძებდნენ, კითხულობდნენ, სწავ-

ლობდნენ, კაცები ნადირობდნენ, ქალები ხელსაქმობდნენ და, რაც მთავარია, ერთმანეთზე ზრუნავდნენ, ბოროტ მეფეებსაც არ ჰგავდნენ, არავის ჩაგრავენ.

გავიდა კიდევ რამდენიმე ხანი და უფლისწული იმედა „20 წლისა“ გახდა. დედ-მამამ ტახტის ერთადერთი მემკვიდრე უმდიდრესი კაცის ქალიშვილზე დანიშნა.

დადგა ქორნილის დღე. ახლო ნათესავეებსა და თანატოლებთან ერთად პატარძლის წამოსაყვანად, რა თქმა უნდა, ბაჩაჩოც გაჰყვა ძმას. საღამოს წვეულებამ დიდებულად, მშვიდობიანად ჩაიარა.

მეორე დღით სიდედრმა ახალგაზრდა სიძეს უძვირფასესი ტანსაცმელი მიართვა. სთხოვა, ჩაეცვა. ამის გამგონე ბაჩაჩო მივარდა ძმას, ხელიდან გამოგლიჯა ტანსაცმელი და ტირილით შეეხვეწა:

– არ ჩაიცვა, ძმაო, არ ჩაიცვა! არ ჩაიცვა!

ყველა გაოცდა, იფიქრეს – ხომ არ გაგიჟდაო! ძმის სიდედრმა იწყინა:

– რა მოგივიდა, ქალო, რას ჰგავს შენი საქციელი?!

ბაჩაჩომ ხელი დასტაცა ძმის შარვალ-ხალათს, მოსახამს, წაღებს და აგიზგიზებულ ბუხარში დაბერტყა. ტანსაცმლიდან უზარმაზარი შავი გველები გადასრიალდნენ და ცეცხლში ჩაცვივდნენ. დამ მოხვია ხელი ტანსაცმელს და ძმას მიანოდა – ახლა შეგიძლიაო ჩაცმა.

– ჩემო დაიკო! – ჩაიხუტა იმედამ და როცა განმარტოვდნენ, შეეხვეწა: – რა იცოდი ჩემი განსაცდელის შესახებ, როგორ მიხსენი?! მიაბზე!

ბაჩაჩო უარობდა. იმედა არ ეშვებოდა. გოგონას ძმა ძალიან უყვარდა, მის დაჭინებულ თხოვნას თავი ვერ დააღწია და საიდუმლოს გამჟღავნება გადანყვიტა. მანამდე ჯიბიდან ბეჭდის თვალი ამოიღო და ჩასჩურჩულა:

– ელისაბედ, საბა, მიშველეთ!

ძმას ყველაფერი უამბო. დაასრულა თუ არა, ქვად იქცა!.. უსაზღვრო იყო იმედას ნუხილი! თავში ნაიშინა ხელები:

– ვაიმე, საყვარელო დაო! მე დაგლუპე! მე გაიძულე ალთქმა დაგერღვია! შენ კი... შენ კი ჩემზე ზრუნავდი!.. რამდენჯერ მიხსენი სიკვდილისაგან! რა ვქნა ახლა?! რაღა ვქნა?!...

ვიდრე ძმა ვიშვიშებდა, ელისაბედის თითზე ბეჭედი განათდა და ალაპარაკდა:

– ბაჩაჩო განსაცდელშია! ბაჩაჩო განსაცდელშია! ნავედით! პონტო მოიცდის!

ელისაბედმა საბას ხელი ჩასჭიდა და ბეჭედმა ბავშვები ცაში აიტაცა. ცხრა მთა და მინდორი თვალის დახამხამებაში გადაატარა და მეფისწულის გვერდით დასვა.

– მიშველეთ! მიშველეთ! – ვაებით შეხვდა მათ იმედა, – ჩემმა დაიკომ დალუპვას გადამარჩინა და მე რა ვქენი?!.

ელისაბედმა და საბამ ბიჭი დაამშვიდეს, რაც იცოდნენ ამის შესახებ ყველაფერი უამბეს და ბედისმწერლის ნების აღსრულებაში დახმარება აღუთქვეს.

ბეჭედს სამზეოში წაყვანა სთხოვეს – მზის პირნაბანი წყალი ხომ უნდა ემოვათ! გაქვავებულ ბაჩაჩოს მოეფერნენ; სკაფანდრები ჩაიცვეს (კოსმოსში მიფრინავდნენ!), ერთმანეთს ხელი ჩასჭიდეს და მზის ქვეყანაში ლანდის უსწრაფესად აფრინდნენ.



სამზაო

სამზაოში ყველაფერი ოქროსფერში შერეული საოცარი სითეთრით კამკაშებდა. მალლობზე აღმასის კომპიანი მზის სასახლე ბრწყინავდა. ვერ გარკვევდით, რამდენსართულიანი იყო, რადგან წვერი ზეცაში, თვალუნვდენელ სივრცეში, იკარგებოდა! ხედვა სადამდეც მისწვდებოდა, ჩანდა, ყველა ფანჯარა ბაჯალლო ოქროს-

ფერი იყო; აივნებს კი ევლებოდნენ ცისარტყელები, რომელთა ბოლოები სასახლის კედლებზე ციმციმა ვარსკვლავებით მთავრდებოდა; კედლები, წყალში რომ მზე აირეკლება, ისე ლივლივებდნენ სხვადასხვაფრად. ამ მშვენიერებით აღფრთოვანებულებმა ნაბიჯი შეანელეს, აღმასის კომპს ააყოლეს თვალი და კიდევ უფრო გაოცდნენ, ისე ახლოს ჩანდნენ პლანეტები! საბა-სა და ელისაბედს ძალიან უყვარდათ ასტრონომია, მიუხედავად იმისა, რომ პატარები იყვნენ, ცის სხეულებზე ბევრი გაეგონათ, წაეკითხათ. გაახ-



სენდათ, როგორ აცნობდა ბებო „ვეფხისტყაოსანში“ მოხე-
ნიებულ მნათობებს.

- აი, ელ, შეხედე! მერკური, ანუ ოტარიდი - მზესთან

ყველაზე ახლოს
მყოფი, ჭკუისა
და მოხერხებუ-
ლობის მფარვე-
ლი, ადამიანის ბედის გამგე-
ბელი! - აღტაცებული გაჰყ-
ვიროდა საბა.

- ეს ვენერაა, მეც ვი-
ცანი, საბ, მეც! დაიცა, მე-
ორე სახელი რა ჰქვია?!
როგორ გვიხსნიდა ბებია?!...

გამახსენდა! გამახსენდა! ასპი-
როზი, იგივე ცისკრის ვარსკლავი
- სილამაზის, სიყვარულის, ბედი-
წერის პლანეტა.


- ესეც მშობლიური დედამი-
წა! - საუბარში ჩაერთო იმედა.

- რა ლამაზია და ცისფერი! - ერ-
თად აღმოხდა ყველას.

დედამიწა ისე მეტისმეტად ახლო-
ბელი, ისე მშობლიური აღმოჩნდა, რომ
მის დანახვაზე სამივეს ცრემლები
მოერია... პლანეტების თვა-
ლიერება განაგრძეს.



– ეს მარსია, – წამოიძახა საბამ, – იგივე მარსიხი. როგორ ელვარებს სისხლისფრად! ნამდვილი ომის პლანეტაა. ეს კი იუპიტერია, ანუ მუშთარი. იგი ბედნიერების მომცემ, სამართლიან მნათობადაა მიჩნეული.



– რა წითელი თვალი აქვს! თითქოს გვემუქრება! – გააგრძელა ელისაბედმა.

– ბავშვებო, აღფრთოვანებული ვარ თქვენი ცოდნით! ამდენი რამ მოზრდილებმაც კი არ იციან! გამოგიტყდებით, მეც მიყვარს ასტრონომია. აი, სატურნი, იგივე ზუალი. ძველად მას ასტროლოგები უბედურების მომტანად თვლიდნენ და შავი ფერის სიმბოლოდ მიიჩნევდნენ. სინამდვილეში როგორი კაშკაშა აღმოჩნდა!.. აქვეა ურანი, ნეპტუნი, პლუტონი...

– გამარჯობა, მთვარევ, როგორა ხარ?! – ხელი დაუქნია ელომ დედამინელების გაბადრულ მეგობარს.

ისე ახლო იყო ყველა პლანეტა, რომ აშკარად ხედავდნენ მათს ზედაპირზე არსებულ კრატერებს, ბორცვებს, მთებს, ამომშრალ ხეობებს... სამნუხაროდ, კოსმოსის დაწვრილებით დასათვალიერებლად ახლა არ ეცალათ, სხვა დიდი მიზანი ჰქონდათ და საჩქაროდ შევიდნენ მზის სასახლეში. ხელი არავის შეუშლია – მზის სახლის კარი ხომ ყველასთვის მუდამ ღიაა.

ჩვენი დიდებული მნათობი დედამინაზე სამოგზაუროდ ნაბრძანებულიყო. დედამისი შემოეგებათ. ძალიან მოეწონა სტუმრები და, მოსვლის მიზანი რომ შეიტყო, რა თქმა უნდა, დახმარებაც აღუთქვა.

მზის დაბრუნების დროც დადგა. დედამ ჩვენი გმირები მზეს მოარიდა, რომ შვილის სიმხურვალეს არ დაენვა. მიუხედავად იმისა, რომ ბინდდებოდა, ოქროსფერი მნათო-

ბის შემოცურებისთანავე ყველაფერი უზომოდ აკაშკაშდა. მზე დედას ალერსიანად მიესალმა და მის მიერ მოწოდებულ ოქროს თასში, ოქროს სურიდან დასხმული წყლით პირი დაიბანა. მიზეზი არც ჰკითხა, იცოდა, დედა ამას მხოლოდ საჭიროების შემთხვევაში, მხოლოდ სხვათა დასახმარებლად რომ აკეთებდა (აბა მზე თავისით ვერ დაიბანდა პირს?!)

მზემ დაიძინა. დედამ შვილის პირნაბანი წყალი სტუმრებს ვერცხლის სურით გადასცა. ახალგაზრდები აღუნერელი მაღლიერებით გამოემშვიდობნენ გულკეთილ ქალბატონს. იმედას სიდედრ-სიმაძრის სახლში მალე ჩაფრინდნენ, სკაფანდრები სიარულშივე გადაიძვრეს. შეშფოთებული მეფე, დედოფალი, პატარძალი და მისი მშობლები, ახლობლები, მსახურები ეზოში წრიალებდნენ. კოსმოსიდან მოსულეებმა გაქვავებულ ბაჩაჩოს მიაშურეს და მზის პირნაბანი წყალი თავიდან ფეხებამდე გადაავლეს! გოგონამ თვალი გაახილა, ირგვლივ შემოკრებილი საყვარელი ადამიანები რომ დაინახა, გაიღიმა, უცბად წამოხტა და საერთო ყიჟინსა და ტკრციალს შეუერთდა! სიცოცხლემ, სიკეთემ, მეგობრობამ იზეიმა! უსაზღვროდ ბედნიერი დღეები დაუდგათ!

იმედა და მისი ახალშერთული ცოლი გურიეს სახელმწიფოში დაბრუნდნენ. ზრაპრული ქორწილი გადაიხადეს, დიდი და პატარა, მდიდარი და ღარიბი – ყველა დაპატიჟეს.

ბაჩაჩოსა და ელისაბედს, იმედასა და საბას ერთმანეთი არ ეთმობოდათ, მაგრამ რა უნდა ექნათ! ზოგი უნდა დარჩეს, ზოგი უნდა წავიდეს... ასეთია ცხოვრება!



პონტო

ელისაბედი და საბა პონტოსაკენ მიმავალ გზას კვლავ დაადგნენ! უფრო ზუსტად, ბეჭედმა მიაფრინა იმ ადგილამდე, სადაც ბაჩაჩოს გამო მოგზაურობა შეწყვიტეს. პონტოს ზღვა ყოველთვის ალაფრთოვანებდათ, ბებოსთან ერთად ყოველ ზაფხულს ისვენებდნენ მის სანაპიროებზე, მაგრამ მარტო არასოდეს ყოფილან. თანაც ახლა ზემოდან დაჰყურებდნენ წყლის უზარმაზარ სივრცეს და აღტაცებას სიმღერით გამოხატავდნენ...

ზღვა საოცრად მშვიდი იყო... ნიავისაგან აქოჩრილი ტალღები მიყოლებით მილივლივებდნენ ნაპირისაკენ, ბავშვების ხმას აკომპანიმენტს ადევნებდნენ... უზარმაზარი ვეშაპები, ზოგი – ქრელი, ზოგი – შავი, ზოგი – თეთრი, ერთმანეთს სისწრაფეში ეჯიბრებოდნენ. დროდადრო თავდაყირა ჩაეშვებოდნენ და ვეებერთელა მერცხალა კუდს ზედაპირზე ამოზიდავდნენ, ხან ცხვირს ამოჰყოფდნენ და წყლის უხვ შადრევანს ამოიქმენდნენ... ათასგვარი ზომისა და შეფერილობის თევზები, ზოგი – ცალკე, ზოგი – გუნდ-გუნდად, ქარავნებად დაჰქროდნენ... ცხენთევზების დანახვამ ძალიან გაამხიარულა ბავშვები, გეგონებოდათ, კი არ მიცურავენ, სკუბ-სკუპით გადაადგილდებიანო... რვაფეხები საცეცებს კუმშავდნენ, შლიდნენ, კუმშავდნენ, შლიდნენ და დარბაისლური სიღინჯით მისრიალებდნენ. ყველაზე დიდი აღტაცება დელფინების დანახვამ გამოიწვია. მათაც შენიშნეს ბავშვები და ჭყლოპინს უმატეს. გაღიმებული




სახით (დიახ, დიახ!) ხტებოდნენ ტალღებიდან, ცისკენ მიიწევდნენ და ელისაბედისა და საბას დაშვებულ ხელებს თავს უხახუნებდნენ,

ეალერსებოდნენ!...თოლიები მათ შორის დაფრინავდნენ, მერე, ტალღებში როცა საკბილოს შენიშნავდნენ, ისარივით ჩაერჭობოდნენ ზღვაში და ნისკარტში თევზგაჩრილნი, კვლავ ცაში აიჭრებოდნენ, ნადავლს თვალის დახამხამებაში სანსლავდნენ და კვლავ ზღვას უბრუნდებოდნენ.

კარგა ხანს ითამაშეს ცისა და ზღვის ბინადრებთან ელისაბედმა და საბამ. მერე მოშივდათ და ნაპირზე, ნაძვნარში, დაეშვნენ.

ბეჭედმა სუფრა გაშალა. ბავშვები დანაყრდნენ და კვლავ განაგრძეს გზა, ამჯერად, მდინარე რძისას ნაპირს აუყვნენ. იგი ისე სწრაფად მოჰქუხდა, რომ თეთრი ქაფი წყლიდან ამოშვერილ ლოდებს, ქვებსა და ნაპირებს რძესავით აჩნდა.



ლაზიეთში

ბავშვები სანაპიროს ჩაუყვნენ. ქვაზე მჯდარ მდიდრულად გამოწყობილ, რაინდული გარეგნობის ვაჟს წაანყდნენ. ახალგაზრდა მონყენილი ჩანდა. პატარები თბილად მიესალმნენ. ისიც დაინტერესდა.

უცნობი ლაზიეთის სახელმწიფოს უფლისწული აზაზუ აღმოჩნდა. ერთი თვეა, რაც მამა გარდაცვლოდა. გულის გადასაყოლებლად, როგორც მიღებულია მამაკაცებში, ნადირობა გადაეწყვიტა. თან ახლდნენ მეგობრები, მარეკები, მგეშავეები – მეძებარი ძაღლებით. ნადირობა-ნადირობით ერთ ტრიალ მინდორზე გასულან. ზურმუხტისფერ, ყვავილებით მოჩითულ ხასხასა ბალახში მოფარფატე ჩიტებს შორის უცბად მზეთუნახავი ქალი დაუნახავთ. იგი ყვავილიდან ყვავილზე ნიავივით მსუბუქად დაჰქროდა. ხან ერთთან დასკუბდებოდა ფუტკარივით, ხან – მეორესთან... ისეთი ლამაზი იყო, ისეთი, რომ თვალს ვერ მოაშორებდით! მონადირეებსა და უფლისწულს ქალის დაჭერა მოუსურვებიათ, ირემივით ალყაში მოუმწყვდევიან, მაგრამ ქალი მათ თავზე აფრენილა, მოშორებით დაშვებულა და კვლავ ყვავილებზე დაუნყია ნიავივით ქროლა. ისევ მიპარვიან მონადირეები, მაგრამ – ამოდ... ქალი ისევ დასხლტომიათ ხელიდან და ფარფატით გაფრენილა ყვავილიდან ყვავილზე...დევნაში მხლებლებს ცხენები დახოცვიან და იძულებულნი გამხდარან, შეჩერებულიყვნენ. მხოლოდ უფლისწულის რაში დარჩენილა ცოცხალი და ქალის დაჭერის სურვილიც არ განელეგია. თავისიანებს უთხოვიან, სანამ უარეს ფათ-



ერაკს გადაეყრებოდა, შინ დაბრუნებულიყო, მაგრამ ვერ დაუთანხმებიათ! მარტო გაუგრძელება დევნა...ბოლოს მისი ცხენიც უსულოდ დაცემულა!..

ზის ახლა ამ უცხო მხარეში, უმეგობროდ, უმსახუროდ, უცხენოდ... ზის და ფიქრობს, საით და როგორ წავიდეს... ქალი ხომ დაკარგა, სამშობლოსაკენ მიმავალი გზაც ვერ გაურკვევია... ამიტომ ყოფილა ასე სასონარკვეთილი!..

ელისაბედმა და საბამ დაამშვიდეს (ხომ იცით, როგორ ეხერხებოდათ) და დახმარება აღუთქვეს. აზაზუმ არ აწყენინა პატარებს, გაკვირვება ამკარად არ გამოთქვა და გაულიმა, გულში კი გაიფიქრა – ამათ როგორ უნდა მიშველონო?!...თუმცა, ჯადოსნური ბეჭდის არსებობა და მისი დახმარებითა ადამიანთა ოცნებების რეალობად ქცევის ფაქტები რომ შეიტყო, იმედიც გაუჩნდა!... უფალმა



არ გამწირა და ეს ანგელოზები გამომიგზავნაო... მარჯვენა გაუნოდა. მათაც სიამოვნებით დაჰკრეს პანანუნა ხელის გულები. მერე იმ მიმართულებით გააგრძელეს გზა, საითაც მოფარფატე მზეთუნახავი თვალს მიჰფარებია... მიდიოდნენ, გარემოს ათვალეიერებდნენ და თავგადასავლის დარჩენილ დეტალებს უყვებოდნენ ერთმანეთს.


უცბად სამ მოჩხუბარ ჭინკას წაანყდნენ. თითო მეტრის სიმაღლისა იქნებოდნენ. ტანი ბალნით (ერთს – ნითლით, მეორეს – შავით, მესამეს – ყვითლით) ჰქონდათ დაფარული. პატარა თავზე სამკუთხედის ფორმის ყურები აცქვეტოდათ, თხელი დრუნჩი ვერ ფარავდა გრძელ ყვითელ კბილებს, მით უმეტეს, ახლა, როცა გაბრაზებული იყვნენ. უკანა ფეხებზე იდგნენ, წინა კიდურებით ერთმანეთს გამეტებით ურტყამდნენ, გრძელი კლანჭებით კანრავდნენ, გლეჯდნენ, ყურებსა და კუდზე კბენდნენ: ხან ერთი გადადიოდა ყირაზე, ხან – მეორე, ხან გორგალივით გორავდნენ, ხან ისარივით იჭიმებოდნენ. მათი ბზრიალ-ტრიალისაგან მიწისა და ბალახის კორიანტელი ხის ნვეროებამდე აღწევდა.

ელისაბედმა და საბამ ყელზე ჩამოკიდებული ჯვრები ერთდროულად ამოსწიეს, ავსულებს მიუშვირეს. ჭინკები შეჩერდნენ, მიახლოებულნი შენიშნეს.

– რა გჭირთ, რა გაჩხუბებთ?! ძმებს ჰგავხართ და არ გეკადრებათ! – შეარცხვინა საბამ.

– რა გაქვთ გასაყოფი? – დაუმატა ელისაბედმა.

– თქვენ ვის დაჰკარგვიხართ! რა თქვე-



ნი საქმეა! – დაიჭყიპინა ერთმა და უნესოდ გადააფურთხა.

– გასაყოფი სწორედაც გვაქვს! – დასჭყივლა მეორემ და უკანალი მოურიდებლად მოიფხანა.

– ძმები ვართ და მამისაგან სამი ძვირფასი ნივთი დაგვრჩა: სრიალა ხალიჩა, სალესი ქვა და კოკა, – დაიჩხავლა მესამემ.

– ვერ გაგვინანილებია! – ყურისწამლები ხმით დაიჭყიპინა ისევ პირველმა.

– სამივე ჯადოსნურია და მოგვწონს! – დაიჭყავლა მეორემ.

– ხალიჩა მისრიალებს, სალესი ქვა კლდეს ლიპავს, კოკა ზღვას სვლევს. სამივე გვჭირდება ავი საქმეების ჩასადენად. ცარიელი ხელებით ადამიანებს ვერ გაჯობებთ, ჭკვიანები ხართ! – ჩხაოდა მესამე. ყურთასმენა აღარ იყო! მერე მიუბრუნდნენ ერთმანეთს და კვლავ ჩხუბი განაგრძეს.

აზაზუ, ელისაბედი და საბა ცოტა ხნით განმარტოვდნენ. მუხის უკან დადგნენ, ბეჭედს მიმართეს რჩევისათვის. რჩევა მიიღეს თუ არა, ჭინკებისაკენ გაემართნენ, რომლებიც ერთმანეთს კვლავ კანწავდნენ, გლეჯდნენ, ფლეთდნენ.

– მოიცათ, მოიცათ! – სცადა შეჩერება საბამ.

– ნადით მინდვრის ბოლოში, დადექით გვერდიგვერდ, – მიმართა უნმინდურებს აზაზუმ, – ნიშანს რომ მოგცემთ, გამოიქეცით, რომელიც მოასწრებს ჩვენთან, სამივე ნივთს იმას ვარგუნებთ.



ჭინკებს გაუხარდათ:
სამართლიანიო და მინდევ-
რის ბოლოსკენ გაიქცნენ...
ჩვენმა გმირებმა სწრა-

ფად აიღეს სალესი ქვა, კოკა, შედგნენ ხალიჩაზე და გასრიალება უბრძანეს (მიუღებელია სხვისი ნივთების აღება, მაგრამ ბოროტებას ხომ უნდა შებრძოლებოდნენ ?!). ხალიჩა ადგილს მოსწყდა. ჭინკები აკივლდნენ, აჭყიბინდნენ, აჩხავლდნენ... ხტოდნენ, იწყევლებოდნენ, ქვებს ისროდნენ, მაგრამ ვერაფერი ვერ მოახერხეს, პირში ჩალ-აგამოვლებულნი დარჩნენ.

ხალიჩა მისრიალებდა და მისრიალებდა. მალე მინდევრის ქალს დაენივნენ! თხელ, აშოლტილ ტანს ფიფქივით თეთრი და სიფრიფანა კაბა შემოკვართოდა, ქარვისფრად მზემოკიდებულ უნატიფეს ნაკვეთიან სახეს გიშრისფერი თმა უმშვენებდა, მალალ ფეხებზე ძველბერძნული სტილის, ნვივებზე სალტეებშეკრული თაფლისფერი სანდლები ეცვა. მიწაზე ფეხს არც აბიჯებდა, ოდნავ შეეხებოდა ცერის წვერებით და ჰაერში ნარნარით აინევდა. აზაზუს სიხარულს საზღვარი აღარ ჰქონდა! ქალმა რომ შენიშნა, მიახლოვდებიანო, გაულიმა, მაგრამ ისკუპა და გაასწრო. ხან ფეხის წვერებით მირბოდა, ხან მიფრინავდა. სრიალით მისდევდა ხალიჩა... მინდორი უკან მოიტოვეს, უზარმაზარ დაკბილულ კლდეს მიადგნენ. ქალმა ზუმბულივით გადაუფრინა. აზაზუმ სალესი ქვა მოისროლა და კლდე მოილიპა. ხალიჩა ზედ ასრიალდა და ქალს მიჰყვა.

ასე გადაიარეს ცხრა მთა, ცხრა მინდორი, ცხრა ტყე და ერთ ზღვას მიადგნენ. ქალმა მერცხალივით გადაუფრინა. ხალიჩას ცურვა არ შეეძლო და აზაზუმ ზღვას სასწრაფოდ მიუშვირა კოკა. ამ უკანასკნელმა თვალის

დახამხამებაში ამოაშრო წყალი. გადაისრიალა ხალიჩამ ფსკერი და ისევ დაედევნენ ქალს.

კიდევ დიდხანს იარეს, იფრინეს და ცამდე აზიდულ მთას მიადგნენ. მთის წვერზე ხუთსართულიანი სასახლე იდგა. მაღალი და სქელი გალავანი ერტყა. ყოველი სართული და გალავნის ზედაპირი ისეთი წვეტიანი, ისეთი წამახული ქონგურებით ჰქონდა დაკბილული, რომ ჩიტიც ვერ მოიკიდებდა ფეხს. ეს მინდვრის ქალის სახლი აღმოჩნდა.

ქალის მიახლოებისთანავე ჩუქურთმებიანი მძიმე რკინის კარი გაიღო. ის იყო, უნდა შეესწრო, რომ ელისაბედმა, საბამ და აზაზუმაც იმარჯვეს – შეჰყვნენ. კარი როგორც კი დაიხურა, ქალი ჩვეულებრივად დადგა ფეხზე, მიუბრუნდა აზაზუს, გადაეხვია და უთხრა:


– უფალს როგორ მეუღლესაც ვთხოვდი, ისეთი მარგუნა! ეს შენა ხარ!



მერე ოთახში შეიპატიჟა ყველა და თავგადასავალი უამბო:

– მზისია მქვია. ბოროტმა ჯადოქარმა ჩვენი სასახლისა და დედულ-მამულის ხელში ჩაგდება მოინდომა. ჩემები შეებრძოლნენ. დედა, ძმები და მსახურები დამიხოცა... დაჭრილმა მამამ, ვიდრე სულს განუტევებდა, ვერცხლის ხანჯალი გულში სასიკვდილოდ ჩასცა. ჯადოქარმა ჩემი დაწყევლა მოასწრო: გამრავლება არ ეღირსოს, თუ ვაჟი სახლის გარეთ შეეხოს, უფრო მეტიც, ორივე მოკვდესო... ჩემი საცხოვრებელი კი, ხომ ხედავთ, სად დგას, ძეხორციელი ვერ მომაგნებს... კიდევ კარგი, კეთილმა ფერიამ დაობლებულს ხელი გამომიწოდა, გამზარდა, მაგრამ ძლიერი ჯადო მქონდა გაკეთებული და მხოლოდ ის შეძლო, რომ ფრენა მასწავლა... ჩემთვის ესეც დიდი შვება იყო... მას შემდეგ სადღა არ დაფრინავ... ვოცნებობ, ჩემი სულის მეგობარს, ცხოვრების თანამგზავრს შვხვდე!... წყევლის თანახმად, ჩემი საქმრო გახდებოდა ის, ვისაც ჩემი დევნა არ მობეზრდებოდა და სახლში შემომყვებოდა. ბევრმა მდია, მაგრამ ბეზრდებოდათ, ან მიზნისთვის ბრძოლის უნარიც არ ჰქონდათ!... მხოლოდ შენ შეძელი ბოლომდე გეერთგულა! ამიტომ ვაღიარებ: მე შენი საცოლე ვარ!

წამოიყვანა აზაზუმ მზისია საკუთარ სასახლეში და ჯვარი დაინერა. ქორწილს, რა თქმა უნდა, ელისაბედი და საბაც ესწრებოდნენ!



ჩირბუთში

ახალი მეგობრის შექენით ბედნიერმა და-ძმამ მხიარულად ჩაირბინა ფერდობი და ჭრელაჭრულა მინდორზე დაემვა. თვალსანიერზე დაბურული ტყე გამოჩნდა. მინდვრის ბოლოს კი მხიარული წყარო მორაკრაკებდა. ნაპირზე მონადირის ტანსაცმელში გამონყობილი ათლეტური აღნაგობის მზეჭაბუკი მიმოდიოდა. რალაცაზე ხმამალა მსჯელობდა.

– ღმერთო, მხოლოდ შენი იმედი მაქვს, გთხოვ, გამოსავალი მაპოვნინო! სანამ უნდა ვიყო დაჩაგრული?! სუსტი და ლაჩარი რომ არა ვარ, შენც კარგად იცი! გაგვანადგურა სოფლის ბატონმა! ის ხომ ადამიანი არ არის! ხარბი, ბოროტი, გაუმაძღარი, დაუნახავი, გულქვა ნადირია!...რა ვუყო დედაჩემს, სხვაგან საცხოვრებლად არ მომყვება, თორემ იქნებ უკეთესი ადგილი მეპოვა... როგორ ვუშველო დედას?!...

ბავშვები მიუახლოვდნენ. გამარჯობა უთხრეს. ისიც თავაზიანად მიესალმა. იქვე, აყვავებული ვაშლის ხის ძირში, დასხდნენ. ერთმანეთის ამბავი გამოიკითხეს.

ვაჟი ქვრივი ქალის ერთადერთი შვილი, სახელგანთქმული მონადირე გორდა აღმოჩნდა. ნადირობით არჩენდა დედას, ისიც ძლივძლივობით, რადგან სოფელს მესაკუთრე



სავია ჩაგრავდა, ნანადირევი ხორცის 90% მას მიჰქონდა.

ერთხელ გორდამ საოცარი, სხვადასხვაფრად დაწინ-
ნკლული ირემი მოინადირა. გაატყავა და დედას უთხრა:

– მსგავსი არაფერი მინახავს! ბატონს მივართმევ,
იქნებ ყმობიდან გაგვათავისუფლოს!

– პირიქით, შვილო, ასეთ ძვირფას საჩუქარს რომ
დაინახავს, მეტს მოგთხოვს! – გააფრთხილა დედამ.

გორდამ არ დაუჯერა და მემამულეს საჩუქრით ეწვია.
სავია ზუსტად ისე მოიქცა, როგორც დედამ ივარაუდა!

– შენ მართლა რა კარგი მონადირე ყოფილხარ! ამ-
იერიდან მხოლოდ ჩემთვის ინადირებ! ამ ირმის კი არა
მხოლოდ ხორცი, ტყავიც ჩემია! – უბრძანა ბიჭს.

რალა უნდა ექნა! იძულებული იყო, დამორჩილებოდა!
ამის შემდეგაც გააგრძელა ოჯახის ჩაგვრა.

გულქვა მფლობელი დედისთვის ერთ კი-
ლოგრამ ხორცს არ ატანდა, მხოლოდ
თავ-ფეხს მიუგდებდა...

გორდას თანასოფლელი მშვენიერი გო-
გონა უყვარდა, მაგრამ სიღარიბის გამო ჯერ
ვერ ქორწინდებო-
და. სოფელში ბევრი
კარგი გასათხოვარი
ქალი იყო, მაგრამ
მოურავმა მაინცდა-
მაინც მონადირის
რჩეულს დაადგა
თვალი. გოგონამ
მოურავი უარით გა-
ისტუმრა – გორდა
მიყვარსო. ბატონის





ლაქია ამან გააგულისა, გორდას და-
ლუპვა გადანყვიტა. მივიდა სავიასთან
და უთხრა:

– ამ არაჩვეულებრივ ტყავს სათავსოდ გველე-
შაპის ძვლებისაგან აგებული პატარა სახლი შეეფ-
ერება. ხომ გყავს დიდებული მონადირე, ჰოდა,
დაავალე, რაღას უცდი.

სავიას მოურავის აზრი მართლა მოეწონა. მოაყვანინა
ბიჭი და სურვილის აღსრულება უბრძანა.

– აი, ამიტომ ვარ აღელვებული, სასონარკვეთილი,
არ ვიცი, როგორ შევასრულო ეს დავალება! -დაასრულა
თხრობა გორდამ.

ელისაბედმა და საბამ დაამშვიდეს, ბეჭედი აჩვენეს,
მისი ჯადოსნური შესაძლებლობები გააცნეს და
წარმატების რწმენით აავსეს. მერე ბებოს საჩუქარს აკო-
ცეს. ასე აფხიზლებდნენ ბეჭედს, რადგან ამ უკანასკნელს
(თუ მათ არ ეხმარებოდა) ეძინა, ძალას იკრებდა მომ-
დევნო რთული დავალებების შესასრულებლად.

– ჩვენო თილისმავ და მეგობარო, როგორ მოვიქცეთ?!

ბეჭედი აჩურჩულდა. სამივე გულდასმით უგდებ-
და ყურს და ნათქვამს იმახსოვრებდა. გადანყვიტეს,
დარიგებისამებრ ემოქმედათ.

ბიჭი ბატონთან დაბრუნდა და უთხრა:

– გველეშაპის მოკვლას და მისი ძვლებისაგან ოთახის
აშენებას მაშინ შევძლებ, თუ მოურავი თავისი
ფულით (არა სხვისით!) მიყიდის ოც ულელ ხარ-
კამეჩს, დამიქირავებს ოც მეურმეს, ას მუშას, სამ
აირწინალს და ყველაფერს ნაღდი ფულით გა-
დაიხდის (გორდამ იცოდა, მოურავი
სავიასაც ატყუებდა, გლეხებსაც და



არანესიერი გზით იგროვებდა ფულს)!

პირკატა ეცა მოურავს, მაგრამ სად
ნაუვიდოდა ბატონის ნება-სურვილს?!
იმავე დღეს შეასრულა მოთხოვნა.

გორდა დედას დაემშვიდობა (რომ
არ ენერვიულა, ირემზე სანადიროდ მი-
ვდივარო, აუხსნა. ტყუილი ასეთ შემ-
თხვევაში გამართლებული იყო). საბა და ელისაბედი, რა
თქმა უნდა, თან გაიყოლა. აბა, უიმათოდ საქმე გაკეთ-
დებოდა?! ერთად დაადგნენ გზას. მეურმეები ურმის კო-
ფოებზე წამოსკუბდნენ, მუშები და ახალგაზრდები ერთ
ურემზე მოთავსდნენ და მგელკუდას მთისაკენ გასწიეს.
გველეშაპი იქ ბუდობდა.

ერთი კვირის სიარულის შემდეგ საშინლად მყრალი
სუნი ეცათ. ეს იყო მაუნყებელი იმისა, რომ მგელკუდას
მთას უახლოვდებოდნენ. მთის ძირში, ტრიალ მინდორზე,
ბალახის ნამცეცეც არ ჩანდა, სამაგიეროდ, უხვად იყო
მიმოფანტული უამრავი ზომისა და ფორმის გამობრული
ძვლები, ჩონჩხები... აქა-იქ მინურებიც მოჩანდა, ალბათ,
უწმინდურის ნანადირევის სამარაგო საწყობები იყო.
გორდამ და ბავშვებმა აირწინალები აიფარეს, რომ არ
მონამლულიყვნენ. გზა უზარმაზარი ქვაბულისაკენ გა-
ნაგრძეს, სადაც გველეშაპი ღამეს ათენებდა. რამდენიმე
საათის სვლის შემდეგ დაინახეს, რომ ურჩხული შესასვ-
ლელთან განოლილიყო. ეძინა.

გორდამ მეურმეები, მუშები და ხარ-კამეჩი ერთ-ერთ
ცარიელ საწყობში დამალა. თვითონ, ბავშვებთან ერთად,
ბეჭედმა გააუჩინარა. ამიტომ გველეშაპთან მიახლოება
ადვილად შეძლეს. მხეცისა და ქვენარმავლის ნაერთი ის-
ეთი გრძელი იყო, რომ კუდი სად უთავდებოდა, არ ჩანდა.



ჩვენმა გმირებმა მოხერხებული პოზიცია დაიკავეს, გორდამ კაპარჭიდან ისრები ამოიღო, ელისაბედმა წამახულ წვერს ბეჭედი შეახო, უფრო რომ გაეზასრებინა. ქვრივის ვაჟმა ისარი მოზიდა, კარგად დაუმიზნა და სტყორცნა! პირველმა ისარმა ერთი ყურიდან მეორეში გაუარა. ურჩხული მთელი სხეულით შეირყა, თვალები გაახილა, პირი დააღო, ყურისწამლებ ღრიალთან ერთად საზარელი მყრალი ჰაერი და ცეცხლის ნაკადი ამოუშვა, კუდი მიწას ისე მძლავრად დაჰკრა, რომ ყველაფერი შეზანზარდა, წვრილფეხა ცხოველები გულგახეთქილები შეცვივდნენ სოროებში, ფრინველები ფოთლებში მიყუჩნდნენ...გველეშაპი თავს



აქეთ-იქით ახეთქებდა, წინა თათებით ისარს ექაჩებოდა, მაგრამ ვერაფრით ვერ იძრობდა, სისხლი კი, აქოთებული, შავი საზიზლარი სითხე, ნაკადულად მიედინებოდა, მიედინებოდა და ყველაფერს შხამავდა. ჭაბუკმა მეორე ისარი მოზიდა და პირდაპირ გულში სტყორცნა! ურჩხული ერთხელ კიდევ შეირყა და თანდათან დასუსტდა... ბოლოს ძალა სულ გამოეღია და თავი გრუხუნით დაანარცხა მიწას...


მცირე ხნით სიჩუმე ჩამოწვა...მერე თანდათან ამოძრავდნენ ფრინველები და ცხოველები – ყველამ და ყველაფერმა თავისუფლად ამოისუნთქეს. გორდა და მისი მეგობრებიც გამოვიდნენ სამალავიდან, გამარჯვების ყიჟინა დასცეს და ერთმანეთს გადაეხვივნენ. მერე გორდამ მუშებს უხმო, გველეშაპისთვის ხორცის გაცლა დაავალა, თან ისე, რომ ძვალი არ დაეზიანებინათ. მეურმეებიც მიეშველნენ. სამი დღე-ღამე შრომობდნენ. ხორციტ ტურა-მგლები, აფთრები, გიენები, სვავეები და ყვავ-ყორნები გაახარეს; ჩონჩხი სახსრებში ფრთხილად გადახსნეს, ოც ურემზე დააწყვეს და მემამულის ეზოში მიზიდეს. საბა და ელისაბედი ისევ უჩინონი გახდნენ.

სავიას სიხარულს საზღვარი არა ჰქონდა, ხოლო მოურავი გულზე გასკდა! ბატონის ცოლ-შვილი, სტუმრები და მსახურები გაოცებისაგან პირღია იდგნენ! სავია ბავშვივით დახტოდა და გაჰყვიროდა:

– ახლა პატარა სახლი მინდა,
სახლუკა, სახლუკა! პაატაარაა,
პაატაარაა!

ქვრივის შვილმა მილოცვები რომ მიიღო, მემამულეს მიმართა:

– მოურავმა საკუთარი ფულით





დამხმარე ხელოსნები დამიქირავოს და ოთახს სამ კვირაში ავაშენებთ.

მოურავი ბოლმისაგან იღრჩობოდა, მაგრამ რაღას იზამდა! ხელოსნები დაიქირავა. გორდამ ნახაზი შეადგინა და მისი ხელმძღვანელობით შენება დაიწყო. თუ რამე არ მოეწონებოდა, დააშლევინებდა და ხელახლა აგებინებდა.

ორ კვირაში მშენებლობა დასრულდა. პატარა შენობა არაჩვეულებრივი გამოვიდა: კედლები ღია ქარვისფრად ბზინავდა. ალაგ-ალაგ მოზაიკით შესრულებული პეიზაჟები ჩაესვათ. კედელთა კუთხეებში ირმის რქები დაემაგრებინათ. კარის პირდაპირ, ცენტრალურ კედელზე გადაჭიმული ირმის ტყავი ხომ საოცრად ალამაზებდა იქაურობას. ჭერად ფერად-ფერადი შუშა გამოეყენებინათ. მნახველები მონუსხულივით იდგნენ და თვალს ვერ აშორებდნენ ამ ზღაპრულ სილამაზეს.

მოურავს მზეჭაბუკის წარმატება ყელში ეჩხირებოდა. თავს იმტვრევდა, როგორ მოეშორებინა. მოიფიქრა და მივიდა ბატონთან:

– ცხრა მთის იქით რომ იადონი და ბულბული ბუდობენ, ისინიც რომ ამ ოთახში გყავდეთ, რა შორს გაგივარდებათ სახელი, რამდენი მნახველი მოვა და შესაბამისად უამრავი ფული შემოგვივათ!

სავია ამ აზრით მოიხიბლა და სასწრაფოდ იხმო გორდა. ისევ დაღონდა ვაჟი. იცოდა, იადონსა და ბულბულს სამი უზარმაზარი არნივი დარაჯობდა, უძლიერესი და სისხლისმსმელი მტაცებლები. რას იზამდა, დაეთანხმა ბატონის ბრძანებას. რა



თქმა უნდა, ელისაბედისა და საბას დახმარების იმედი ჰქონდა.

ბეჭედთან თათბირის შემდეგ ბატონთან გამოცხადდა:

– თუ გასურთ, რომ დავალება კვლავ სრულყოფილად შევასრულო, მოურავმა საკუთარი ფულით ოცი თეთრი, ოცი წითელი, ოცი შავი ხარი იყიდოს. თქვენი ფული არ გაერიოს, თორემ ბრძანებას ვერ შევასრულებ (თუმცა, ბატონს გაფრთხილება რად უნდოდა, რისი გამცემი იყო)! მოურავი კვლავ იძულებული გახდა, ხარჯი გაეღო.

ელისაბედმა, საბამ, გორდამ და ბეჭედმა გადაიფრინეს სამი მთა, სამი მინდორი და არწივეთის პირველ ხეობაში დაფრინდნენ.

ირგვლივ საოცარი სითეთრე და სინყნარე სუფევდა. ფოთლის შრიალიც კი არ ისმოდა. მხოლოდ ჩიტები ჟღერდნენ ისე ხმადაბლა, რომ გაგეგონა, სმენა უნდა დაგეძაბა. ცა იყო ლურჯზე ლურჯი... გორდა და ბავშვები თეთრი ყვავილებით მოხატულ მწვანე მინდორში ჩასხდნენ. გარემოებით მოხიბლულნი ხმას არ იღებდნენ, თუმცა, სამივეს უტრიალებდა ფიქრი – „ნეტავ, სად არის არწივი?!“

უცბად, თითქოს გრიგალი მოვარდაო, ბალახებმა, ყვავილებმა, ფოთლებმა შრიალი, წრიალი, რყევა, ცახცახი დაიწყეს... ყველაფერი არაბუნებრივად გაფერმკრთალდა. აიხედეს და უზარმაზარი თეთრი არწივი დაინახეს. ფრინველი ფრთებით ცის მესამედს ფარავდა, მოკაუჭებული ნისკარტი გაეღო, ძლიერი კლანჭები მინაზე დასაშვებად ოდნავ მოეხ-



არა. გორდამ, საბამ და ელისაბედმა ძლივს გადააასწრეს ბუჩქებში, თორემ გაისრისებოდნენ! არწივს ზეციდანვე შეენიშნა ისინი (მას ხომ არაჩვეულებრივად შორსმჭვრეტელი მზერა აქვს) და შეჰყეფა:

– ჩემი შიშით აქ ვერავის ვერ გაუვლია და თქვენ ვინა ხართ?!

– ჩვენ უწყინარი ადამიანები ვართ. დახმარება გვჭირდება და თქვენი დიდი გულის იმედი გვაქვს! სამაგიეროდ აი, ეს მშვენიერი თეთრი ხარები მოგართვით! ნუ გაგვიწყობით!- სწრაფად უპასუხა გორდამ.

არწივი მოლბა, მიახლოების ნება მისცა, ფრთები შეიკეცა და უთხრა:

– ასი წელია, აქ ვცხოვრობ და ჩემთვის ერთი წინილაც კი არავის მოურთმევია! შენ კი ვინა ხარ ასეთი გულუხვი, ასეთი გაბედული?! ხარები რატომ მაჩუქე?!

გორდამ უამბო, ვინც იყო და რაც სურდა. არწივმა უსმინა, გაითავისა ყმანვილის გასაჭირი (თურმე კეთილი გული ჰქონია!) და საჭირო რჩევა მისცა:

– ვიცი, სადაც ბუდობენ თქვენთვის სასურველი მგალობლები. მათი გამოყვანა მხოლოდ ჩემს უფროს დას, შავ არწივს, შეუძლია, მაგრამ ჯერ ჩვენი შუათანა და, ნითელი არწივი, უნდა ნახოთ. ამისთვის ექვსი მთისა და ექვსი მინდვრის გადალახვა მოგიწევთ.

თეთრმა არწივმა ფრთა გამოიძრო, ვაჟს მიანოდა –



როცა გაგიჭირდება, მახსენე და შენთან გავჩნდებიო!
თბილად გამოემშვიდობნენ ერთმანეთს.

გაირეკეს დარჩენილი 40 ხარი და გზა განაგრძეს. მე-
ექვსე მთა და მინდორი რომ გადაიარეს, ვრცელ ველზე
გავიდნენ. სიმწვანში წითელი ყაყაჩოები და წითელი ვარ-
დები ყვავოდნენ. ხეებზე ფოთლებს წითელი ზოლები და-
ჰყვებოდა; ტოტებზე წითელი ციყვები დახტოდნენ; წითე-
ლი პეპლები ყვავილების ნექტარს ენაფებოდნენ. გორდა,
ელისაბედი და საბა წითელი ნეკერჩხლის ქვეშ ჩამოსხდ-
ნენ და არწივს დაელოდნენ.

უცხად ცამ დაიქუხა, არემარე კიდევ უფრო წითლად
გალვივდა. წითელი არწივი შხუილით დაეშვა მიწაზე. ძლ-
იერი წითელი კლანჭები მიწაში ჩაარჭო, გაიმართა, წი-
თელი ბრიალა თვალები მიმოავლო და დაუპატიჟებელ
სტუმრებს დაუდრიალა:

– ჩემი შიშით აქ ვეფხვს ვერ გაუჭაჭანებია, თქვენ
როგორ ბედავთ?!

– ნუ გვინყრები! – შეაგება გორდამ და თეთრი ფრთა
დაანახვა, – შენი დისაგან მოვდივართ, თან წითელი
ხარები მოგართვით! საგანგებოდ შენთვის შევარჩი-
ეთ!

საჩუქარი ყველას სიამოვნებს, ყურ-
ადლება ვის არ მოსწონს! ჰოდა, არ-
წივიც არ აღმოჩნდა გამონაკ-



ლისი – მასაც ეამა გემრიელი საკბილო, თანაც ამდენი!
კარგა დიდხანს ეყოფოდა!

– 120 წელია, აქ ვზუდობ და საჩუქარი რა არის არ
ვიცი! მადლობასაც პირველად ვამბობ! – თქვა და თავი
ისე დახარა, ადამიანებისათვის თვალეში რომ ჩაეხედა.
მერე განაგრძო:- მგალობელი იადონი და ბულბული ერთ,
ადამიანისათვის მიუვალ, კლდეში სხედან. კლდე წამიერად
იღება და იხურება. იქ შეფრენა და გამოფრენა მხოლოდ
ჩემს უფროს დას შეუძლია. მასთან უნდა წახვიდეთ...იგი
აქედან ცხრა მთისა და მინდვრის იქით ცხოვრობს. აი,
ჩემი ფრთა (ბეჭიდან გამოიძრო და მისცა), როცა გაგი-
ჭირდეთ, ხელში დაიჭირეთ, მახსენეთ და
თქვენთან გავჩნდებიო, – დასძინა.

დამეგობრებულები დაშორდნენ ერ-
თანეთს.

ჩვენებმა გაირეკეს შავი ხარები,
ცხრა მთა გადაიარეს და უზარმაზარ
ტრიალ მინდორში გავიდნენ. ბალახი,
ყვავილები, ხეები, ბუჩქები, ფოთ-
ლები და ჩიტები – ყველაფერი
შავი გახლდათ... თავზე ტყვიის-
ფერი ცა დაჰყურებდათ. ასეთი
ამაზრზენი სიმუქე აუტა-
ნელი იყო, მაგრამ
რა უნდა ექნათ,
შავ არწივს



უნდა დალოდებოდნენ. კარგა ხანს ისხდნენ ბინდ-ბუნდში. უცბად ტორნადო ამოვარდა, ხეებმა ისეთი რყევა დაიწყეს, რომ კენწეროებს საკუთარ ფესვებს ახლიდნენ, მინა ზანზარებდა, ხიდან ტოტები ცვიოდა, ცა მთლიანად ჩამოხველდა - შავმა არწივმა ყველაფერი ჩამოაქუფრა და მინაზე გრიალით დაეშვა; შავი ბრიალა თვალები არისხა მოსულეებს, გორდას კლანჭებით მისწვდა, აიტაცა და შეჭლრიალა:

- ჩემი შიშით ლომს ვერ გაუვლია და თქვენ როგორ ბედავთ?!

გორდამ თეთრი და წითელი არწივის ფრთები აჩვენა:

- აქ მოსვლა თქვენმა დებმა გაგვაბედვინეს! საქმე გვაქვს თქვენთან. ამავე დროს საკვებად ხარები მოგართვით!

საჩუქართან ერთად დების ფრთებმა დიდი შთაბეჭდილება მოახდინა და არწივმა ვაჟი ნელ-ნელა დაუშვა ძირს:

- 140 წელია, რაც აქა ვარ და ჯერ ჩემთვის საჩუქარი არავის მოურთმევია! ჩანს, მართლა გიჭირთ... თან ამხელა გზა გამოგივლიათ, ამდენი ხარჯი გაგინევიათ!

გორდამ ყველაფერი დაწვრილებით უამბო, ბავ-



შვებიც გააცნო. შავი არწივი არც ისე საშიში აღმოჩნდა, როგორც ეგონათ! სიბრალულის უნარიც ჰქონია!..


- აქ დამელოდეთ, ბუღბუღსა და იადონს ახლავე მოგიყვანთ. ჩემს მოსვლამდე კი წაისაუზმეთ, -თქვა და ფრთა ფრთას შემოჰკრა. შემოცუნცულეებულ კუდბუთქუნა ციყვებს ხილისა და წვენების შემოტანა დაავალა, მერე სტუმრები სუფრასთან მიიწვია. თვითონ კი, რაც შეეძლო, ნარნარად აფრინდა, ტორნადო რომ არ გამოეწვია.

ერთი საათიც არ გასულა, არწივმა ისევ ჩამოაბნელა ცა თავისი ფრთებითა და სხეულით. შეპირებული მგალობლები კლანჭებით ფრთხილად ეჭირა. ელისაბედსა და საბას გადასცა. ბავშვებმა გულში ჩაიკრეს ულამაზესი ჩიტუნები. იმათაც, იგრძნეს თუ არა და-ძმის სიყვარული, ისეთი გალობა დაიწყეს, ისეთი გაუგონრად საამო ხმები ამოუშვეს პანანინა ყელიდან, რომ არწივსაც კი გადმოსცვივდა ცრემლები... გორდამ ჩიტებს კობტა გალია შეუჭყედა, რომ ხელში დაჭერით არ შეწუხებულიყვნენ. მადლობა გადაუხადეს შავ არწივს, რომელმაც, დების მსგავსად, ფრთა გაატანა და დახმარება აღუთქვა, თუ დასჭირდებოდათ.

ყმანვილებმა 18 მთა და მდელო გამოიარეს და ბატონის სახლში დაბრუნდნენ. ელისაბედი და საბა კვლავ გაუჩინარდნენ.

ბუღბუღი და იადონი გველეშაპის ჩონჩხისაგან აგებულ ოთახში დასვეს. ჩიტები გაუჩრებლად ჭიკჭიკებდნენ. მაყურებლები უწყვეტ ნაკადად მიედინებოდნენ. აღარ იცოდნენ, რომლისთვის მიენიჭებინათ უპირატესობა: ძვლის კედლებიანი სახლის, ირმის უმშვენიერესი ტყავისა თუ მგალობელი





ფრინველებისათვის. სავია, რომელიც მნახველებს ფულს ართმევდა, კიდევ უფრო გამდიდრდა. ჩირგუეთმა მთელს მსოფლიოში გაითქვა სახელი. სავია სიხარულისაგან ცაში დაფრინავდა. მოურავი კი ბოლმითა და შხამით ივსებოდა. ახალ ფანდს იგონებდა, ჭაბუკი რომ დაელუპა. რალაც მოიფიქრა და ბატონთან მივიდა:

– ახლა მართლა ხელმწიფის საკადრისი ქონების პატრონი ბრძანდებით, მაგრამ ვერცხლის ტბის გაღმა, ქალთა კუნძულზე, ბროლის კოშკი დგას. იქ გრძნეული მზეთუნახავი ქალი ცხოვრობს, ცისიო ჰქვია. როგორ დაგამშვენებდათ!

სვაგზე უხარბეს სავიას ნათქვამი მოეწონა. დაიბარა ქვრივის შვილი და მოურავის მოგონებული დავალების შესრულება დაავალა, თან დასძინა:

– სანამ მზეთუნახავს არ მომიყვან, დედაშენი დღის სინათლეს ვერ ნახავს, ჯურღმულში მეყოლება!

გორდა შეევედრა, დედა გაეთავისუფლებინა, რომ დავალებას მაინც აუცილებლად შეასრულებდა, მაგრამ არაფერი გამოუვიდა – გულქვა იყო სავია, ბოროტი, გულღრძო. ვაჟი ჯერ კიდევ მემამულეს ეკუთვნოდა და, მეტი გზა არ ჰქონდა, უნდა დამორჩილებოდა.

ბეჭედთან დიდი ხნით თათბირის შემდეგ ბატონთან მივიდა და მოსთხოვა:

– ისევ მოურავის ფულით, მოურავის ფულით, იყიდეთ ორი საუკეთესო და ძლიერი რაში, ერთი აქლემი და ფარჩა-აბრეშუმის თოფები, ასევე, ბაჯალლო ოქროსა და ბრილიანტისაგან დამზადებული ქალის სამკაულები.

მოურავი საბოლოოდ გაკოტრდა. საშინლად გამწარე-

ბული იყო! თავს იმით ინუგეშებდა, გორდა ამ დავალებას შეენირება, მე კი ისევ წავგლეჯ გლეხებს მოსავალს, ბატონს მოვპარავ და კვლავ დავიგროვებ ქონებასაო!

ელისაბედმა, საბამ და გორდამ ყველაფერი მოამზადეს; გულმხურვალედ ილოცეს და გზას დაადგინენ.

ზოგჯერ იფრინეს, ზოგჯერ იარეს და მიადგნენ ვერცხლის ტბას. ეს სახელწოდება მისი თვალისმომჭრელი ზედაპირის გამო მიეცათ. იგი, თურმე, უძირო ყოფილა. მასზე ერთი ბენვის ხიდი იყო გადებული. ვისაც ქალთა კუნძულზე მისვლა სურდა, ამ უწვრილეს ხიდზე მხოლოდ ღამით, ახალი დღის დასაწყისში, 24:00 სთ.-დან 01:00 სთ.-მდე უნდა გაეგლო, რადგან ტბის ზედაპირის სიბრჭყვიალის გამო დღისით ეს შეუძლებელი იქნებოდა – ყველა დაბრმავდებოდა. მგზავრს კიდევ ორი პირობა უნდა შეესრულებინა: ერთი – ტბაში არ უნდა ჩაეხედა, რადან იქიდან ტბის ბინადარი ქალთევზები მაცდურად იცქირებოდნენ და მზად იყვნენ, მათი შემხედვარე მგზავრი წყლის უძირო სივრცეში




ჩაენთქათ. ხიდზე გამსვლელს ამ ცდუნებისთვის უნდა გაეძლო და მხოლოდ წინ ეცქირა, მეორე პირობა- გადაფრენა არ შეიძლებოდა (წამში არ გადაიყვანდა ბეჭედი?!), აუცილებლად ბენვის ხიდი უნდა გაეველოთ მიზნის მისაღწევად. ეს ინფორმაცია, რა თქმა უნდა, ბებოს საჩუქარმა მიაწოდა ჩვენებს. თან დაამშვიდა: ჩემს უნარს შეძლებისდაგვარად გამოვიყენებ და სიმსუბუქეს შეგძენთო.

რა უნდა ექნათ! წინ გორდა დადგა, შემდეგ – ელისაბედი, მერე – საბა, აქლემი და რაშები. ელისაბედს ხელი აწეული ჰქონდა, რომ ბეჭდის ძალა და ენერგია ყველაზე გადანაწილებულიყო, რომ რაშებსაც და აქლემსაც ყურადღება არ გაფანტოდათ, ძირს არ დაეხედათ და უძირო ტბაში არ ჩავარდნილიყვნენ.

ფეხი შედგეს თუ არა, ხიდი დაირწა. ტბის ზედაპირი ვერცხლისფრად ბრჭყვიალებდა და ისეთ შუქს ჰფენდა სიბნელეს, შუადღე გეგონებოდათ. საოცარი სანახაობა იყო: რამდენიმე კილომეტრზე განფენილი ნათება უზარმაზარ ბნელ სამყაროში ისე ჩანდა, თითქოს უჩინარ თოკებზე ეკიდა...ნელა, ფრთხილად მიინვედნენ წინ, მეორე ნაპირისაკენ. ის იყო, პირველი საათი ილეოდა, რომ უკანასკნელმა რაშმა მოასწრო ხიდიდან ნაპირზე გადაბიჯება. ყველამ შვებით ამოისუნთქა: ისინი უკვე ქალთა კუნძულზე იყვნენ! ხუთიოდე მეტრის გავლის შემდეგ გამოჩნდა ცისიოს უმცროსი დის, ცინცხალას, კოხტა სახლი. იქ, როგორც ბეჭედმა ამოიცნო, ხშირად დადიოდა მზეთუნახავი.

მგზავრებმა ჭიშკარზე დააკაკუნეს. მხევ-



ლებმა კარი გააღეს (მამაკაცები არსად ჩანდნენ) და განათებულ ეზოში შეიყვანეს. ბალის შუაგულში მაღალი, ქერათმიანი, ცისფერთვალემა ქალი იდგა. ეცვა ტანზე მომდგარი პირისფერი აბრეშუმის გრძელი კაბა, ვარდისფერი მაქმანებით განწყობილი. წელსაც ისეთივე ფერის ქამარი უმშვენებდა. ყელი, ყურები და მაჯები ოქროსა და ბრილიანტის სამკაულებით ჰქონდა დამშვენებული. ხელგაშლით მიეგება – სტუმარი ღვთისააო, – წარმოთქვა და იქვე, ვარდების წრეში დადგმულ მაგიდასთან, დასხა. ელისაბედსა და საბას მიუალერსა, გორდას კი მისვლის მიზეზი ჰკითხა. კარგად ესმოდა, რახან ასეთი რთული გზა გამოიარეს, დიდი მიზეზი და მიზანი ექნებოდათ.

გორდამ ყველაფერი უამბო, თან ძვირფასი საჩუქარი – ფარჩა-აბრეშუმით დატვირთული აქლემი და რჩეული სამკაულები მიართვა. ცინცხალამ გაიღიმა:

– ამდენი საჩუქარი, თან ასე ძვირფასი, ჯერ არავის მოურთმევია! ასე თბილად ჯერ არავინ დამლაპარაკებია! გარდა ამისა, მიყვარს თანადგომა, გაჭირვებულისათვის ხელის განვდენა, რაც თქვენ ძალიან გაჭირდებათ! ახლა ამ უკანასკნელ სიამოვნებას მოკლებული ვარ, რადგან ადამიანებს ძალიან იშვიათად ვხედავ – ტბაზე გადმოსვლა სახიფათოა! მინდა, სიკეთის ქმნის მაღლი ჩემმა დამაც აღიდგინოს. სანამ აქ დავსახლდებოდით, სხვათა დახმარება მისი ყოველდღიური საქმე გახლდათ. ახლა, სამწუხაროდ, ადამიანებისადმი ნდობა დაკარგული აქვს, ჰქონდა საამისო საბაბი... იქნებ თქვენთან ურთიერთობის შემდეგ გამოიცვალოს! თუმცა, ერთი რამ მაძარდებს: მე

გენდობით, მაგრამ ჯერჯერობით იგი არ მიგიკარებთ, არ წამოგყვებათ. ის კი არა, მეშინია, რამე არ დაგიშავოთ; გარეგნულად ნაზი აგებულებისაა, მაგრამ გოლიათის ძალა აქვს! ამიტომ იძულებული გავხდები, დავაძინო და ასე მოგატაცებინოთ. ძალიან ჩქარა უნდა ატაროთ, სანამ გაიღვიძებს, თორემ შეიძლება, მოგკლათ!

გორდას ცინცხალას გეგმა მოეწონა: მიზანსაც მიაღწევდა და მზეთუნახავიც უვნებელი დარჩებოდა!

მასპინძელმა აქლემი და რაშები საჯინბოში შეაყვანინა. სტუმრები სახლში შეიპატიჟა, ოთახები დაათვალიერებინა. წითელი ხით მოპირკეთებული სარკესავით პრიალა იატაკი ფერადი ხალიჩებით მოეფინათ; დარბაზის კუთხეებს ირმის რქები ამშვენებდა; აღმოსავლეთის კედელზე გადაჭიმულ ხელით ნაქსოვ ულამაზეს ფარდაგზე უამრავი სახეობის იარაღი ეკიდა: ხმლები, ხანჯლები, თოფები, რევოლვერები, მშვილდ-ისრები. საბა, როგორც მომავალი ჭემშარიტი რაინდი, ისე მოიხიბლა საბრძოლო აღჭურვილობებით, რომ კედელს ძლივს მოაშორეს. ცინცხალამ არაჩვეულებრივი ნაკეთობის მშვილდ-ისარი ჩამოხსნა კედლიდან და ბიჭს უსახსოვრა.

მასპინძელმა აბაზანა მიასწავლა სტუმრებს და მერე სათითაოდ მიუჩინა საძინებელი ოთახები.

ინათა თუ არა, ყველამ გაიღვიძა. სასადილოში მოიყარეს თავი, ისაუბმეს. მთელი დღე სასიამოვნოდ გაატარეს.

დაღამდა. ჭიშკართან ეტლის გრიალი გაისმა, რაც იმას ნიშნავდა, რომ ცისიო მოვიდა. ცინცხალამ სტუმრებს დასამალად შენობის ბოლო ოთახი შესთავაზა, მაგრამ ელისაბედმა

მადლობა მოახსენა და ბეჭდის დახმარებით სამივე გაუჩინარდა. მასპინძელი გაოცდა, ასეთი რამ არასოდეს ენახა, მაგრამ თავი შეიკავა და დის შესახვედრად მოემზადა.

მსახურმა ქალებმა ჭიშკარი გახსნეს და ეზოში ოქროსა და ძვირფასი ქვებით მოჭედილი ეტლი შემოგორილდა. უცბად გაჩერდა, საფეხურები ჩამოიშალა და გამორჩნდა ლურჯ ჯინსებში გამოკვართული ქალის მაღალი ნვივები. ორივე ფეხი მიწაზე დადგა, ნაქანდაკევი ტანი გამართა, მარცხენა ხელით გრძელი, წელამდე დაშვებული შავი თმის კულულები და ოქროსფერი ზედატანი შეისწორა, მარჯვენა ხელით ეტლის კარი მიხურა. მერე ორივე ხელი გაშალა და დისკენ გაემართა. ჰარმონიულად ნაკვეთი სათნო სახე მიმზიდველი ღიმილით კიდევ უფრო დაუმშვენდა და ისე გაუცისკროვნდა, ყველაფერს ნათელი მოეფინა. ცისიო არამინიერი სილამაზით ბრწყინავდა! გაცეხულ ელისაბედს, საბასა და გორდას აღფრთოვანების შეძახილი კინალამ ხმამაღლა აღმოხდათ, თავი კინალამ გაამჟღავნეს! მათ წინ ქალი კი არა, ქალღმერთი იდგა!

დები ჩამოსხდნენ. ერთმანეთი მოიკითხეს. ცისიომ მი-




მოიხედა:

– დაიკო, რაღაც უცხო სუნი მცემს. ხომ არავის მალავ, ხომ არ მლალატობ?!
– მე შენ გილალატებ?! – იწყინა ცინცხალამ.

– შეიძლება არასწორად ვთქვი, მაპატიე, მაგრამ იქნებ იმის გაკეთებას მოითხოვ ჩემგან, რაც არ მინდა! ხომ იცი, ჯერ უცხო ადამიანებთან ურთიერთობისთვის მზად არა ვარ! – დაუყვავა უფროსმა დამ. დასხდნენ.

მოსიყვარულე დებმა ბევრი რამ გაიხსენეს, გულიანად იცინეს. მაპინძელმა ყავა და ნამცხვრები დაანყო მაგიდაზე. საუბარში დრო მალე მიიღია. საცაა ღამე მიიწურებოდა. ცისიო გავიდა; ცინცხალამ ყავაში დასაძინებელი ნამალი ჩაუყარა. უფროსი და შემობრუნდა... ყავას მიირთმევდნენ და მშვიდად საუბრობდნენ. მზეთუნახავს მალე ჩაეძინა. ცინცხალამ, – იჩქარეთ, თორმეტზე უნდა გახვიდეთ, თორემ მეორე შუალამემდე დარჩებითო, -გასძახა ყმანვილებს. ისინიც გამოჩნდნენ, ცისიო სწრაფად შემოსვეს რაშზე, უკან გორდა შემოახტა, სხვები მეორე რაშზე შემოსხდნენ და სახიფათო გზას დაადგნენ. ის იყო, ბენვის ხილზე გავიდნენ, რომ მზეთუნახავს გამოეღვიდა! ერთი დაინივლა, გორდა ძირს დაანარცხა და რაში კუნძულისაკენ მიაბრუნა!

მოულოდნელობისაგან ყველა გაშეშდა!
მერე არწივები მოაგონდათ! გორდამ სამივე ფრთა ამოიღო და მეგობრებს საშველად უხმო! ლანდის უსწრაფესად მათთან გაჩნდნენ ფრინველები. გასაჭირი შეიტყვეს თუ არა, გაქცეულს დაედევნენ, წამოენივნენ, ფრთხი-



ლად აიტაცეს და გორდასთან დააბრუნეს. ყმანვილმა კაცმა დაუჩოქა მზეთუნახავს, ყველაფერს გიამბობო და პატიება სთხოვა. ცისიომ გაუღიმა და უთხრა:

– ამ არწივების გული რაკი მოგიგია, ჩანს, ღირსეული ადამიანი ხარ! გადავწყვიტე, მეც დაგიმეგობრდე! რა საჭირო იყო ძალადობა, მტაცებლობა?! ვერ ვიტან! თავიდანვე გეამბნა შენი გასაჭირი! იქნებ ჩემს დასავით მეც გამეგო?! კარგი, რაც იყო, იყო! ახლა მაინც ამიხსენი, რა გაგჭირვებია?!

გორდამ ათასი ბოდიში მოუხადა, მეგობრების წრეში დაჯდა და ცისიოსთვის ყველაფერი თავიდან გაიხსენა.

მზეთუნახავს გული საბოლოოდ მოუღბა:

– წამოგყვები და ნახავ, როგორ დავსჯი იმ შენს ღორ ბატონს!

ერთ დღეში გადაიფრინეს უკან სავალი გზა.

არწივები სოფლის დასაწყისში დაემშვიდობნენ დამეგობრებულ ადამიანებს. ბავშვები უჩინარნი გახდნენ. ბატონის ეზოში მხოლოდ ცისიო და გორდა შევიდნენ. ქალის სილამაზემ ისე გააბრწყინა იქაურობა, რომ დიდი და პატარა – ყველა გარეთ გამოვარდა, დაინახეს თუ არა, გამეშდნენ! ბატონი გიჟივით დახტოდა, მზეთუნახავს გარს უვლიდა, ხელებს იქნევდა, ყვიროდა... მოურავს ელდისაგან გული წაუვიდა, ძლივს მოასულიერეს... ცისიო მოთმინებით იდგა და სიცილს ძლივს იკავებდა... სავიამ აკანკალებული ხელი მოჰკიდა, გველეშაპის სახლისაკენ წაიყვანა, შეიყვანა და უთხრა:

– აი, ამ მშვენიერებას შენ აკლდი! შენი ადგილი აქ

არის!

ქალმა ყველაფერი ყურადღებით მოათვალიერა, მონონების ნიშნად თავი რამდენჯერმე დაიქნია და სავიას მიუბრუნდა:

– პირველ რიგში, პირობა შეასრულე და გორდას დედა გაათავისუფლე!

ბატონმა მოთხოვნა შეასრულა, მონადირეს დედა დაუბრუნა. როცა ცისიომ ბედნიერი დედა-შვილი ერთად იხილა, სავიას მიუბრუნდა:

– მაშ, ამ პატარა სახლის სამკაულად მოაყვანიე ჩემი თავი?!

– კიდევ ჩემი საყვარელი უნდა გახდე, – მიუგო სულელურად გაღრეჭილმა ბატონმა.

– აჰ! უნდა გავხდე?! ვინ იწვალა ჩემ ჩამოსაყვანად? – სიმკაცრე გაერია ხმაში ქალს.

– ჩემმა მსახურმა, ჩემმა მონადირემ, გორდამ,-- უპასუხა აცუნდრუკებულმა სავიამ.

– გველუშაპი ვინ მოკლა და მისი ძვლებისაგან დარბაზი ვინ ააგო?!

– გორდამ.

– იადონი და ბულბული ვინ მოგართვა?!

– გორდამ.

– შე, უსინდისო მოძალადე! – ისე განრისხდა ქალი, რომ ბატონი და მოურავი შიშისაგან მოიხარნენ. – თუ ყველაფერი ამ ბიჭის ხელით გაკეთდა, შენი როგორღა?! მოურავიც შენი მსგავსია! თქვენ ადამიანად ყოფნის უფლება არა გაქვთ! -სიტყვის დასრულები-

სთანავე წარბებს ქვემოთ გახედა, მშვენიერი საჩვენებელი თითი მიუშვირა და ბატონი ბუზად აქცია, მოურავი – კოლოდ! ერთი ერთ მხარეს გაფრინდა ბზუილით, მეორე მეორე მხარეს – წუილით...

ცისიომ გორდას თავისუფლება მიულოცა, ბავშვებიც გამოჩნდნენ, სასახლის აქამდე მონყენილმა, დაღვრემილმა, შეშინებულმა, დამცირებულმა მსახურებმა გამარჯვების ყიჟინა დასცეს, ერთხმად შემოსძახეს სიმღერა, იმათაც კი, ხმა რომ არასოდეს ამოელოთ და ვერ წარმოედგინათ, შეეძლოთ თუ არა სიხარულის გამოხატვა!

დიდხანს გაგრძელდა ზეიმი. სავიას ქონება, ყველას გადაწყვეტილებით, გორდას მიაკუთვნეს. მან კი ყმები გაათავისუფლა და ქონებაც ყველას თანაბრად გაუნაწილა, სხვაზე მეტი არ აუღია, მხოლოდ საკუთარი გეგმით შექმნილი პატარა სახლი, წვალეებით მოპოვებული ბუღბული, იადონი და მონადირეობის ირმის ტყავი დაიტოვა. დედა ღარიბული ქოხიდან საცხოვრებლად იქ გადაიყვანა, ცოლად საყვარელი გოგონა მოიყვანა. ქორნილი მთელი სოფლის ზეიმად იქცა. ვის აღარ ნახავდით იქ?! სწავლულსა და უსწავლელს, მდიდარსა და ღარიბს, მოხუცსა და ახალგაზრდას, გლეხსა და ვაჭარს.

ამ ხნის განმავლობაში ცისიო და ჩვენი პატარა მოგზაურები გორდას გვერდით იყვნენ, ყველაფერში ეხმარებოდნენ.

დამშვიდობების დრო დადგა! განშორება გაუჭირდათ, მაგრამ თითოეულ ადამიანს ხომ საკუთარი ცხოვრების გზა აქვს! პირობა დადეს, რომ ერთმანეთს შეძლებისდაგვარად ხშირად მოინახულებდნენ. ცისიო საკუთარ კუნძულზე გაემართა, ხოლო ბავშვები, გორდას თხოვნით, ერთი დღე-ღამით კიდევ დარჩნენ.



ზაზვარღეთში

ელისაბედმა და საბამ გორდას ქორწილში ერთი მოხდენილი აღნაგობის თავაზიანი ვაჟი გაიცნეს. ერთმანეთი ძალიან მოეწონათ. გულთბილი საუბარი გააბეს და საკუთარი თავგადასვლები გაცვალეს. ყმანვილი კაცი ზაზვარღეთის მილიარდელი სოვდაგრის, უძიას, შვილი, გორდას ბავშვობისდროინდელი მეგობარი, ლომგულა, აღმოჩნდა. იგი მუდამ მზად იყო, არა მხოლოდ მეგობრულად, ეკონომიურადაც დახმარებოდა და ბატონისაგან გამოსყიდვასაც სთავაზობდა ძმაკაცს, მაგრამ ეს უკანასკნელი ამის ნებას არ აძლევდა, მე თავად უნდა მოვიპოვო თავისუფლება...

ლომგულას მამას, უძიას, ახალგაზრდობაში, თურმე, შვილი დიდხანს არ ჰყოლია. თანამედროვე ენით რომ ვთქვათ, ბიზნესში საოცარი წარმატებისათვის მიუღწევია და მალე საერთაშორისო მნიშვნელობის გარიგებებში დაუწყია საქმიანობა. ერთხელ სხვა სახელმწიფოში დიდი ხნით მოუწია წასვლა. საყვარელ მეუღლეს, ამარტას, სთხოვა წაჰყოლოდა, მაგრამ ამ უკანასკნელმა უარი უთხრა, მოიმიზეზა, ოჯახს დიდი ხნით ვერ დავტოვებთ, ვინმე უკეთურმა, ვაითუ, გაგვძარცვოსო. სინამდვილეში ერთი თვის ფეხმძიმედ იყო და სიმართლე არ გაუმხილა, თუმცა, თავს ძლივს იკავებდა! არ გაუმხილა, რადგან მაშინ მეუღლე წასვლას გადადებდა. ამით კი არა მხოლოდ საკუთარ თავს, მეგობარ საქმოსნებსაც ავნებდა. ამარტა უკეთილშობილესი ქალი იყო და პირადი ინტერესებისათვის სხვას არასოდეს განირავდა. მარტოც არ რჩებოდა-ერთგული მსახურები ჰყავდა.



თუმცა მათ მეგობრებად უფრო თვლიდა. ისინიც ათმაგად უბრუნებდნენ სიყვარულსა და მზრუნველობას. ტყუილად კი არ უთქვამს რუსთაველს: „რასაცა გასცემ, შენია, რას არა, დაკარგულია!”

– ჩემო ძვირფასო, – უთხრა გამომშვიდობებისას უძიამ ამარტას, – გზას და საქმეს, ვფიქრობ, 10 წელი დასჭირდება...თუ დროზე არ დავბრუნდი, მკვდრად ჩამთვალე და ისე წარმართე შენი ცხოვრება, როგორც მოგესურვება... რას იზამ, ურისკოდ წარმატებები არ მოდის.

ამარტას ძალიან გაუჭირდა, მაგრამ ნუგეშს შვილზე ფიქრი აძლევდა...რვა თვეში ბიჭი დაიბადა!.. დედამ ლომგულა დაარქვა...

ვაჭართუხუცესი ათის ნაცვლად თხუთმეტი წელი დაყოვნდა საზღვარგარეთ. ცოლმა ჩათვალა, რომ დაიღუპა და თავი ქვრივად გამოაცხადა...

ლომგულას 15 წელი შეუსრულდა. ისეთი ვაჟი დადგა, ავ თვალს არ ენახვებოდა! არაჩვეულებრივ გარეგნობას უმდიდრესი შინაგანი სამყარო ჰარმონიულად ერწყმოდა. მიუხედავად ჭაბუკობისა, მართლა ლომის ძალა ჰქონდა, თან ძალიან ჭკვიანი და მოხერხებული გახლდათ.

სოვდაგარმა მე-16 წელიწადს მოახერხა შინისაკენ გამომგზავრება. შეკრა მონაგებ-მონაგარი, ილოცა, პირფვარი გადაიწერა და საკუთარი გემით გაემართა ზაზვარდეთში.

პონტოს ზღვაში შეცურდნენ. ფირუზისფერი ტალღები ერთმანეთის მიყოლებით,



რიტმულად მილივლივებდნენ. გემი ოდნავი რწევით მიაპობდა წყალს. უცბად მომხიბვლელ სირინოზთა გუნდი შემოერტყა გემს. მომაჯადოებელი გალობა გაისმა...საოცარ ხმათა ჰარმონიამ გააშეშა მთელი ეკიპაჟი, კინალამ ხომალდის მართვაც დაავიწყდათ...


რამდენიმე წუთის შემდეგ სირინოზებმა სიმღერა უცბად შეწყვიტეს და გაქრნენ! ზღვა აიძვრა, უზარმაზარ ტალღებად აიქორჩრა...გემის წინ, სიღრმიდან, საშინელი არსება ამოიმართა. თავისა და ტანის ქვედა ნაწილი ადამიანისა ჰქონდა. ფეხების ნაცვლად ვეშაპის კუდი ება, ხელების ადგილზე რვაფეხას მსხვილი საცეცები უსხმარტალებდნენ, არწივისებურ თვალებს საზარლად აბრიალებდა, თავზე ცხენთევზას ბიბილო-ფარფლები უფარფალებდა, ერთი საცეცით ნეპტუნის ჩანგლის მსგავსი ოთხკაპა ეჭირა. კუდზე შემდგარი ტალღებზე ირწეოდა და ჭიხვის მსგავს ხმებს გამოსცემდა.

ეს ზღვის ჯურღმულის ხელმწიფე ქაჯაჯა იყო!

ყველა შეშინდა! უძია შენუხდა და ღმერთს საყვედური შეჰკადრა:

– უფალო, დიდება შენდა! მეთექვსმეტე წელს ძლივს ვბრუნდები სამშობლოში და რატომ დაუშვი, რომ ქაჯს ჩავვარდნოდი ხელში! რა დავაშავე?





– უფალი კი არა! – შესძახა ურჩხულმა, – აქ ჩემი სამფლობელოა! ღმერთიც მე ვარ და მბრძანებელიც! თუ გინდა, შინ გაგიშვა, შენი უცოდინარი უნდა მომცე! ეს იქნება შენი საბა-
უო გადასახადი, ჩემს წყლებში რომ გაიარე! ხომ ხედავ, მონაგებ სიმდიდრეს არ გთხოვ. აი რა კეთილი ვარ!

უძია ჩაფიქრდა: -ცოლი რომ მყავს, ვიცი. კარგი სახლ-კარი რომ მაქვს, ვიცი... რა არ ვიცი?!... ბოლოს დაასკვნა: ბოროტია და ბოროტად მეხუმრებაო... ამიტომ დაეთანხმა.

– გახსოვდეს, – გაიღრიჭა ქაჯაჯა, – ის შენი უცოდინარი ამ დღიდან 1 ნელში უნდა გამოცხადდეს ჩემთან! თორემ მთელს შენს საგვარეულოს ზღვაში ჩავენთქავ! ჩაფიქრდა უძია, მაგრამ რა უნდა ექნა!

ქაჯაჯამ ჯადო ახსნა ხომალდს და გაუშვა. მერე ავი ხარხარით სიღრმეში ჩაეშვა... ზღვა დანყნარდა, ტალღები ალივლივდნენ და გემს ისევ ნაზი ტლაშუნით მიელამუნენ. მერე კი, როცა ხომალდმა სვლას უმატა, აიქოჩრნენ...

სოვდაგარი გემბანზე იდგა და მოუთმენლად ელოდა ნაპირის გამოჩენას...

აი, ზაზვარდეთის თეთრ-ვარდისფერი შენობები გამოიკვეთნენ, ნაპირთან მდგარი უზარმაზარი ხომალდები და მოხდენილი კატარღები გამოჩნდნენ. ნავსადგური მზად იყო გემის მისაღებად.

ნაპირზე გადასულმა უძიამ, ვიდრე მის ბარგს გადმოტვირთავდნენ, ცოლთან მაცნე აფრინა (მაშინ მობილური ტელეფონები, სამწუხაროდ, გამოგონებული არ იყო).

ამარტა როგორ გაიხარებდა, ხომ წარმოგიდგენიათ?! მაშ-

ინვე შეაკაზმვინა ეტლი, გვერდით მოისვა 15 წლის მშვენიერი ვაჟიშვილი და ნავსადგურისაკენ გაემართა. გემს უკვე ჩაეშვა ლუზა. მეზღვაურები ჩამოდოდნენ. ტვირთი გადმოჰქონდათ. უძია კიბესთან იდგა და ვილაცას განკარგულებებს აძლევდა.

მონატრებული ცოლ-ქმარი ტირილით გადაეხვია ერთ-მანეთს! უძიამ ამის შემდეგ შენიშნა ამარტას თანმხლები. შეხედა თუ არა, საკუთარი ახალგაზრდობა გაახსენდა, თავი შეიცნო იმ ყმანვილში! მღელვარებისაგან სული შეეხუთა, გული კინაღამ წაუვიდა, მუხლები მოეკვეთა და ნაბარბაცდა. მეუღლემ მკლავში ჩაავლო ხელი, მსუბუქად შეანჯღღრია და მიახარა:

– ჰო, ეს შენი ვაჟია! არ გითხარი, რომ წასვლაში ხელი არ შეგშლოდა! როგორ გგავს, არა?!


მამამ შვილი გულში ჩაიკრა და აუნერელი სიხარულისაგან ხმამაღლა აქვითინდა. ცოტა რომ დამშვიდდა, ქაჯაჯას ნათქვამი გაახსენდა. ახლა მიხვდა, რას ნიშნავდა სიტყვა „უცოდინარი“. უსაზღვრო ნაღველმა სახე მოუღრიცა! დედა-შვილი დაიბნა, შეწუხდა!

– რა მოგივიდა, რა დაგემართა?! რა ამბავია ჩვენს თავს?! – შეშფოთდა ამარტა.

– ცოტა მადროვეთ! სული მოვითქვა! – ამოღერღა უძიამ...

შინ მივიდნენ. მშობლიური სახლ-კარის ნახვამაც ვერ მოჰგვარა შვება. მერე გვერდით მოისვა ცოლ-შვილი, მთელი სახლეულობა და ქაჯაჯასთან შეხვედრის ამბავი დანვრილებით გაიხსენა...

ამარტას გული წაუვიდა. ძლივს მოაბრუნეს. სასახლემ მოინყინა... ლომგულამ ყველა



დაამშვიდა:

– ეს წელი დავტკბეთ ერთად ყოფნით! მერე უფალი გვიჩვენებს გზას, არ გაგვწირავს!

– აი, ერთი წელი სრულდება... – გააგრძელა თხრობა ლომგულამ, – ჩემი მეგობრის ქორწილში რომ არ მოვსულიყავი, როგორ შეიძლებოდა! ქაჯაჯასთან ერთ კვირაში უნდა გამოვცხადდე, ჩემებს განსაცდელში ვერ ჩავაგდე! აი რატომ ვარ ნაღვლიანი...

ელისაბედმა და საბამ ვაჟი დაამშვიდეს და საკუთარი შესაძლებლობები გააცნეს. მერე ბექდის პანანინა თვალი მისცეს, როცა გაგიჭირდეს, გვახსენე და შენთან გავჩნდებითო. ლომგულამ თბილად გაუღიმა (რა თქმა უნდა, დანმარების შესაძლებლობისა არ სჯეროდა) და მადლობით დაემშვიდობა.

და-ძმამ გზა გააგრძელა. მიდიოდნენ და თან საუბრობდნენ:

– საბ, ხომ შენიშნე, როგორც აზაზუმ, ამანაც არ დაგვიჯერა!

– ნუ გიკვირს, ნურც გენყინება. ელი, ჩვენ ხომ ბავშვები ვართ. სანამ ბექდის ძალას არ დაინახავენ, ვერ ირწმუნებენ ჩვენს შესაძლებლობას. დავუმტკიცოთ, რომ მართლები ვართ, რომ ბავშვებსაც შეუძლიათ სასარგებლო და სასიკეთო საქმის კეთება! გაიხსენე, რას გვიმოიწოდებ ხეობა წარამარა: სიტყვას დიდი ფასი აქვს, მაგრამ

ქმედებას მოჰყვება შედეგო!

– ბებიკო!... ნეტა როგორ არის?!... მომენატრა!... – თვალები მოუნწყლიანდა ელისაბედს.


– მეც მომენატრა!...- ყელში ბურთი მოანვა საბას, მაგრამ თავი ვაჟკაცურად შეიკავა, – დავებმართოთ ლომგულას, აუცილებლად დავჭირდებით! მერე კი დავბრუნდეთ, დროა...

ამასობაში სოვდაგრის ვაჟი შინ მივიდა. მშობლებთან გამოთხოვების სიმძიმე თავიდან რომ აეცილებინა, ორი დღით ადრე გაპარვა გადაწყვიტა. სამგზავროდ აუცილებელი ნივთები ჩაილაგა, სახლ-კარის ყოველი კუთხე-კუნჭული შემოიარა, მძინარე დედ-მამას დიდხანს უცქირა, სახლის კარს აკოცა და რწმენით თქვა:

– მე აუცილებლად დავბრუნდები! აუცილებლად დავბრუნდები!

თვითონაც არ იცოდა, საიდან გაუჩნდა ეს აზრი. გაუხარდა, ღვთიურ ნიშნად ჩათვალა! გამხნევებულმა გააგრძელა გზა ზღვისაკენ. უცბად შენიშნა, რომ ორი თეთრი მტრედი მიუძლოდა. ამ აღმოჩენამ ელისაბედი და საბა გაახსენა და ბეჭდის თვალი ამოიღო, აკოცა (როგორც დაარიგეს), ბავშვების სახელები ახსენა...ახსენა თუ არა, ისინიც მაშინვე იქვე გაჩნდნენ.

სამივეს გაუხარდა ერთმანეთის ხელახლა ნახვა. დრო აღარ დაკარგეს და ბეჭედს რჩევა ჰკითხეს.



ელისაბედმა მარჯვენა ყური მიუშვირა, საბამ მარცხენა, ლომგულა წინ ჩაცუცქდა და სმენად იქცა.

ბეჭედი დიდხანს ჩურჩულებდა, ლომგულას მოქმედების გეგმას აყალიბებდა...

ქალაქიდან მოშორებით, აღმოსავლეთ სანაპიროზე, ოქროს სილიანი პლაჟი ყოფილა.

მისი არსებობა ზაზვარდეთელებმა არ იცოდნენ, რადგან ადამიანთა თვალთაგან უხილავი ჯადოსნური ფარდა ფარავდა. იმ პლაჟზე, თურმე, ქაჯაჯას სამი უმშვენიერესი ქალიშვილი ყოველ დილით ბანაობდა. გაგიკვირდათ ხომ?! მეც ახლა გავიგე ბეჭდისაგან, რომ საზიზღარ ურჩხულს პირველი ცოლისაგან (რომელიც, თურმე, პონტოს ზღვის სანაპიროდან, ლაზიეთიდან, ჰყავდა მოტაცებული) ჩვეულებრივი ადამიანები შეეძინა. გოგონებს მშობლების თვისებები გამოჰყვათ: ხმელეთსა და წყლის ქვეშ მამის მსგავსად შეეძლოთ ცხოვრება. დედასავით კეთილები და გულმონწყალენი ყოფილან.


სანაპიროზე ბეჭედმა გადაიყვანა. ლომგულა და ბავშვები უმაღლესად აღმოჩნდნენ ოქროს პლაჟზე. გათენებას უნდა დალოდებოდნენ და გამოქვაბულს დაუნყეს ძებნა. იპოვეს და შევიდნენ. საოცრად სასიამოვნო, ზომიერი ჰავა ტრიალებდა. კედლებიდან გამოშვერილი მომცრო ლოდები სკამებად გამოიყენეს. ელისაბედი ცელქობის ხასიათზე დადგა: მარცხენა ხელის ცერა, საჩვენებელი და შუა თითით ბეჭედი დაიჭირა, მარჯვენათი კენჭი აიღო, ააგდო. ხან საბასკენ ისროლა, ხან – ლომგულასაკენ, ბეჭდის დახმარებით უცვლიდა მიმართულებას. საბამ უფროსი მეგობრის

ხანჯალი მოიმარჯვა და ფარივით შეაგება პანანინა ქვებს; ლომგულა მუშტით იგერიებდა, ან ჰაერშივე იჭერდა. თან თვალს არ ამორებდა ნაპირს, სადაც მეორე დილით ქაჯაჯას ქალიშვილები უნდა გამოჩენილიყვნენ. ბავშვები თამაშს განაგრძობდნენ. რამდენიმე კენჭი ქვაბულის სიღრმეში შევარდა. უცბად ღრენა გაისმა! თურმე იქ ვეფხვს ეძინა! მყუდროებადარღვეული ნადირი მათკენ გამოემართა! შეშინებულმა ელისაბედმა შეჰკივლა, მოულოდნელობისაგან ბეჭედი ფეხებთან დაუვარდა... ამასობაში მხეცი ლომგულას ეცა! ხელდახელ შეება ყმანვილი კაცი (ხანჯალი ხომ საბას ეჭირა!), წინა ტორებში წვდა! ვეფხვმა უკანა ერთი ტორი ტყავკაბის კალთაზე ჩამოჰკრა და ჩამოჰფლითა! საბამ მოახერხა და ხანჯალი მიუგდო ლომგულას, ყმანვილი კაცი მარდად დასწვდა იარაღს და ყალყზე შემდგარ ნადირს ქვემოდან დაახვედრა, მუცელი გაუფატრა. ვეფხვი უკანა ფეხებზე ჩაიკეცა, მაგრამ ღრიალით წამოინია, უფრო გამძვინვარებულმა, თითქოს უფრო გაძლიერებულმა... ვინ იცის, რა საშინელება მოჰყვებოდა ამას, ელისაბედს ბეჭედი რომ არ ეპოვა! სასწრაფოდ ნადირს დაუმიზნა თხოვნით: მოკალი! ვეფხვი უსულოდ დაეცა ძირს! ელისაბედმა ბეჭედს აკოცა! ბიჭებმა თავისუფლად ამოისუნთქეს!

– ეჰ, რა სილამაზე მოვსპეთ! – დაენანა ელისაბედს, – იქნებ ბოკვერებიც ჰყავს?!...

– ეს სილამაზე ისე კარგად შეგვახრამუნებდა, ხორცის ნაფლეთიც არ მორჩებოდა! – გაიხუმრა საბამ





და ლომგულას ხანჯლის წმენდაში დაეხმარა. ელისაბედმა ბეჭედი შეახო უფროსი მეგობრის ჩამოფხრეწილ კალთას და გაამრთელა.

– ბებოსაგან გამიგია, ძველ საქართველოში ვეფხვს ღვთიურ ცხოვლად თვლიდნენ და სჯეუროდათ, მის მკვლელს უფალი დასჯისო, – ქვაზე ჩამოჯდა საბა.

– რა მოგველის?! – დაინტერესდა ელისაბედი.

– იმდენი მოთქმა უნდა წარმოვთქვათ, რამდენი ზოლიც აქვს, თან პატიება უნდა ვითხოვოთ! – ღიმილით აუხსნა ლომგულამ ბავშვებს. მერე დაძინება შესთავაზა.

გათენდა. სამივემ ადრინადად გაიღვიძა. ხელ-პირი დაიბანეს და მსუბუქად ისაუზმეს. ბაცი ოქროს დისკო წყლის უზარმაზარი სივრციდან ამოცურდა და თანდათან განითლდა...გაკვირვებულნი უცქეროდნენ ამ საოცრებას: მზის ჩასვლა ზღვის ჰორიზონტზე კი ენახათ და ბევრჯერ დამტკბარან ამ მშვენიერებით, მაგრამ ზღვიდან ამოსვლა- არასოდეს! მნათობს სიკაშკაშე მოემატა და სხივები ირგვლივ უხვად გატყორცნა. ახალგაზრდები ქვაბულში ისხდნენ და დილის ბრწყინვალეობით ტკბებოდნენ...

უცბად სანაპიროს თავზე, ცაში სამი უთეთრესი თოლია გამოჩნდა. ფარფატით დაემუნენ ნაპირზე და უმშვენიერეს ასულებად იქცნენ. მოქნილ ფეხებს ლამაზად ნაკვეთი ტანი უმშვენიებდათ. უფროსი შავგვრემანი და შავთმიანი იყო, საშუალი – თეთრი და ქერათმიანი, უმცროსი – სპილოსძვლისფერი კანისა და შოკოლადისფერ თმიანი. მზისკენ პირშექცეულნი ხელგაშლილნი იდგნენ და სხივებს ეფიცებოდნენ...ტალღები ეცელქებოდნენ

და ტერფებზე ელამუნებოდნენ. უკან დაიხევდნენ. მერე კვლავ მათკენ მიისწრაფოდნენ...გოგონები ფეხებს აბაკუნებდნენ და ერთმანეთს წყალს აწუნებდნენ... მერე ადგილიდან ერთად მოსწყდნენ და ზღვაში შეცურეს. შორს რომ გავიდნენ, ლომგულა გამოვარდა, უმცროსი დის ტანსაცმელს დასწვდა და სირბილით წამოიღო. კვლავ გამოქვაბულში დაიმალა.


ღებმა გული იჯერეს და ნაპირზე გამოვიდნენ. უმცროსის ტანსაცმელი რომ ვერ იპოვეს, ისეთი წივილი ატეხეს, ქვა ქვას ეხეთქებოდა, ხე – ხეს! შეშინებული ფრინველები გადაიკარგნენ!... უფროსი და საშუალო იძულებულნი გახდნენ ჩაცვათ, შინ უნდა გაბრუნებულიყვნენ, თორემ მამა აღარასოდეს გაუშვებდა სახლიდან. მართალია, ცალ-ცალკე ცხოვრობდნენ, მაგრამ ქაჯაჯა ყოველთვის ამონმებდა, ხომ არ იგვიანებდნენ. ჩაიცვეს და უმცროსი და დაამშვიდეს – ალბათ ჩიტებმა გაფანტეს. შენი მოხერხებულობის ამბავი რომ ვიცით, თავს ყველაფერს ადვილად გაართმევ. ჩვენ უნდა დავბრუნდეთ, რომ მამამ შენი არყოფნა ვერ გაიგოს. აკოცეს, თოლიებად იქცნენ და გაფრინდნენ.

მარტოდ დარჩენილმა ქალიშვილმა ნაპირზე გაიხედ-გამოიხედა, ვერავინ რომ ვერ დაინახა, სმამალა იკითხა:

– ვინა ხარ?! თუ რა ხარ?! ხმა გამეცი!...
დამენახე!... რაკი ამ ნაპირზე შემოაღწიე,
ჩვეულებრივი ადამიანი არ იქნები!

ლომგულა (გეგმის თანახმად) ჯერ არ გამოეხმაურა.

– თუ ახალგაზრდა კაცი ხარ, ძმად მი-



გილებ, თუ ხანდაზმული –
მამად, თუ ქალი ხარ, დად
გაგიხდები! – ყვიროდა ქალიშ-
ვილი, – ტანსაცმელი მომეცი!

ქალმა რამდენჯერმე გაიმეორა
თხოვნა. ვაჟი კვლავ არ გაეპასუხა. ბო-
ლოს სასურველი წინადადება გაიგონა:

– კარგი, ოღონდ გამოჩნდი და შენ – ქმარი,
მე – ცოლი!

აილო ლომგულამ სპილოსძვლისფერ კანია-
ნი გოგონას ტანსაცმელი, ელისაბედისა და საბას
გამონწვილ ხელისგულებს ხელი დაჰკრა და გამოქვ-
აბულიდან გავიდა. საბანაო კოსტუმში გამონყობილ
მშვენიერ ქმნილებას მისი დანახვისთანავე გაუქრა
სახიდან სიბრაზე და მონონების ღიმილი გადაეფინა...

ყმანვილი კაცი მონინებით მიესალმა, ლოდინისათვის
ბოდში მოუხადა და უთხრა:

– ბედისწერამ ჩვენი ერთად ყოფნა ინება. სერიოზული
განსაცდელი მელოდება და მხოლოდ შენ შეგიძლია ჩემი ხსნა.

გოგონამ ხელი გაუწოდა:

– ზღვისია მქვია. ტყუილს ვერ ვიტან, რასაც ვფიქრობ,
იმას ვამბობ, რასაც ვიტყვი – ვასრულებ! მომეწონე! თუნდ
არ მომწონებოდი, ჩემს პირობას მაინც ავასრულებდი!
ვიმეორებ: შენ – ქმარი და მე – ცოლი!

– როგორც კი დაგინახე, გულში ჩამივარდი! თუმცა ამ
მიზნით არ მოვსულვარ, მაგრამ ასეთი ყოფილა ჩვენი ბე-

დისწერა! არაჩვეულებრივი ბედისწერა! – კიდევ ერთხელ სცა თაყვანი აღფრთოვანებულმა ვაჟმა.

– ნამოდი ჩემს სახლში, – შესთავაზა ზღვისიამ, – იქ მიამბე, რა გაგჭირვებია და როგორც შემიძლია, დაგეხმარები.

– ვიდრე წავიდოდეთ, ნება მომეცი, გაგაცნო ჩემი საუკეთესო პატარა მეგობრები, რომელთა წყალობით ვარ აქ!

ბავშვები საჩინონი გახდნენ. ახლობელივით ჩაეხუტნენ ახალგაზრდა ქალს. მერე ერთად გაფრინდნენ.


წალკოტივით ბაღში ბროლის სასახლე გამოჩნდა. უამრავი ყვავილი დამათრობელ სურნელებას აფრქვევდა, ხეებზე, ბუჩქებზე, ყვავილებზე ჩიტები დახტოდნენ და ჟივჯივებდნენ, ვრცელ აუზში ყელმოღერებული თეთრი გედები ამაყად დაცურავდნენ-თითქოს ფრინველთა სამყაროს ნიშნს უგებდნენ; ფარშევანგები ულამაზესი ფერებით მოხატულ კუდებს შლიდნენ – გამვლელებს ეპრანჭებოდნენ, ციცრები დაკუსკუსებდნენ.

ზღვისიამ სტუმრები შინ შეიპატიჟა. მონესრიგების შემდეგ სუფრასთან მიიწვია. ზღვის მრავალგვარი პროდუქტით დახუნძლულ თეფშებს შორის ხილით სავსე ლანგრები და ყვავილიანი ლარნაკები იდგა. მასპინძელი ხან ერთ კერძს სთავაზობდა ყმანვილებს, ხან-მეორეს. ისეთი თბილი ატმოსფერო სუფევდა, თითქოს დიდი ხნის ნაცნობები, უფრო ზუსტად, ახლობლები იყვნენ.

– ჩემთან რა მოგიყვანათ?! – იკითხა ზღვისიამ.

ლომგულამ და ბავშვებმა, რა თქმა უნდა, ყველაფერი დაწვრილებით უამბეს. ქალიშვილი ძალიან შეწუხდა,





მამამისი რომ აღმოჩნდა მთავარი დამნაშავე...
ბოდიში მოუხადა და განაგრძო:

– დედა ადრე გარდამეცვალა... მამაჩემი, მიუხედავად ასეთი გარეგნობისა, ძალიან, დიას, ძალიან კეთილი იყო...ახლა მეორე ცოლი ჰყავს, საშინლად ბოროტი ქალი! უფრო მეტიც, კაციჭამია! მან შეცვალა მამაჩემი, გააავა! ურჩხულად აქცია! შენც, ალბათ, ჩვენი დედინაცვლის სალუკმოდ უნდინხარ (კიდევ კარგი, ამ ბავშვებს არ იცნობს!))! მე და ჩემი დები ცალკე ვცხოვრობთ. იმასთან რა გაგვაძლებინებს! ცუდ დღეში ჩავარდნილხარ!... უცბად კი არ შეგჭამს, ოთხ ურთულეს დავალებას მოგცემენ, შენი ნვალებით რომ გაიხარონ... – სათქმელი დაასრულა და ატირდა...ბიჭმა დაამშვიდა:

– არაფრის მეშინია, ისეთი მეგობრები მყავს! ყველა დაჩაგრულის თანადგომაა მათი საზრუნავი. მიზნის მიღწევაში ბებოს ნაჩუქარი ბეჭედი ეხმარებათ. მოდი, დროს ნუ დავკარგავთ. სანამ მამაშენთან გამოვცხადდები, გეგმა შევიმუშაოთ. ყველა დაეთანხმა. ბეჭედს მიმართეს. მდგომარეობა გააცნეს...

ის ღამე ზღვისიას სასახლეში გაათენეს. ბავშვები მასპინძელთან დარჩნენ. დილით ლომგულა ქაჯაჯასთან გაემართა ხმელეთის სასახლეში (ზღვის ფსკერზე ჰქონდა!). მივიდა, მიესალმა და უთხრა:

– მე ზაზვარდეთის სოვდაგრის შვილი გახლავარ. პირობის თანახმად მოვედი. რას მოითხოვთ ჩემგან?!

ზღვის უფსკრულთა ხელმწიფემ ყმანვილ კაცს ახედახედა, ხელები მოიფშვნიტა და ცოლს გასძახა:

– მოდი, საყვარელო, ნახე, როგორი სტუმარი გვეწვია!
„საყვარელი ცოლი“, რომელსაც მაჯლაჯაჯა ერქვა, ნიანგის ფეხებზე იდგა, ტანი ადამიანის ჰქონდა, მკლავები – მსხვილი გველთევზებისა, თითებზე არნივის კლანჭებისებური ფრჩხილები წაზრდოდა, სახე ზღვის ღორს მიუგავდა, კისერს 360 გრადუსით ატრიალებდა, თავზე შხამიანი მედუზების ქუდი ეხურა. იდგა და ზვიგენის კბილებს აღრჭიალებდა. ლომგულასაკენ გაიწია, მაგრამ ქაჯაჯამ შეაჩერა, ჩასჩურჩულა:

– ძვირფასო, კატა თავვს რომ დაიჭერს, კი არ სანსლავს, მასთან თამაშით ტკბება. -მერე ლომგულას მიუბრუნდა:

– გახედე მინდორს, დილამდე ისეთი გალავანი უნდა შემოარტყა, რომლის სიმაღლე 3 მეტრი იქნება, სისქეც


– 3. თუ ვერ შეასრულებ, იცოდე, ცეცხლზე შეგწვავ და შეგახრამუნებთ მე და ჩემი მაჯლაჯაჯა!

– თქვა და საძაგელი სიცილით მუცელზე მოისვა ხელი.

სოვდაგრის ვაჟი ცოლთან დაბრუნდა, ელისაბედი და საბაც მოუთმენლად ელოდებოდნენ. ბეჭედთან მოკალათდნენ. ლომგულამ დავალების შინაარსი გააცნო...

ბეჭედი მცირე ხნით დუმდა, მერე მზე-





სავით განათდა და ერთ წამში ყველას თვალნი
გაჩნდა ასი კალატოზი. ასივე, რომ დაღამდა,
ბეჭედთან ერთად მინდორში გავიდა სამუშაოდ.
გამთენიისას კი გაქრნენ. დილით, კაცი-ურჩხუ-
ლი რომ მივიდა, ლომგულა გალავანთან იდგა,
ქაფჩით ხელში და კედელს ასწორებდა...

გაკვირვებულმა და გაავებულმა ქაჯთა
ხელმწიფემ – მომავალ დავალებას დაელოდეთ, –
მიაჯღავლა, შინ მივარდა და ცოლს მიახალა: – არ
გაამართლა შენმა წინადადებათ, შეასრულა!

– დაგიდგეს თვალი! – დასჭყვივლა მაჯლაჯაჯამ.
– ვილაც დაეხმარა! ამას ადამიანი ვერ შეძლებდა!

სოვდაგრის შვილი ისევ ეახლა ახალი დავალების
მისაღებად. ქაჯთა ხელმწიფემ, ცეცხლივით აპილ-
პილებულმა, მიაყარა:

– ამ გალავანში დიღამდე ისეთი ბალი უნდა გააშენო,
რომ რიგი ყვაოდეს, რიგი მნიფდეს, რიგი იკრიფებოდეს.
შეასრულებ, ხომ კარგი, არადა, შამფურზე წამოგაგებთ
და შეგბრანავთ!

დაღონებული ბიჭი ცოლის სასახლეში დაბრუნდა. მე-
გობრები სათათბიროდ შეიკრიბნენ და ბეჭედს დავალება
გადასცეს. ბეჭედი კარგა ხანს ჩუმად იყო, მერე მზერის
მომაჯადოებლად აკაშკაშდა... თვალის დახამხამებაში
გაჩნდა მათ წინ 200 მებაღე. ახალგაზრდა ცოლ-ქმარმა
და და-ძმამ დაიძინეს. მებაღეები სიბნელეში ნიავევით
ჩაიპარნენ და ბეჭედთან ერთად ბალის გაშენებას შუდგნენ.
ინათა თუ არა, მებაღეები გაქრნენ...

ქაჯაჯა რომ მოვარდა, წინსაფარაფარებული ლომგუ-

ლა მსხმოიარე ხის ძირში იდგა და ფორთოხალს კრეფდა. კაც-ურჩხული გაშტერდა: ლარივით გაჭიმულ ერთ მწკრივში ალუბალი ყვაოდა, მეორეში – მწიფდა, მესამესა და მეოთხეში – ვაშლი, მეხუთესა და მეექვსეში – ბანანი, დანარჩენში – მსხალი, კივი, ბრონეული, მანდარინი, ყურძენი, ლეღვი და სხვა... მოკლედ – ყველანაირი ხილი!

ქაჯთა ხელმწიფე საზიზლარი ღრიალით გავარდა. სული ძლივს მოითქვა:

– მართლა გაუკეთებია!

ცოლმა იკივლა, იწივლა, ქოქოლა მიაყარა:

– სულ გამოჩერჩეტდი, ბებერო! კი არ გაუკეთებია, გაუკეთეს! შეიძლება შენი შვილიც დაეხმარა!

– გეყოფა, ალქაჯო დედაკაცო! შვილები ხომ გამიყარე ჩემი სახლიდან, ეს არ კმარა?! მოასვენე! ავად მაინც ნულა ახსენებ!

სოვდაგრის ვაჟი უფრო თამამად მიუახლოვდა ქაჯა-ჯას და მესამე დავალება მოითხოვა.

სიმამრმა ხელი წაავლო, მდინარე დაანახვა:


– მასზე სპილოს ძვლის ისეთი ხიდი უნდა ააგო, ცხრა სადროშო ჯარმა თავისი ტანკებით, თოფ-ზარბაზნებით ზედ გაიაროს და არც კი შეირყეს! გააკეთებ, ხომ კარგი, არ გააკეთებ, გაგახმოვთ და ისე შეგჭამთ!

ბიჭს საქმე ეძნელა. ცოლსა და ბავშვებს შესჩივლა:

– სპილოს ამდენ ძვალს სად ვიშოვით?! ამ სიგრძე და ასეთ მყარ ხიდს როგორ ავაშენებთ?!

ბიძაშვილ-მამიდაშვილმა და-ამშვიდა და ბეჭდის შესაძლებლობები შეახსენა. ბებოს საჩუქარს ერთად დაუგდეს ყური.





ბეჭედი ურიცხვი ვარსკვლავის გუნდით აციმციმდა...ლანდის უსწრაფესად გაჩნდა ეზოში 300 მშენებელი.

ზღვისიამ, ლომგულამ და ბავშვებმა დაიძინეს. მშენებლები და ბეჭედი მთელი ღამე მუშაობდნენ.

სოვდაგრის ვაჟი უთენია ადგა, წინსაფარი მიიფარა, ხელში ჩაქუჩი დაიჭირა და ისეთი სახე მიიღო, თითქოს ეს-ესაა, საქმე დაასრულაო!

ქაჯაჯა მივიდა და ეს რომ დაინახა, გაცოფები-საგან დაბარბაცდა, მძვინვარებისაგან აცახცახდა, ლამის თვალები შუბლზე აუცვივდა!.. ცოლთან გავარდა:

– მაჯლაჯაჯაააა! აუშენებიააა! აუშენებიაააა! ეს ვინ არის, ლამის გვაჯობოს!

– ბრმა ხარ და სულელზე სულელი!ის ბიჭი ჯადოქარი არ არის! რალაცის თუ ვილაცის ჯადოქრობა დაიხმარა!-წივილ-კივილით მივარდა ქმარს და ბრჭყალებით ჩააფრინდა! ძვირფასი მეუღლეც არ ჩამორჩა ვალში და ერთმანეთს ნენვა-გლეჯვა დაუნყეს. ბოლოს არაქათგამოცლილები ძირს დაეყარნენ.

– ურთულესი დავალება უნდა მივცე! – წამოხტა ქაჯაჯა.

– მე მივცემ! – წამოხტა მაჯლაჯაჯაც.

– ოჯახის უფროსი მე ვარ! ჩემი სიტყვა კანონია! -შეუტია ქაჯთა ხელმწიფემ, ხელი ჰკრა და ზღვის სიღრმეში გადაუძახა. სანამ ის ზედაპირზე ამოვიდოდა, ლომგულასთან შესახვედრად ქარიშხალივით გავარდა...სოვდაგრის ვაჟი გზაში შეხვდა.

– რას მიბრძანებთ?! – ჰკითხა ბიჭმა.

წყლის ხელმწიფეს ორი რაში ჰყავდა: ნიავექარივით მქროლავი „თვალთულა“ და გულთმისანი „თვალჩიტა“.

თვალთულა სახლში ება-სატარებლად იყენებდა, ხოლო თვალჩიტა ჯოგში იყო, პატრონს არ ემორჩილებოდა; ვერაფერს მოახერხა მისი გახედნა. სწორედ ამ უკანასკნელის დაჭერა მოსთხოვა ვაჟს.

– თუ ვერ დაიჭერ, ცოცხლად გადაგყლაპავთ! – ღრიალებდა გიჟივით.

სოვდაგრის შვილს გაუხარდა, ცხენს როგორ ვერ დავიჭერო! ცოლს რომ შეატყობინა, მისი განმარტების შემდეგ მიხვდა, ყველაზე რთული საქმე რომ დაევალა. ის ჩვეულებრივი კი არა, ადამიანთა აზრის მკითხველი, გულთმისანი და დაუმორჩილებელი ცხენი ყოფილა!

ყველაფერი უამბეს ბეჭედს და დაიძინეს...

ბეჭედი მთელი ღამე კოცონივით გიზგიზებდა...



მზე ამოიწვერა. გაელვიძათ. მოწესრიგდნენ. ისაუზმეს. ლომგულა აივანზე გავიდა და აღტაცებისაგან შეჰყვირა. სხვებიც მიცვივდნენ: კიბესთან საუკეთესოდ შეკაზმული არაჩვეულებრივი რაში ება, იქვე იდო ძვირფასი თვლებით მოჭედილი ლაგამი და უნაგარი, თვალჩიტასათვის! ბეჭედთან მივარდნენ და რჩევა მოისმინეს.

ლომგულამ მეუღლე და ბავშვები რაშზე შემოისვა და ქაჯაჯას რემასაკენ გაეშურა. ნახევარი საათის ტენების შემდეგ ვრცელ მინდორში გავიდნენ. შორს რემა გამოჩნდა, რომელსაც თვალჩიტა მიუძლოდა. ქარივით მიჰქროდნენ ცხენები. წინმავალი ფრთოსანი რაში მალალ, ღონიერ ფეხებზე იდგა, ულამაზესი მოყვანილობის სხეულის ყოველი კუნთი უთრთოდა, თავი მალლა აენია, ნიავი გრძელ ფაფარს უფრიალებდა, დაბერილი ნესტოებიდან ოხშივარი ამოსდიოდა. რომ შენიშნავდა, სხვა ცხენებს გავუსწარიო, მობრუნდებოდა, რემას უკან მოექცეოდა, მერე კვლავ წინ გაიჭრებოდა და ისევ დაბრუნდებოდა. სხვები რომ დასასვენებლად შეჩერდებოდნენ, ის ირგვლივ უვლიდა.

ელისაბედმა ლომგულას ბეჭედი შეახო და ძალა შემატა. ბიჭმა უფალს შემწეობა სთხოვა, პირჯვარი გადაისახა



და ცხენისაკენ მარტო გაემართა.

თვალჩიტა, როგორც მოგახსენეთ, გულთმისანი გახლდათ. მაშინვე მიხვდა, ძლიერი, კეთილი ძალა რომ ეხმარებოდა მისკენ მიმავალს, რომ ქაჯაჯას ვაჟის დალუპვა სურდა, რომ ეს ახალგაზრდა უკეთილშობილესი ადამიანი, მშობლებზე დადარდიანებული, მეგობრების დამფასებელი და ცოლზე უსაზღვროდ შეყვარებული კაცი იყო; მიხვდა და გაუჩერდა:

– ვიცი, ვინცა ხარ! შემასხედით ზურგზე, ბავშვებიც დაეტევიან. ნუ გიკვირს, მე ხომ გულთმისანი ვარ, – თქვა და, ადამიანივით, გულკეთილად ჩაიცინა.

ზღვისიას, ლომგულასა და ბავშვებსაც გაეცინათ, მათ შორის დაფარული აღარაფერი იყო! უნაგირი დაადგეს, ლაგამი ამოსდეს და შესხდნენ. ცხენი, რომელმაც იქამდე მიიყვანა, მიჰყვა.

თვალჩიტამ ახალი მეგობრები ზღვის გაღმა ქვეყნისაკენ გააქანა.

ლომგულა რომ აღარ გამოჩნდა, ქაჯაჯამ ცოლს მიახარა, – ალბათ თვალჩიტამ გათელაო!

– რა იცი, იქნებ დაეხმარა! თვალჩიტა ხომ შენ ვერ გიტანს! დაენიე თვალთულათი და შეამონმე!

ქაჯთა ხელმწიფე გაცოფდა. ცხენზე შეჯდა და დაედევნა.

თვალჩიტა კვლავ ყველაფერს მიხვდა. ლომგულას შესთავაზა, უკან მიეხედა, ხომ არაფერი ჩანსო. შორს ბუზის ტოლა საგანი ჩანდა.

– ეს ქაჯაჯაა, თვალთულაზე ზის, იგი ჩემზე სწრაფია, მალე დაგვეწევა, რალაც უნდა მოვიფიქროთ, – დაავალა თვალჩიტამ.



ბებოს ბექედმა უმაღლესი ვენახი, რაშს მუშა ცხენის აგებულება მისცა და ფურგონში შეუბა, გლესის ქალებად სახენაცვალი ზღვისია და ელისაბედი ყურძნის მკრეფავებად გარდაქმნა, გლესის ბიჭად ქცეულ საბას ვედრო დააჭერინა ხელში, ხოლო ლომგულას გოდორი წამოჰკიდა ზურგზე.

ქაჯაჯა მივარდა და „გლესკაცს“ შეუყვირა:

– ცხენიან ახალგაზრდა კაცსა და ქალს ხომ არ ჩაუვლიათ?!

არაო, უპასუხა ლომგულამ. სიმწრისაგან აყმუვლებული კაცი-ურჩხული შინ გაბრუნდა. ცოლთან შევარდა ღრიალით -შემაცდინე, იმ გზით არ წასულანო.

– გზაზე არავინ შეგხვედრია?! – არანაკლებ იღრიალა მაჯლაჯაჯამ.

– ვენახის მკრეფავები.

– ისინი იქნებოდნენ! დაგიდგეს თვალები, რატომ არ მოკალი?!

ზღვის უფსკრულთა ხელმწიფე ისევ მოახტა თვალთულას და გაქცეულებს დაედევნა.



თვალჩიტამ იგრძნო თუ არა მდევრის მოახლოება, თავს უნდა ვუშველოთო, მიმართა თავისიანებს.

ბეჭედმა საყდარი გააჩინა, ლომგულა მღვდლად აქცია, ზღვისია, ბავშვები და რაში – მლოცველებად. დგას მღვდელი და „მამაო ჩვენოს“ კითხულობს... მივარდა ქაჯაჯა და ჰკითხა:

– ცხენიან ქალსა და ვაჟს ხომ არ ჩაუვლიათ?!

არაო, უპასუხა „მღვდელმა“.

გაბრუნდა თუ არა ზღვის ქაჯთა ხელმწიფე, ყველა ჩვენის საკუთარი სახე დაუბრუნდა. მაშინვე გააგრძელეს გზა.

შინ მისულმა ქაჯაჯამ ცოლს შეუტია:

– მერამდენედ დავრჩი მოტყუებული შენი ახირებული შეხედულებების გამო! აღარ დაგიჯერებ!

– რომ არ მიჯერებ, იმიტომ ხარ ამ დღეში! – დასწყვივლა გაპილპილებულმა ცოლმა, – სამივე გინახავს და ცოცხალი დატოვე! ხომ გითხარი, რომ ვილაც ეხმარებათ – მეთქი. ამჯერად აღარ დაგიჯერებ და მე დავედვენები, მე! მე! არ გაბედო მოშლა!



ქმარს ხელი ჰკრა, თვალთულას შეახტა და გააჭენა!
მაჯლაჯაჯა მიჰქროდა და კიოდა:

– ეშმაკად რომ იქცეთ, მაინც გიპოვით!

მიფრინავს თვალჩიტა, იცის, ვერ გაასწრებს... ზღვის გაღმამდე კიდევ რამდენიმე კილომეტრი დარჩათ... მიხვდა, მაჯლაჯაჯა უახლოვდებოდათ. შეატყობინა ბეჭედს. ამ უკანასკნელმა რაში ვრცელ ტბად აქცია, სოვდაგრის ვაჟი და ზღვისია – გედებად, ბავშვები უჩინრად დარჩნენ, მზად იყვნენ, თუ საჭირო იქნებოდა, ბეჭედი გამოეყენებინათ.

მოვარდა ქაჯთა ხელმწიფის ცოლი და ტბას სვლეპა დაუნყო... ხვრიპა და სვლიპა, ხვრიპა და სვლიპა... ბოლოს ქაჯაჯას ძვირფასი მეუღლე გასკდა! ნაფლეთებად იქცა!..ბეჭედმა ყველას საკუთარი სახე დაუბრუნა. მაჯლაჯაჯას ნარჩენები სასწრაფოდ დაწვეს, რომ აღარ გაცოცხლებულიყო.

ყველამ შვებით ამოისუნთქა. სიკეთემ საბოლოოდ გაიმარჯვა! საზეიმო ყიჟინა დასცეს! თვალთულაც მათ შეუერთდა. როცა დამშვიდნენ, გადანყვიტეს, ზღვისიას მამასთან დაბრუნებულიყვნენ და კეთილად გარდაქმნაში დახმარებოდნენ. ის ხომ ნამდვილ ურჩხულად მაჯლაჯაჯამ აქცია!

ზღვისიამ დებს გაუარა და ერთად ეწვივნენ მამას.



ქაჯაჯა აღარ ჰგავდა საშინელ ურჩხულს, რადგან მაჯ-
ლაჯაჯას ჯადოსაგან გათავისუფლებულიყო. არა, ნაკეთე-
ბი არ შეცვლოდა, მაგრამ ისე საშინლად აღარ გამოიყ-
ურებოდა, პირიქით, შეგებრალეობდა! ქალიშვილები რომ
დაინახა, წამოხტა და აცრემლებული გადაეხვია (ეს კარგი
ნიშანი იყო, რადგან ტირილის, სიბრალულის, სიყვარულის
უნარი დაკარგული ჰქონდა). ლომგულაც გულთბილად მი-
იღო. უფროსი და საშუალი ქალიშვილი მამასთან დარჩნენ.
ზღვისია კი ლომგულას მშობლების გასაცნობად წაჰყვა.

თვალჩიტამ და თვალთულამ უსწრაფესად მიიყვანეს ახ-
ალგაზრდები ზაზვარდეთში. ამარტასა და უძიას სიხარულს
ენა ვერ აღწერს! მამა კინალამ გაგიჟდა... დედას გული წაუვი-
და!.. ძლივს მოვიდა გონს შვილის მკლავებში. მთელმა სახლმა
მოიყარა თავი. აღტაცებისაგან ზოგი იცინოდა, ზოგი ხტოდა,
ზოგი მღეროდა – მოკლედ, აღარ იცოდნენ, რა ექნათ!

ზღვისიას ხელები მოეხვია ელისაბედისა და საბა-
სათვის, იდგნენ და ცრემლმორეულნი შეჰყურებდნენ ამ
სანახაობას. როგორც იქნა, მათი წარდგენის საშუალე-
ბა მიეცა ლომგულას. სოვდაგარმა და მისმა მეუღლემ,
მთელმა სახლეულობამ, ზღვისია და ბავშვები გულში ჩაი-
კრეს. მერე სახლ-კარი დაათვალიერებინეს.

სასახლე სამი შეერთებული ნაგებობისაგან შედგებო-
და: შუაში ოთხსართულიანი 25 მეტრის სიგანის თეთრი
მარმარილოს შენობა იდგა. გვერდზე ებმოდა წითელი
მარმარილოსაგან აგებული ხუთ-ხუთსართულიანი 10-10
მეტრის სიგანის შენობები. ძირითადი ნაწილი ოჯახისთ-



ვის იყო განკუთვნილი, ხოლო გვერდითი შენობები – მსახურებისა და სტუმართათვის. ეზოში ათასფერი ყვავილებით მოხატული ბაღი ყვაოდა. ყვავილნარს წითლად და თეთრად მოკენჭილი ბილიკები ნაკვეთებად ჰყოფდა. ცენტრში შადრევანი და ლურჯი აუზი იზიდავდა მნახველს. ეზოს ერთ კუთხეში ეგზოტიკური ფრინველებისა და ცხოველების ზოოპარკი მოეწყობა.

ზღვისია ქრისტიანად მონათლეს და არნახული ქორნილი გადაიხადეს. ელისაბედი და საბა საპატიო ადგილას დასვეს. ყველა უდიდესი პატივისცემით ეპყრობოდა. სოვდაგარი და მისი ცოლი ეხვეოდნენ, განსაკუთრებული სითბოთი ეფერებოდათ სოვდაგარის დედა. ბავშვები ამ უკანასკნელს აღარ შორდებოდნენ, რადგან საკუთარ ბებიას ამსგავსებდნენ!...ხან კალთაში უსხდებოდნენ, ხან თმაზე ეაღვრებოდნენ. გული უსაზღვრო სიყვარულითა და სათნოებით ჰქონდათ სავსე! მიხვდნენ, როგორ მონატრებოდათ ბებუკო!...მიხვდნენ, რომ მოგზაურობის შეწყვეტის დრო დამდგარიყო. წასვლის სურვილი რომ გა-



მოთქვეს, მასპინძლები შეეხვეწნენ- ცოტა ხნით კიდევ დარჩითო... ელისაბედი და საბა ერთი კვირით კიდევ დარჩნენ. მერე გუითბილად დაემშვიდობნენ ზაზვარდეთელებს. ზურგჩანთები მოიგდეს და გზას დაადგნენ.

ბეჭედმა ერთ საათში დარბაისკარის ტყეში დასვა ბავშვები. მუხისა და კაკლის უზარმაზარი ხეები დინჯად და მძლავრად შრიალებდნენ. ფოთლებს შორის მზის ცეცქი სხივები ციმციმებდნენ; წითელ-ლურჯ-ყვითელ ბუმბულიანი ჩიტები ჭიკჭიკით მიაცილებდნენ, ხანდახან ტყიდან კურდღელი გამოხტებოდა, დაცუცქედებოდა, ყურებს უკან გადაილ-აგებდა, თათს დაუქნევდა და ისევ ტყეში გაუჩინარდებოდა.

გზა არსად არ უხვევდა, ფართოდ განოლილიყო და მთაზე ადიოდა.

ელისაბედი და საბა მთის ნვერზე რომ მოექცნენ, მზე აღმოსავლეთის კარს ალებდა...

ბავშვებს სხივების სიკამ-კაშემ მზერა მოსჭრა, თვალი დახუჭეს და მთელი სხეული ნათელი ძალით აევსოთ... მერე თვალი გაახილეს თუ არა, დაინახეს საყვარელი ბებიკო, რომელმაც მათი საძინებლის კარი შეაღო!



ორივე წამოხტა ლოგინიდან და ბების ტკბილ მკლავებში ჩაიმალა!...

– გაიღვიძეთ, ჩემო გვრიტებო?! თქვენ შემოგვე-
ლოთ ჩემი სიცოცხლე! – ორივეს ეალერსებოდა ბებია,
– ისაუზმეთ, ხაჭაპური გამოგიცხვეთ, სკოლაში წასვლის
დროა...ხომ არ დაგავინწყდათ, საკუთარი ზღაპარი უნდა
წეროთ ქართულის გაკვეთილზე. მოიფიქრეთ რამე?

– აბა, რა! – ერთხმად წამოიძახეს ბავშვებმა, – აბა, რა!

მერე ბებოს მარცხენა ილღიაში შეეყუყულმა საბამ და
ბებოს მკერდის მარჯვენა მხარეს განაბულმა ელისაბედმა
ერთმანეთს მომუჭული თითები შეაჯახეს, შემდეგ გაშლი-
ლი ხელის გულები შეაგებეს და კიდევ უფრო ჩაეკონენ
დიდედას.



სარჩევი

რკალეებში ხალხური ზღაპრის დასახელებაა მოთავსებული

შინ	4
საზღაპრეთისაკენ	5
დარბაისკარი (ბაქია კურდღელი)	7
წყალთელა (ალქაჯის მოშორება)	13
ნიგვზანი (ალქაჯის მოშორება)	17
ჯუმაეთი (სიმართლის სიყვარული)	20
კოინდარეთი (სიმართლის სიყვარული)	25
ცაცხვისანი (სამი გამოცანა)	28
ვარდიფენი (სამი გამოცანა)	30
ხატულეთი (ხუთკუნჭულა)	35
სუფა (ხუთკუნჭულა)	40
იაეთი (ქალქვა)	46
გურიე (ქალქვა)	51
სამზეო (ქალქვა)	55
პონტო (მინდვრის ქალი)	59
ლაზიეთი (მინდვრის ქალი)	61
ჩირგუეთი (ქვრივის შვილი)	68
ზაზვარდეთი (სოვდაგრის ვაჟი)	91

